

Asun Wankláán Aní Luka Lówanlín

¹ Onumnyampu Tiofilo:

Ahá tsətsətsə babó mbódí wanlín tśá ileba anitə tswi. ² Bəwanlín tśá ahá á múú bəbə unu tsú mú nfiasí, bəgyi mú asúmpó amu bowun, dá mú əkan amu bebláa anı pépéépé. ³ Onumnyampu Tiofilo, mí é nabó mbódí kwí mótó wankláán tsú mú nfiasí. Mú su ndekléá nówanlín mú pépéépé há fú, ⁴ mənı fəbíá ató á múú basúná fú ámu igyi ənəkwalı.

Asú Əbəpó Yohane Kwí Asún

⁵ Bréá Herode dé iwíe gyí Yudea əmátó á, Bulu igyi əhapó əku létsiá, bətətí mu Sakaria. Otsú Bulu igyi ahapó əpasua kvá bətətí mú Abiatə. Mu ka gyí Elisabet, otsú Bulu igyi əhapó Aaron abı-anátó. ⁶ Mva mu ka asún da əkpa Bulu ansító. Bətegyi anı Wíe Bulu mbla pó mu nhıhıé féesú pépéépé. ⁷ Buma obı, tsúfə Elisabet mégyı ətsı kwı́pó. Mva mu kulu fée bahıé dan.

⁸ Eke əku ıltə Sakaria aná əpasua ání amú əbéha Bulu igyi. Sakaria lóyə əbu Bulu ansító əde mu agyómá yə. ⁹ Abı bətətswi pulé əhá ání obébitıwıe Əwankıkpá unu yówa əhıén ogyá, igyi ahapó ámu amándıé ənó. Bətswi a, ıleyı Sakariasu. ¹⁰ Bréá əde əhıén ámu ogyá wa á, ədəm ání bəyə ətswékpa unu fée bulı kpankpá bude mpái bə.

¹¹ Bulu-əbəpə əku lébelı afədıe-asubwi ámu gyəpısu, lé ıwı əwan súná Sakaria. ¹² Bréá olowun Bulu-əbəpə amu a, əlwan, ifú lowie mu ayetə.

13 Inu Bulu-ḁḁḁḁ amu lébláa mu ḁḁéé, “Sakaria, mánya ifú! Bulu lanú fú isú. Fú ká obénnya ḁmé kwíí obi yinhé há fú. Dinka mu dá ‘Yohane.’” 14 Obí ánfí kwíí bówa mli ḁḁwé, wá mli ansigyí. Ibówa ahá tsḁtsḁḁtsḁ é ansigyí. 15 Tsúfé kebi ámu ḁḁḁḁwé ḁha kpḁḁkpḁḁḁ Bulu ansító. Nta buhé kvku máda mu ḁḁḁ ékekekeke. ḁḁḁ Wankíhé ḁḁḁbulá muḁḁ tsú bréá ḁbu mu yin iwíḁ. 16 ḁḁéha Israelfḁ tsḁtsḁḁtsḁ bédamlí klḁḁḁḁ ba amú Wíe Bulu wá. 17 Bulu ḁḁḁḁḁḁ ḁḁḁḁḁḁElia túmi pú mu ḁḁḁḁḁḁ bétsiá muḁḁ. Obégya aní Wíe nkpá bá. ḁḁéha abí así bóḁwé amú abí, ḁḁḁdamlí ahá ání buḁḁkḁḁḁḁ líí Bulusu agywun, ibwé fé yilé abwepú klé, méní ḁḁéla ahá yáí wankláán há aní Wíe.”

18 Sakaria léfité Bulu-ḁḁḁḁ amu ḁḁéé, “Nḁḁ nḁḁḁḁḁḁḁ ání asún ánfí íbéba mótḁ? Tsúfé mía mí ká anlapḁḁ.”

19 Inu Bulu-ḁḁḁḁ amu lébláa mu ḁḁéé, “Mí dá gyí Gabriel. Bulu ansító ḁlípú ngyi. Muláwá mí ḁḁéé, mbébláa fu asun wankláán ánfí. 20 Tsú nde púya ekeá asún ánfí íbéba mótḁ á, fḁḁḁ omúmu, tsúfé fomḁḁḁ mí asun blíhé ánfí íbéba mú brétḁ anfisḁ gyí.”

21 Uḁḁwé alí á, imḁwánkí ahá amúú bulí bugyo Sakaria amu tḁá svá alawá ḁḁḁ ḁḁswékpḁ obutótḁ unu alí. 22 Bréá ḁledali ba a, alatḁ omúmu. Mú sv bowun ání alawun tḁku obutótḁ unu. Iníá ḁmetáli tḁí sv á, ḁḁḁḁ mu íbi mḁa mu nwun bláa amú asún.

23 Sakaria létsiá ḁḁswékpḁ unu yḁḁḁ ekeá ḁleha Bulu igyí tá, oleyinkí yḁ wḁyí. 24 Nke ámu ḁma a, Elisabet lénya ḁmé, tsíá ḁḁín iwí alu tsra anu kéké. 25 Elisabet léblí ḁḁéé, “Iní mí Wíe Bulu labwé há mí ní. Alawun mí nwe, dínkí nsópa lé mísó ahátḁ.”

Yesu Kwí Iwi Asón

²⁶ Bréá Elisabet omé lohɔ tsra asie á, Bulu lówa mu obɔɔɔ Gabriel wúlu kɔá ibu Galilea omátó, butetí mú Nasaret. ²⁷ Bulu lówa mu obitebí okóá omakódí oyin wá ki, butetí mu Maria wá. Alí bré ámutɔ buɔɔɔɔ obitebí ámu há oyin okóá butetí mu Yosef, ogyi owíe Dawid mu na beɛ otsía. ²⁸ Bulu-obɔɔɔ amu léba Maria wóyító beha mu itsiá, bláa mu obéɛ, “Bulu lagyi fu buale, alahíe yúlá fú!”

²⁹ Asón ánfí leha Maria légyigyáa, ɔlefíté mu iwí obéɛ, “Ngya ntɔ itsiá odu ɔhá ánfí lahá mí alí?” ³⁰ Bulu-obɔɔɔ amu lébláa mu obéɛ, “Maria, mánya ifú. Bulu lahíe yúlá fú! ³¹ Kí, fénya omé kwíí obi yinhé. Dinka mu dá ‘Yesu.’ ³² ɔbóbwe ɔha yilé. Bétí mu ɔsúsúsú Bulu mu Bi. Aní Wíe Bulu obéyáí mu mu nain Owíe Dawid obíású. ³³ Obégyi iwíe Yakob* wóyísú bré féétó. Mu iwíegyí móɔmɔ ɔnó ekkekɛkɛ.”

³⁴ Maria léfíté Bulu-obɔɔɔ amu obéɛ, “Nkálí ibóbwe asa íni ibéba mótó, tsúfé mmeyín oyin.”

³⁵ Bulu-obɔɔɔ amu léle mú ɔnó obéɛ, “ɔɣe Wankíhé obéba fɔsu. ɔsúsúsú Bulu ámu túmi bóbun fɔsu. Iní su ahá bétí Obi wankíhé amúú fókwi ámu beɛ, ‘Bulu mu Bi.’ ³⁶ Kí, fú obusuanyin Elisabet kóráá obá bókwií obi yinhé mu tsidɛhen anfitɔ. Ahá beɛ, megyí ɔtsi kwíípy ogyi, táme mu omé lohɔ tsra asie dodo. ³⁷ Tsúfé tɔtɔ mɔdón Bulu bwe!”

³⁸ Inu Maria lébláa Bulu-obɔɔɔ amu obéɛ, “Bulu osúmbi ngyi. Ibá mótó ha mɔ fé alí fablí.” Inu á, Bulu-obɔɔɔ amu lénatí sí mu.

Maria Léyesíndá Elisabet

* **1:33** Israelfɔ gyí Yakob abí-aná.

39 Nke ámotò á, Maria lókulá ató, wa òsa yó Yudea abusu wúlu kutò. 40 Múú olowie Sakaria wóyítò há Elisabet itsiá. 41 Elisabet lénya nú itsiá ámu alí kebi ámu lékan iwí mu iwíto, Ọ̀ḡḡ Wankíhé lóbulá motò. 42 Inu òlòkplón blí òbée, “Bulu layúlá fò atsi féeétó. Alayúlá fò iwíto obí ámu é. 43 Iyé! Mí Wíe mu yin onutó lába mí wá á? Ntogyi sò Bulu lawá mí numnyam anfi odu? 44 Kí, nenyaní fò itsiá ámu alí obí ámuú òbu mí iwíto ámu lékan iwí ansigyísó. 45 Bulu layúlá fò, tsúfé fahogyi ání tóá alahíé há fò íbèba mótó.”

Maria Bulu Kanfò Iw

46 Inu Maria lówa iw òbée,
 “Mí òkláa dé mí Wíe Bulu kanfò.
 47 Mí Nkpa Ọ̀hópú Bulu lahá ansí de mí gyí.
 48 Tsúfé alakáín mí mu osúmbi ání òma tótò
 bwetósó, wun mi nwe.
 Tsú séi póya a, abí-aná féeé béblí bée, Bulu layúlá mí.
 49 Bulu Otúmípu amu labwé ató kponkponti há
 mí.
 Ọ̀lòwankí.
 50 Otowun ilín kugyíkoto
 ahá ání butenyá mu ifú nwe.
 51 Alapú mu túmi bwé ató akponkponti,
 pódá iwí atsupú nwuntò asún sáín.
 52 Alakplí awíe mbíásó,
 tsú ahá ání buma tótò bwetó fòá.
 53 Alahá ahiánfò bamlí iwí anyapó,
 há iwí anyapó banátí íbíkpan.
 54-55 Alakpá mu asúmpó Israelfò.
 Ọ̀metan ání òleblí òbée, mówun aní anáin Abra-
 ham
 mu a mu abí-aná nwe bré féeé,

fé alíá òlebláa amó.”

Alí Maria lómò mu ìbù ámu onó ní. ⁵⁶ Oletsíá Elisabet wá fé tsra asa asa oleyinkí yó wóyí.

Asú Ɖòpó Yohane Kwí

⁵⁷ Bréá Elisabet lóbòkwí á, òòkwí obi yinhé.

⁵⁸ Mu abusuanfò pò mu aba bonu ání aní Wíe Bulu lahíé wun mu nwe. Mú sù ansí légyi amó féeé.

⁵⁹ Obí ámu lénya ndawótswí á, mu iwísu ahá beba mu obuto òlekpa, abutin mu keté, ònka mu dá. Teki beé abupu mu si dá Sakaria ònka mu, ⁶⁰ táme mu yin lébláa amó òbéé, “O-o! Mlìdínka mu Yohane.”

⁶¹ Ahá ámu bebláa mu beé, “Anumókónú abuti fò obusuanyin òkoku alí ki.” ⁶² Inu bóbwe mu si ibi, fíté mu alíá butí kebi ámu.

⁶³ Sakaria lóbwe ibi òbéé bòtsúu tòku ha mu amowanlín mú ònka mósú, òòwanlín òbéé, “Mu dá gyí ‘Yohane.’ ” Ilofwie amó féeé. ⁶⁴ Inunu mu òdandù lesankí, òlòtòí kánfú Bulu. ⁶⁵ Ifú lekítá apíó aba ámu féeé. Alí asún ánfí lekíé wá Yudea abusù awúlu amú féeé. ⁶⁶ Ɖhagyíoha ání olonu asún ánfí léfíté mu iwí òbéé, “Ntò obí kebi ánfí òbóbwe ekekó?” Tsúfé òòwankí amó ání Bulu ibi òn mu.

Sakaria Bulu Kanfó Iw

⁶⁷ Inu á, Ɖhe Wankíhé lóbólá Sakariatò, òòwa asún ání Bulu lapóhá mu blí bi.

⁶⁸ Ɖbéé,

“Mlìha akanfò aní Wíe Israel Bulu.

Tsúfé alabele mu ahá, há anlagyi iwí.

⁶⁹ Alalé Ɖhópù Ɖwonlínpó òku

tsú mu osúmpó Owíe Dawid abusuantò há aní.

⁷⁰ (Fé alíá òleblí tsun mu onósú atáipó wankíhé amusu tswi dododo.)

⁷¹ Ɖbéé, méle aní tsú aní alupó

pó ahá ání butamafia anı ıbitə.

72-73 Ɖbéε, mówun anı anáın nwe.

Ɖméetan mv ntam wankíhé amóú ɔleka há anı náın Abraham amovv.

74 Ɖbéε, méle anı tsú anı alupó ıbitə,

méni abétalı súm mv, anıméenya adón ifú.

75 Ɖbéha abóbwe mv ahá,

bwé yilé mv ansísú anı nkpatə fée.

76 Mı bí, fú mó á, ahá bėti fú beε, ‘Ɖsúsúúsú Bulu ámv ɔnósú ɔtáıpó.’

Tsúfé fégya anı Wıe nkpa,

lá ɔkpa há mv.

77 Fébláa mv ahá feε, Bulu ɔbétalı hə amú nkpa

tsun lakpansikíésú.

78 Anı Wıe Bulu nwewúun sv

Kristo amv ɔbédalı fé owı tsú ɔsúsú ba anı wá.

79 Ɖbówankı wólı ahá amóú butsie oklúntə pú lowu ɔkpasv ámv féésú.

Ɖbékpa anı tsun iwilwii ɔkpasv.”

Inı Sakaria lópomó mv asún ɔnó ní. ⁸⁰ Kebi ámv lédan, nya Ɖhétó ɔwvnlın. Oletsıá dimbısú alı yófvn ekéá ɔlele ıwı ɔwan súná Israelfə.

2

Yesu Kristo Kwıı (Mateo 1:18-25)

¹ Alı bré ámvta á, Roma owıe dehen Augusto lówa mbla ɔbéε, bukláa ahá ání bubv Romafə ası féé, abvwanlın amú adá. ² Múgyı ahákla gyankpapv nı. Alı bré ámvta á, oyin ɔkvá butetí mv Kirenio dé Siria ɔmású gyı. ³ Inı sv ɔhagyıɔha lóyo dá ɔwanlınkpa mv onutó wúluto.

⁴ Yosef é lókúṣó tsú Nasaret wúlu ání ɪ̀bu Galilea ɔ́mátó dṓ yó Yudea ɔ́mátó, Owíe Dawid wúlutṓ Betlehem. Tsúfḗ Owíe Dawid mu na ógyi. ⁵ M̀ba Maria amóú bapóhá mu bεε otsía, ɔ́na odwinsu ámu nyṓ lóyṓ dá ámu ɔ́wanlínkpá. ⁶ Bréá bubu Betlehem ɪ̀nu á, ɪ̀kwíi lēkan Maria, ⁷ ɔ́lɔkwíi mu bití, ogyi oyin. Ɖlɛkíklí mu wá tatidatṓ, pṓ mu tswi mbwi atogyihe dákátṓ, tsúfḗ bumenya otsiákpá afṓṓ ɔ́swíkpá.

Akúfa Akpapó Pó Bulu-abṓpu

⁸ Alí bré ámutṓ á, akúfa akpapó aku bubu ɪ̀nu fón dimbití, buɔe amú akúfa ɪ̀wi gyo onyé. ⁹ Bulu-abṓpu léle ɪ̀wi ɔ́wan súná amó, Bulu numnyam lówankí wólí amósú. Mó su ifú lēhie kítá amó. ¹⁰ ɪ̀nu á, Bulu-abṓpu amu lébláa amó ɔ́béε, “Mlímánya ifú! Mliki, napó ason wankláán ání ɪ̀bówa mlia ɔ́yítṓ ahá fḗé ansigyí ba mli. ¹¹ Nde bakwíi nkpa Ɖhṓpu, aní Wíe Kristo, (ɔ́há amóú Bulu ladá mu ofúli amu) há mli Owíe Dawid wúlutṓ! ¹² Tṓá mlṓpubí mu gyí, mlówun kebi bṓbwe ɔ́kúá bapó tatida kíklí mu ɪ̀wi, ɔ́da mbwi atogyihe dákátṓ.”

¹³ Ɖtsáwule pé á, Bulu-abṓpu tsɔtsɔtsṓ beba bεtsiá Bulu-abṓpu amotṓ, buɔe Bulu kanfú bεε,

¹⁴ “Mliha apu numnyam ha Buluá ɔ́bu ɔ́súsúsú!

ɪ̀wi ilwii ahá ání Bulu ansí tegyi amó ɪ̀wi ɔ́sulṓsu.”

¹⁵ Bréá Bulu-abṓpu amu beyinkí yó ɔ́súsú á, akúfa akpapó ámu bebláa aba bεε, “Mliha ayṓ Betlehem, ayekí ɪ̀tṓ ánfí ilaba, Bulu lalé súná aní ánfí.”

¹⁶ ɪ̀ni su bṓwa ɔ́sa yó. Lélé á, bowun Maria m̀ba Yosef pṓ kebi bṓbwe amu, ɔ́da mbwi atogyihe dákátṓ. ¹⁷ Bréá bowun kebi ámu a, bele mu ɪ̀wi asún amóú bonu ámu blí. ¹⁸ Akúfa akpapó asún ánfí

lɔwa ahá aní bonu mú fée wánwan. ¹⁹ Táme Maria mú lékitá asón ámu fée wá nwuntɔ, tsíá gywíin mú iwí. ²⁰ Bréá akúfa akpapó ámu beyinkí bɔyó á, bɔna bɔde Bulu adábi da, kánfó mu, asón ámóó bonu pó itó ámóó bayówun fé alí ámóó Bulu-ɔbɔpu amu lébláa amó ámu su.

Yesu Idá Dínká

²¹ Kebi ámu obuto ɔleké á, betin mu keté, dínká mu dá Yesu. Idá anfi Bulu-ɔbɔpu amu léha mu asa mu yin lénya mu ɔmé ní.

Yesu Pɔya Bulu ɔtswékpa

²² Bréá mu akwípu bógyuráa iwí Mose Mbla ɔnó lɔfun a, bɔpu mu dú yó Yerusalem, pú mu yópu wá Bulu ibitɔ. ²³ (Tsúfé bɔwanlín wá Mose Mbla ámutɔ bɛɛ, “Ilehián aní Israelfɔ bɔpu amó bití okugyíɔku há Bulu.”) ²⁴ Mú su bɔyóbɔ afɔdie ámu Mbla ámu ɔnó. Abróduma anyɔ ntée aklobi anyɔ bɔpuɔbó alí afɔdie anfi há Bulu.

²⁵ Alí bré ámutɔ á, oyin dehen ɔku bu Yerusalem, bɔtetí mu Simeon. Yilé ɔbwepu ógyi, otenyá Bulu ifú. ɔɣe Wankíhé bu musu, otsie ogyo bréá Bulu ɔbɔpu ɔlepó ba mu ahá Israelfɔ. ²⁶ ɔɣe Wankíhé amu léle súná mu aní omóowu, yófun bréá alawun Kristo, (ɔhá ámóó Bulu ladá mu ofúli amu) asa. ²⁷ ɔɣe Wankíhé amu léha Simeon lóyɔ Bulu ɔtswékpa wunsínésó. Alí bré ámutɔ á, Yesu akwípu baba mu amándíé anfi ɔbwekpá fé alíá Mose Mbla ámu leblí. ²⁸ Inu Simeon lóhɔ kebi bɔbwe amu, ɔlekanfó Bulu ɔbée,

²⁹ “Mí Wíé! Asón ámóó feblí tswi amu ilaba mútú.

Séi mó á, mí fú osúmbi anfi nétalí wú iwilwiitɔ ngya.

³⁰ Tsúfé mí onutó napó mí ansíbi wun ɔlepó ámu.

³¹ Fó onutó falá mu bwé ahá fée ansító.

³² Wanki ogyi, ὁβέε fó súná ahá ání bomegyí Israelfo,

pó numnyam ba fó ahá Israelfo.”

³³ Asón ánfí Simeon léblí tsú kebi bᵔbwe anfi iwí lēha onó lobwie mu akwíró. ³⁴ Simeon lóyulá amó, ᵔlebláa obí mu yin Maria ᵔbéε, “Ina kebi ánfí su Israelfo ᵔfan bédida, ᵔfan é béli. Osúna ogyi tsú Bulusu, ahá bókusú líi musu. ³⁵ Iní su Bulu ᵔbéha ahá tsᵔtsᵔtsᵔ klonsu asón béliu ᵔwan. Fó é á, awireho béhie kítá fó klon. Ibóho fu ᵔsin fé ᵔdayí iya anyᵔ bakpíé yi fu.”

³⁶ ᵔtsi dehen ᵔkuá ogyi Bulu ᵔnósú ᵔᵔrópó é bu inu. Mu dá gyí Hana. Mu si gyí Fanuel, otsú Asa abusuantᵔ. ᵔtsi dehen anfi muᵔa mu kulu betsiá aba nfinsienᵔ, mu kulu lówu. ³⁷ Olosu isura alu bᵔfon bréá ᵔlho nfi adukwe-na (84). ᵔᵔpᵔ Bulu ᵔtswékpa wunsinésú inu mlí mu ᵔdikpa, ᵔde Bulu sým, klí onó, bó mpái ᵔpa móa onyé. ³⁸ Mu é ᵔledali ba bekanfó Bulu, blí kebi bᵔbwe amu iwí asón súná ahá ámúbᵔ bude Yerusalemfᵔ iwígyí ᵔkpa kí amu.

Yesu Yinkia Ya Nasaret Wuluta

³⁹ Bréá Yesu akwírópó bᵔbwe amándié ámu tá Bulu mbla ámu onó á, beyinkí kplí yó amú wuluta Nasaret, Galilea ᵔsolósu. ⁴⁰ Kebi ámu lédan, nyá ᵔwᵔnlín, nyá nyánsa, Bulu é lóyulá mu.

Yesu Bu Bulu ᵔtswékpa

⁴¹ Yesu akwírópó butetsiá yó Yerusalemu yégyi Israelfosu Katsun Nke ofifigyíofi. ⁴² Bréá Yesu lóho nfi dúanyᵔ á, muᵔa amónyᵔ bᵔyᵔ nke ámu ogyíkpa fé alíá butᵔyᵔ yái. ⁴³ Bréá begyi nke ámu tá beyinkí á, Yesu akwírópó bᵔmebi ání alasin inu. ⁴⁴ Buki beε muᵔa mu abanyᵔ ná. Mú su benatí ekewóle owító asa

bɔwa mu dunká apíó abato bi. ⁴⁵ Bréá bodunká mu kásíán á, beyinkí yó Yerusalem, yódunká mu. ⁴⁶ Eke sáásí a, boyówotií muṣu Bulu ɔtswékpa wunsínésó inu. Otsie Mose mbla asunápó wá, ɔde asu yáa amó asóntó, ɔde amó asón fité. ⁴⁷ Onó lobwie ahá ání bubu inu féeé, tsú alíá ɔde asón ámu asi nu pú alíá ɔde mú onó le. ⁴⁸ Onó lobwie mu akwípó bréá bowun mu. Mu yin léfité mu ɔbéé, “Mí bí, ntogyi su fabwé ani ali? Mía fú sínyɔ ansí lapé anidé fú dunká.”

⁴⁹ Inu Yesu léfité amó ɔbéé, “Ntogyi su mlidé mí dunká? Ilehíán ání mlébi ání mí Sí wóyító nétsiá.” ⁵⁰ Táme mu akwípó buṃonu asón ání ɔde amó bláa asi.

⁵¹ Mba amónyɔ beyinkí yó Nasaret, ɔleba iwiasí há amó. Maria lékitá asón ámu féeé wá kpawunuto, tsíá gywín mú iwí. ⁵² Yesu lédan, wa ɔwɔnlín, nyá nyánsa, Bulu múa anyánkpósa féeé ansí legyi mu iwí.

3

Asú Ɖɔpó Yohane Bulu Asón Ɖkanda (Mateo 3:1-12; Marko 1:1-8; Yohane 1:19-28)

¹⁻² Roma owíe dehen Tiberio iwígyí ofi dúanusitɔ á, Bulu lébláa mu igyí ɔhapó Sakaria mu bi Yohane dimbísó ɔbéé, ɔdáa mu asón ɔkan. (Ali bré ámuto á, Pontio Pilato dé Yudea ɔmású gyí. Herode dé Galilea ɔmású gyí. Herode mu dehen Filipo é dé Iturea pú Trakoniti ɔmású gyí, Lisania é dé Abilene ɔmású gyí. Bulu igyí ahapó dehen ání bubu inu ali bré ámuto é gyí Hana mba Kaiafa.) ³ Mú su Yohane léki Yordan bunkpa onó, ɔde ɔkan da blí

ᾠέε, “Mlɔdamli klɔntɔ, amlisi lakpan bwe. Bulu osikie mli, ambɔ mli asú.”

⁴ Bulu ɔnɔsú ɔtɔ́pó Yesaia lówanlín Yohane iwɔ asún wá mu ɔwɔlótó ᾠέε,

“Ɔkɔ dékplɔn dimbísú ᾠέε,

‘Mlɔla anɔ Wíe ɔkpa.

Mlɔtswii ikpa ha mu!

⁵ Mlɔtin bunƙpa kugyíkɔ, amlɔbwiebwie abɔ múa nkúku fée.

Mlɔtswíi ikpa,

amlɔla músú wankláán.

⁶ Ahá fée bówun Bulu nkpahó.’ ”

⁷ Ɔɔɔm beba Yohane wá beε, ᾠó amó asú. Ɔlefíté amɔ ᾠέε, “Abε abí-aná, ntɔ gyá mli, mlɔsrí Bulu ɔsubítí ámúú íbá ámu? ⁸ Mómú mlɔswie abí oduá íbósuná ání lélé mlɔladámlí klɔntɔ. Mlɔmákɔ mlɔaa, mli náin gyí Abraham. Nde mli bláa mbée, Bulu ᾠétalí há abwi ánfɔ íbédamlí Abraham abí-aná. ⁹ Séí á, Bulu lapó efé yi nyí-atsitsitɔ. Oyígýíoyí ání imoswie abi wankláán á, bókun mú dá, wá mú fée ogyá.”

¹⁰ Ɔɔɔm amɔ befité Yohane beε, “Ntɔ mεε abwée?”

¹¹ Yohane lébláa amó ᾠέε, “Fúá fubɔ atadiε anyɔ á, pɔ kule ha ɔhá ání ɔma kuku. Fúá fubɔ atogyihε é bwe mú alí.”

¹² Lampóo ahópɔ akɔ é beba asú ɔɔkpa. Befité Yohane beε, “Osunápó, ntɔ ilehián ání abóbwe?”

¹³ Yohane lébláa amó ᾠέε, “Mlɔmátswɔ dɔnká ahá. Mlɔhɔ tóá beε mlɔhó.”

¹⁴ Isá akɔpó akɔ é befité Yohane beε, “Anɔ é mé, ntɔ abwée?”

Yohane lébláa amó ᾠέε, “Mlɔmáɔ ɔwɔnlín swíi ɔhaa kóba, ntée wá afunu dɔnká ɔhaasɔ. Mli akatua igyí mli ansí.”

15 Iniá amó ansí dɪn Kristo amɔsɔ, bɔdɛ mu ɔkpa kí sɔ á, ɪmɔwánkí amó ní Yohane gyí Kristo amɔ. 16 Mú sɔ Yohane lébláa amó ɔbéɛ, “Ɔkɔá ɔdɔn mi bu ɔma ɔbá. Mmɔfɔn ání nésankí mu ntɔkɔta ɔfé kóráá. Mí mú á, ntsu ndɛpɔbó mli asú. Mu ɔbɔpu Ɔɲɛ Wankíhé pú ogyá bó mli asú ní. 17 Ɔdɛ mu ɪlín, ɔbɔpɔfúní ntéte lé ayó ámɔtɔ. Ɔbékpa ayó ámu wá mu odudutɔ. Táme ɔbéféi ofuníkpa ɪnu wankláán, kpá ntéte amɔ wá ogyá ání ɪtamaduntɔ.” 18 Yohane léda asɔn wankláán ámu ɔkan, bláa ahá ámu asún tsɔtsɔtsɔ ɔbéɛ, bɔdámli klɔntɔ.

19 Ɔsɔ ogyípú Herode laswí mu dɛhen Filipo mu ka Herodia tsía, trá bwe lalahe tsɔtsɔtsɔ tsía mútɔ. Mú sɔ Yohane lékiná há mu. 20 Múá ɪdɔn kóráá gyí, Herode léha bekítá Yohane wá obu.

Yesu Asúbɔ

(Mateo 3:13-17; Marko 1:9-11)

21 Bréá Yohane dé ahá ámu asú bɔ á, Yesu é léba, Yohane lóbɔ mu asú. Bréá Yesu dé mpái bɔ á, nɔwɔlótáa lefinkí, 22 Ɔɲɛ Wankíhé lédamli fé abrɔdɔma, kpí bogyonká mɔsɔ. Ɔme ku lotsu ɔsósó ɔbéɛ, “Fúgyí mí bíá ntɔdwé, mi ansí tɛhíé gyi fú ɪwɪ ní.”

Yesu Anɔ́n Ɔlɪntɔ

(Mateo 1:1-17)

23 Bréá Yesu lóhɔ fé nfi adɔasa á, olefi Bulu asún ɔkanda asɪ. Ahá mú bɔyin ání Yosef mu bi ní. Yosef mu sɪ gyí Eli. 24 Eli mu sɪ gyí Martat. Martat mu sɪ gyí Lewi. Lewi mu sɪ gyí Melki. Melki mu sɪ gyí Yanai. Yanai mu sɪ gyí Yosef. 25 Yosef mu sɪ gyí Martatia. Martatia mu sɪ gyí Amos. Amos mu sɪ gyí Nahum. Nahum mu sɪ gyí Hesli. Hesli mu sɪ gyí Nagai. 26 Nagai mu sɪ gyí Mahat. Mahat mu sɪ gyí

Martatia. Martatia mᵛ sɪ gyí Semein. Semein mᵛ sɪ gyí Yosek. Yosek mᵛ sɪ gyí Yoda. ²⁷ Yoda mᵛ sɪ gyí Yohanan. Yohanan mᵛ sɪ gyí Resa. Resa mᵛ sɪ gyí Serubabel. Serubabel mᵛ sɪ gyí Sealtiel. Sealtiel mᵛ sɪ gyí Neri. ²⁸ Neri mᵛ sɪ gyí Melki. Melki mᵛ sɪ gyí Adi. Adi mᵛ sɪ gyí Kosam. Kosam mᵛ sɪ gyí Elmadam. Elmadam mᵛ sɪ gyí Er. ²⁹ Er mᵛ sɪ gyí Yosua. Yosua mᵛ sɪ gyí Elieser. Elieser mᵛ sɪ gyí Yorim. Yorim mᵛ sɪ gyí Martat. Martat mᵛ sɪ gyí Lewi. ³⁰ Lewi mᵛ sɪ gyí Simeon. Simeon mᵛ sɪ gyí Yuda. Yuda mᵛ sɪ gyí Yosef. Yosef mᵛ sɪ gyí Yonam. Yonam mᵛ sɪ gyí Eliakim. ³¹ Eliakim mᵛ sɪ gyí Melea. Melea mᵛ sɪ gyí Mena. Mena mᵛ sɪ gyí Martata. Martata mᵛ sɪ gyí Natan. Natan mᵛ sɪ gyí Owíe Dawid. ³² Owíe Dawid mᵛ sɪ gyí Yisai. Yisai mᵛ sɪ gyí Obed. Obed mᵛ sɪ gyí Boas. Boas mᵛ sɪ gyí Salmon. Salmon mᵛ sɪ gyí Nahson. ³³ Nahson mᵛ sɪ gyí Aminadab. Aminadab mᵛ sɪ gyí Admin. Admin mᵛ sɪ gyí Arni. Arni mᵛ sɪ gyí Hesron. Hesron mᵛ sɪ gyí Peres. Peres mᵛ sɪ gyí Yuda. ³⁴ Yuda mᵛ sɪ gyí Yakob. Yakob mᵛ sɪ gyí Isak. Isak mᵛ sɪ gyí Abraham. Abraham mᵛ sɪ gyí Tera. Tera mᵛ sɪ gyí Nahor. ³⁵ Nahor mᵛ sɪ gyí Serug. Serug mᵛ sɪ gyí Reu. Reu mᵛ sɪ gyí Peleg. Peleg mᵛ sɪ gyí Eber. Eber mᵛ sɪ gyí Sala. ³⁶ Sala mᵛ sɪ gyí Kainan. Kainan mᵛ sɪ gyí Arfaksad. Arfaksad mᵛ sɪ gyí Sem. Sem mᵛ sɪ gyí Noa, Noa é mᵛ sɪ gyí Lamek. ³⁷ Lamek mᵛ sɪ gyí Metusela. Metusela mᵛ sɪ gyí Enok. Enok mᵛ sɪ gyí Yared. Yared mᵛ sɪ gyí Mehalaleel. Mehalaleel mᵛ sɪ gyí Kenan. ³⁸ Kenan mᵛ sɪ gyí Enos. Enos mᵛ sɪ gyí Set. Set mᵛ sɪ gyí Adam. Adam é mᵛ sɪ gyí Bulu.

4

Yesu Isóki

(Mateo 4:1-11; Marko 1:12-13)

¹ Bréá Yesu léyinkí tsú Yordan ntsu onó á, Ɖɛ Wankíhé lɔbulá mutɔ, ɔlekpa mu ya dimbísó. ² Bréá ɔbu inu á, Ɖɔbunsám létsiá bɔsɔ mu ki nke advana kéké. Yesu mégyíi tɔtɔ nke ámutɔ fée. Mú su bréá nke ámu ɔlɔmɔ onó á, akón híé de mu.

³ Inu Ɖɔbunsám lébláa mu ɔbéé, “Ní Bulu mu Bi fɔgyi á, mómó ha ibwi ánfɔ ɔdamli bodobodo.”

⁴ Yesu lélé mú onó ɔbéé, “Bɔwanlín wá Bulu asón ámutɔ bɛɛ, ‘Megyí atogyihɛ wɔlɛ nyankpɔsa ogyíi tsia nkpa.’ ”

⁵ Ɖɔbunsám lópu mu ya ɔbu fúáhé kɔsu. Olosuná mu ɔyító iwíe ogyíkpa fée ɔtsáwɔlɛ pé. ⁶ Mú ɔlɛbláa mu ɔbéé, “Nópu ɔmá ánfɔ fée túmi pó amó numnyam há fú, tsúfé mí ɔbitɔ bapówá. Ɖhá ání ndeklɛ a, mu nópuhá. ⁷ Mú su ní fosúm mí á, nópu mú fée há fú.”

⁸ Yesu lébláa mu ɔbéé, “Bɔwanlín wá Bulu asón ámutɔ bɛɛ, ‘Da akpawunu ha fú Wíe Bulu. Mu nkɔlɛ fɔ súm.’ ”

⁹ Ɖɔbunsám lékpa mu ya Yerusalem, ɔlɔpu mu yélí Bulu ɔtswékpa obu ámu ɔtántra. Inu ɔlɛbláa Yesu ɔbéé, “Ní Bulu mu Bi fúgyi lélé á, tu kpayi. ¹⁰ Tsúfé bɔwanlín wá Bulu asón ámutɔ bɛɛ, ‘Bulu ɔbéha mu abɔpu békɔ fɔsu. ¹¹ Békpatá fú ɔbitɔ, ménɔ fú yabi méeda ibwi kɔkɔsu.’ ”

¹² Yesu lélé mú onó ɔbéé, “Bɛtrá wanlín bɛɛ, ‘Mákapó fú Wíe Bulu kí.’ ”

¹³ Bréá Ɖɔbunsám lómɔ ɔsókɔ anfi fée onó á, ɔlɔku náti sí mu asa.

Yesu Gyumagyihɛ Asítsuá Galilea Ɖmátó

(Mateo 4:12-17; Marko 1:14-15)

14 Ɔɲe Wankíhé túmi lekpa Yesu, oleyinkí yó Galilea ɔmátó. Mv iwɪ asún lekléi wa ɔmá ámv fээ́tó.
 15 Oletsia súná ató Yudafo ofiakpa, ahá ámv fээ́ bekanfó mv.

*Buməho Yesu Mv Wúluto
 (Mateo 13:53-58; Marko 6:1-6)*

16 Inu Yesu léyinkí bá Nasaret, ɔtínéá oletsia dan. Fé alhá otetsia bwe á, ɔɔyɔ Yudafo ofiakpa ɔkpónó ɔdaké. Bréá ɔɔkɔsú yélu amó ansító ɔbékla Bulu asún á, 17 botsu Bulu ɔnósú ɔtɔipú Yesaia ɔwoló há mv. Ɖlesankí mú á, olowun ɔtinekúá bəwanlín wá beɛ,

18 “Ani Wíe Bulu ladá mí ofúli.

Ini sv mv Ɖɲé bv misv.

Alalé mí ɔbéɛ, ndáa ason wankláán ámv ɔkan suna ahá ání buma tətə.

Ɖbéɛ, mbébláa nkpábi mbéɛ, masí amó iwɪ há amó.

Mí ambla ansibi abwiepó mbéɛ, mabwíí amó ansíbi.

Ɖbéɛ mbébláa ahá ání buɔe amó ipiantə wa é mbéɛ, malé amó ipiantə.

19 Fówun mí ambli mbéɛ,
 ani Wíe ahá nwewúunbi lafon.”

20 Inu olokuntá ɔwoló ámv, yínkia ha mósú ɔkípu, ɔɔwɔí tía asi. Ahá amóú bubu ofiakpa inu ámv fээ́ besi buɔe mv kí díín. 21 Inu Yesu lébláa amó ɔbéɛ, “Nɔe, Bulu ason wanlínhé anfi laba mótó. Mú mlilanú á.”

22 Ahá ámv fээ́ bonu ason wankláán amóú ɪɛdali mv ɔnó ámv. Ɖnó lobwie amó, befité beɛ, “Megyí Yosef mv bi ámv ni?”

23 Yesu lébláa amó ɔbéɛ, “Nyin ání mléha mí yébi anfi mlíaa, ‘Ilo ɔtsapó, tsa fú iwɪ!’ Mlélabláa mɪ

mliaa, ‘Bwe ató á móú anlanú á ní fúdebwε Kaper-
naum amu fú wúluta nfi é.’ ” ²⁴ Inu oleyinkí bláa
amú obéε, “Onakwalí nde mli bláa. Butamahó Bulu
onósú otáíró okuku asón mu wúluta.

²⁵ “Mlunu, Bulu onósú otáíró Elia bísú á, nyankpu
mótswie nfinisa móa ifun kéké. Akón lehie ba Israel
omátó fée. Ibo mótó á ní asurapu tsotsotsó betsiá Is-
rael omátó alí bré ámota, ²⁶ táme Bulu méha Elia oyo
amótó okuku wá. Osurapu okuá obu Sarefat wúluta,
Sidon omátó nkole wá oheha mu oloyo. ²⁷ Ilo pepe
alópú tsotsotsó é betsiá Israel omátó Bulu onósú
otáíró Elisa bísú. Táme omeha okuku iwí meplí, don
Naaman á ní otsú Siria nkole.”

²⁸ Obló lehie kítá ahá á móú bubu ofiakpa inu ámu,
bréá bonu Yesu asun blíhé anfi. ²⁹ Bokusú gya mu
dáli amú wúluta. Wúlu amu idin busu. Begya
mu alu yówie wúlu amu onó, beε abuwuta mu wa
tsonkolitó. ³⁰ Yesu lénatí tsun amótó yó otínéá oyo.

Yesu Oje Laláhe Gyáa *(Marko 1:21-28)*

³¹ Inu Yesu lékplí yó Kapernaum, Galilea wúlu
kuta. Olosuná amú ató amú ofiakpa okpónú odaké.

³² Mu atosunáhé lobwie amú onó, tsúfé olosuná
amú ató túmisu. ³³ Oyin oku bu ofiakpa inu, oje
láláhe bu musu. Oklplón blí obéε, ³⁴ “Kí mí! Yesu
Nasaretyin, amansu bu ania funyo nsiné? Ntee aní
ohikpá feba lóó? Nyin oha oduá fúgyi. Fúgyí Bulu
Oha Wankíhé amu ní!”

³⁵ Yesu lóklplon wa oje ámu obéε, “Kpa onó bun,
afudali muta.” Inu oje láláhe amu léfin oyin ámu dá
ahá ámota inu, dali muta. Tota mabwε mu.

³⁶ Onó lobwie amú fée, befité aba beε, “Amansu ní?
Oyin anfi bu túmi, odeklplón wa oje láláhe, ide mu

bu, dáli ahátò?” ³⁷ Mu iwí asón lekléí wá òmá ámu fèéító.

Aləpυ Tsətsəətsə Tsa

(Mateo 8:14-17; Marko 1:29-34)

³⁸ Yesu lédali Yudafò ofiakpa inu yó Simon wóyító. Ɖəyò á, owísó lakítá Simon mu sia tsíhé, òda kínkíínkín. Bebláa Yesu beε, ogyíi mu buale.

³⁹ Yesu lókpυkpé tó ətsi ámu, ələkpłón wa owísó ámu əbée, ikósυ musυ. Inuνυ iləksú musυ, ətsi ámu lóksú bwé amú afóító.

⁴⁰ Bréá owí deta á, ahá bəsurá amú ahá ání bude ilə ətsan-ətsan lə ba, Yesu lópv ibi dínká amósú tsá amótó okugyíəkv ilə. ⁴¹ Ɖhe laláhe bu amótó akvə. Yesu lókpłv wa əhe laláhe amυ. Bedali, bude okitikíti beε, “Fógyí Bulu mu Bi ámu nı.”

Táme Yesu lówa mbla wá əhe laláhe amυ ání bumátóí, tsúfé buyin ání mvgyí Kristo, (əhá amú Bulu ladá mu ofúli amυ) nı.

Bulu Asón Ɖkanda Yudafò Ofiakpa

(Marko 1:35-39)

⁴² Mú əyi kehe bake a, Yesu lédali wúlu amotə yó itsétó ətinekv. Ahá bodunká mu alu yótu mu, bokokóli mu beε əmánatí sí amú. ⁴³ Táme əlebláa amú əbée, “Ilehián ání néda Bulu iwíegyí iwí asvñ wankláán ámu əkan awúlu atráhe amυ ésó. Tsúfé mú əbwεkpá Bulu lówa mí ní.”

⁴⁴ Inı sv oleki Yudea əmátó fée, dá Bulu asvñ wankláán amυ əkan amú ofiakpa.

5

Yesu Akasípó Gyankpapv Tı

(Mateo 4:18-22; Marko 1:16-20)

1 Εκε οκν Yesu líi Genesaret paati* ονό, ahá tsatsəɔtsə beba boputá mu ání bónu Bulu asón. 2 Olowun nklɔn anyə paati ámu ονό. Aye alepú ámu bakplí yó buɔe amú asawutə da. 3 Yesu lóɔv wíe kuleá igyi Simon klétə. Múv əlebláa Simon əbée, osún mú kpalobí dɔnka ntsusu. Inu oletsiá mótó súná ahá ámu ató.

4 Bréá ələtóí tá á, əlebláa Simon əbée, “Mlɔpla əklɔn amv ya okluklúkpa, amliyətswi asawu le aye.”

5 Múv Simon lébláa mu əbée, “Owíe, anilóbwe kásián igye onyé féé, anuménya tətə. Táme iníá féε ayó, sv nóyətswi asawu amv.” 6 Bréá bəyətswi asawu amv a, beε aye tsətsəɔtsə. Mú sv asawu amv lówa tití bi. 7 Inu bəbwe ibi tí amú agyómá ayəbá amúv bubv əklɔn nyəəsítə ámu beε buvbétsa amú. Beba betsa amú, beε aye amv búlá nklɔn anyə ámu dédéédé, ideklé ime. 8 Bréá Simon Petro lówun mú alí á, əleda akpawunu Yesu ayabitə, bláa mu əbée, “Mí Wíe, mákpukpé mantáa mi! Lakpan əbwepú ngyi.”

9 Tsúfé aye amúv balé ámu lówa muv mu aba ámu wánwan. 10 Alí kén lówa Sebedeo abí Yakobo muv Yohane, bugyi Simon agyómá ayəbá ámu é wánwan ní.

Múv Yesu lébláa Simon əbée, “Mánya ifú! Tsú ndε púya a, anyánkposá féle.” 11 Simon muv mu aba ámu benya plá nklɔn amv besi osubúnə alí, besi tógyító tswi, kplá buo Yesu.

*Ilə Pεpe Əlɔpú Əkn Tsa
(Mateo 8:1-4; Marko 1:40-45)*

* 5:1 Genesaret paati: Mú kén gyí Galilea əpu ni.

12 Eke aku Yesu bu wulu kusu, ilo pepe alapu aku lowun mu. Inu alabeda akpawunu, pu asokpi yi asoluta, kokoli mu abee, "Owie, ni fotsula a, fetali ha mi iwi bepli."

13 Yesu letinki ibi da mu, blaa mu abee, "Natsula, fu iwi ipli." Inonu ilo amu lena le mu iwi. 14 Inu Yesu lada mu ala abee, "Mabla zhaa. Nati laa afupu fu iwi yosuna Bulu igyi zhapu, afuha mu iwiyuratu amou Mose mbla losuna tsu ilo pepetsa iwi amu. Igyi adansi suna aha ani fu iwi lapli."

15 Tame Yesu iwi ason letra keli yo ntine dinka muso. Odam beba mu atosunahé onukpa, zsa amota alapu e ilo. 16 Tame oletsia dali amota bre ku yo dimbisu otineku mu nkule yobo mpa.

Tsukule Osinpu Tsa

(Mateo 9:1-8; Marko 2:1-12)

17 Eke aku Yesu de ato suna. Farisifo, Mose mbla asunapu akua botsu Galilea pu Yudea amatu pu Yerusalem beba betsia asi unu. Bulu tumi bu Yesuto ha ilatsa. 18 Inu a, ayin aku basura tsukule osinpu akpasu ba. Beklea bapu mu wije woyito, pu mu tswi Yesu ansito. 19 Odam amu su bumenya akpa. Inu su boyodu obu amu awunso, da mu otineku ti, bekplia akpa amu tswi aha amuta Yesu ansito unu. 20 Brea Yesu lowun ani baha mu gyi a, aleblaa tsukule osinpu amu abee, "Opio, nasi fu lakpan kie fu."

21 Mose mbla asunapu pu Farisifo amu bebli wa nwunta bee, "Ma gyi oyin anfi ode abususu bli anfi? Ma abetalu si lakpan kie aha dun Bulu nkule?"

22 Yesu lebi amu agywun. Mu su alefite amu abee, "Ntogyi so mlide inu odu gywin? 23 Momo lapan ha bli? 'Nasi fu lakpan kie fu.' loo, ntee 'Kusu tsu

fú akpa afonati? 24 Táme ndekléá mlibú ání mí, Nyankpusa-Mu-Bi ánfí mbu túmi òyí ánfítò sí ahá lakpan kíé amó.” Inu òlebláa tsukòle osínpu amu òbéé, “Nde fú bláa mbéé, kusu. Tsu fú akpa afonati yò wóyí!”

25 Inononon tsukòle osínpu amu lókusó líí amú fée ansítò, tsú mu akpa, òòpu òkpa òyò wóyí òde Bulu kanfó. 26 Onò lobwie ahá ámu fée. Ifú lowie amó féeótò, bekanfó Bulu beé, “Nde anilawun ofúla!”

Lewi Ti

(Mateo 9:9-13; Marko 2:13-17)

27 Mú òma bréá Yesu lédalí inu á, olowun lampóo òhòpu òkòá butetí mu Lewi, tsie mu lampóo òhòkpa. Yesu lébláa mu òbéé, “Bobuo mi.” 28 Inu Lewi lókusó, sí mu tógyítò òmagyáa, yóbuo mu.

29 Mú òma a, Lewi lótswi òpúnú mu wóyítò há Yesu. Lampóo ahòpu tsòtsòtsò pú aha bambá é beba ató ámu ogyíkpa. 30 Farisifò pú Mose mbla asunápú ání bubu Farisifò ámutò befité Yesu akasípú amu beé, “Ntogyi sù mlia lampóo ahòpu pú lakpan abwepú mlidé ibi wa gyi ató, mlidé ntá nú?”

31 Yesu léle mú onò òbéé, “Alòpu léhián ilo òtsapò, megyí ahá ání iwí bu amú onlin. 32 Mmèba aha wankláán òtikpá. Mboun lakpan abwepú òtikpá neba, ménì bédamlí klòntò.”

Onóklí Iwí Asun Fitéhé

(Mateo 9:14-17; Marko 2:18-22)

33 Aha aku bebláa Yesu beé, “Asú Òòpò Yohane akasípú butetsiá klí onò bó mpáí. Farisifò akasípú é butòbwé alí, támé fú akasípú mú bodegyí, budenúu.”

34 Yesu léfité amú òbéé, “Òtsi òkpaínpu anyawie béklí onò bréá òbu amú wá? Ekèkèkèkè! 35 Táme èkè

okv béba ání békpa mv náti sí amó. Alí nke ámotò békli onó ní.”

³⁶ Inu oloha amó yébi obéé, “Ohaa tamapó tati pòpwe tan tati dada. Ní obwé mú alí á, alayíntá pòpwe amu, pòpwe amu pó dada amu ansí é iméekanáa aba. ³⁷ Alí kén butamapó nta pòpwe wá owulò-kpákpá kente wuhétó ní. Nta pòpwe amu ibófu fá kente amu tsítsá, yíntá kente amu é. ³⁸ Inu su owulò-kpákpá kente pòpwetò bótópó nta pòpwe wá. ³⁹ Ohaa tamafíté nta pòpwesù bréá alanu dánhe. Tsúfé otebli obéé, ‘Idánhe amu bu alé dun.’ ”

6

Okpónú Odaké Mv Wie

(Mateo 12:1-8; Marko 2:23-28)

¹ Yesu mva mv akasípú bòtsun ayó ndò kutò okpónú odaké. Mv akasípú amu bòpròsun ató-abí ámu kv, bòpusáa mú wí. ² Farisifò ámu aku befíté amó beé, “Ntogyi só mlidé tóá aní mbla meha okpa ání bubwéé okpónú odaké bwe?”

³ Yesu léfíté amó obéé, “Mlímókókla nu tóá Owíe Dawid lóbwe bréá akón de mva mv abúorpu kí? ⁴ Olebitíwíé Bulu osúmka yótsu bodobodoá bapóhá Bulu igyí ba, mva mv abúorpu amu begyí. Bulu igyí ahapó nkole bele okpa bótegyi alí bodobodo amu.”

⁵ Mú Yesu olomò mv asún onó obéé, “Mí, Nyankpusa-Mv-Bi ánfí gyí okpónú odaké mv wie.”

Ilòtsa Okpónú Odaké

(Mateo 12:9-14; Marko 3:1-6)

⁶ Yesu lóyo ató osunákpá Yudafò ofiakpaokpónú odaké bámbá. Oyin okvá mv gyòpí ibi lawú bu unu.

⁷ Mose mbla asunápú pó Farisifò aku bete Yesu kí

bεε, εβέτσα ιλο εκπόνου εδακέ, μένι βένυα μου ιτω ασόν, πύγένατί μουσιν σúnά anhandε. ⁸ Yesu yin amú nwuntó asón. Mú su ελεβλάα oyin ámúú μου ιβι kule lawú ámu εβέε, “Kusu belí amú ansító nfi.” Inu oyin ámu lókusu belí amú ansító. ⁹ Múú Yesu lébláa amú εβέε, “Nde mli fité, ntó mbla ámu léha εkpa ání abwée εκπόνου εδακέ? Yilé lóó, ntée lalahε? Ahóo εha nkpa lóó, ntée amóo μου?” ¹⁰ Inu εledamlí ki amú fée fiá. Múú ελεβλάα oyin ámu εβέε, “Tinkí fú ιβι amú.” Olenya tinkí ιβι amú ali pé, εηέ lowie mótó.

¹¹ Obló lekítá amú, befité aba bεε, “Ntó kóún abéhiε bwé Yesu anfi?”

Akasípú Amú Adá

(Mateo 10:1-4; Marko 3:13-19)

¹² Eke εku Yesu lódu yó ιβusu yóbo mpái há Bulu tsú onyé yéha εyi kehe. ¹³ Mú εyi kehe a, εleti μου akasípú, εlele amótó dúanyó, εleti amú μου sumbí ayεpú. ¹⁴ Amúgyí, Simon ání εledunká μου Petro mua μου pio Andrea; Yakobo mua Yohane; Filipino, Bartolomeo, ¹⁵ Mateo, Toma, Alfeo μου bi Yakobo, Simon ání ogyi ιwisotsiá adunkápú εpasuató εha; ¹⁶ Yakobo εku μου bi Yuda pú Yuda Iskariot ání εlebele Yesu há.

Yesu Atósundá Múa Ilo Tsa

(Mateo 4:23-25)

¹⁷ Yesu mua sumbí ayεpú ámu beklí tsú ιbu ámusu ba εsulúu tantasu. Mú abúopu tsatsótsó pú εdóm kponkponkrontiá botsú Yudea εmátó, Yerusalem pú εpu εnó awúlu Tiro múa Sidonsu beba ιnu. ¹⁸ Beba beε bebá bonu μου asun blíhé, εtsa amú ιlo. Ahá ání εηε laláhe de amú háan é beba, olegya εηε laláhe lé amótó. ¹⁹ Amú fée bekleá bópu ιβι da μου, tsúfé εηé dedali mué, εletsa amú fée ιlo.

Oyúla Asón
(Mateo 5:1-12)

²⁰ Yesu lótsu ansí k_i mu akasípó, o_lebláa amó obée,
“Bulu layúlá mlhá mlímá t_ot_o,
tsúf_é mlíbó mu iwíegyí amu ní.

²¹ Bulu layúlá mlhá akón de mli séi,
tsúf_é mléba begyi mwe.

Bulu layúlá mlhá mlídésú séi,
tsúf_é mléba b_om_osí.

²² “Bulu layúlá mlhá bu_de mli lu, bu_de mli gyáa le
amótó, síá mli, tí mli ida laláhe mí, Nyankpusa-Mu-
Bi ánf_i su. ²³ Ansí igyí mli eke ámu, amlifuli kpayi
ansigyísó, tsúf_é mli ik_oká t_o o_ssú. Alí amó anáin
b_obwe Bulu o_nósú atáíró amu ní.

²⁴ Táme mli ání mlilanyá iw_i séi, mligy_owi ní.
Tsúf_é mli ansigyí f_éé mlilanyá á.

²⁵ Mli ání mlilamwé séi, mligy_owi ní.
Tsúf_é akón béba bekítá mli.

Mli ání mlídém_osí séi, mligy_owi ní.
Tsúf_é mléba begyi aw_ireh_o, su.

²⁶ “Mli ání ahá f_éé bu_de mli kanfó, mligy_owi, tsúf_é
alí mli anáin bekanfó Bulu o_nósú atáíró afunupu
amu é ní.

Alupódwe
(Mateo 5:38-48; 7:12a)

²⁷ “Táme nde mli ání mlónu bláa mbée, Mlidwe
mli alupó, amlibwe yilé ha amó. ²⁸ Mliyula ahá ání
but_olwí mli, amlib_o mpáí ha ahá ání butesiá mli.

²⁹ Ní oha o_dá f_ó is_ut_o a, damli ny_oo_si é ha mu o_da.
Ní o_kv o_swíí f_ó tati á, w_oi f_ó atadi_e é ha mu. ³⁰ Ní o_kv
o_kólí f_ó ató á, ha mu. Ní o_kv é otsú f_ó ató á, máyóh_o
mó. ³¹ Bwe ha ahá ahá f_odeklé f_ee bubwée ha fu.

32 “Ní fú adwepó nkole futədwé á, ipán məmυ fénya? Lakpan abwepó kóráá butədwé amú adwepó. 33 Ní əhá ání ətəbwé yilé há fú nkole fútəbwé yilé há á, ntogyi só Bulu ədáa fú ipán? Lakpan abwepó é butəbwé ali. 34 Ní əhá ání fuyin ání obénya há fú nkole futəhá ipán a, ntogyi só Bulu ədáa fú ipán? Lakpan abwepó óó butəpó ató pan amú aba, yínkí hə mú ali. 35 Mú sυ mludwe mli alupó, mli bwe yilé ha amú, mli pan amú ató, mli máti amú akə, ménι Bulu əbéka mli ikə tsətsətsə. Fówun mlilabwé Ɔsúsúbsú Bulu ámυ abí. Tsúfé əbυ awitəle há ahá ání ató tamagyi amú ansí pú aha laláhe féé. 36 Mli bwe nwe awúnpu fé aliá mli Sí Bulu gyí nwe owúnpu.

Ilále

(Mateo 7:1-5)

37 “Mli mále ahá ilá, ménι Bulu méele mli ilá. Mli máha əhaa ipón, ménι Bulu é əméəha mli pón. Mli si mli aba ilá kie amú, Bulu osi mli klé kie mli. 38 Mli ha ahá tóá de amú hián, Bulu əbélahá mli. Ɔbópυ atə susúhe wankláán wá mú, wósúv mú, silá mú, ibóbulá tsítsá há mli. Tsúfé tóá fəpósúsu ha fú bá á, mú kén Bulu əbópυsúsu ha fυ ní.”

39 Yesu létrá ha amú yébi əbéé, “Nsibi obwiepó əbétalí kpá nsibi obwiepó? Amú féé bυméekpa wíé əbótó? 40 Ɔkasípó tamadυn mυ wie, táme əkasípó əkásí bí á, ətəbwé fé mυ wie.

41 “Ntogyi só fúde ipí túkúríibi wúun fú bá nsíbisυ, táme fumedé ogyakpatín ání idin fú klésυ mú wúun? 42 Ntéé ntogyi só fúde fú bá bláa fεε, ‘Mí píó, ha mí andinkí ipí fú nsíbisυ’, táme fumedé ogyakpatín ání idin fú klésυ mú wun? Apinabwəbí əbwepó, gyankpa dinkí ogyakpatín ámυ fú nsíbisυ,

ménu fówun ató wankláán, tálí dínkí ipí ámu fú bá klésu.

Oyi Pó Mú Abi Swiehé
(Mateo 7:6-20; 12:33-35)

⁴³ “Oyi wankláán méetalí swié abi laláhe. Alí kén oyi laláhe é méetalí swié abi wankláán ní. ⁴⁴ Tsúfé oyi-ibí butapúbí mú. Butamakpótí kankaba okplóto oyísó, butamakpótí tsokpon é tunkpa iflasu. ⁴⁵ Oha wankláán telé tsiátó wankláán owan tsú mu klontó, oha laláhe é telé tsiátó laláhe owan tsú mu klontó. Tsúfé tóá idun oha klun a, mótédálí tsu mu onó.

Butásó pú Osublúto Obuyii
(Mateo 7:24-27)

⁴⁶ “Ntogyi só mlidé mí ti mlíaa, ‘Mí Wíé! Mí Wíé!’ táme mlitamagyi mí asun blíhésó? ⁴⁷ Nósuná mli alá oha ání oeba mí wá bonu mí asón, gyi dínká mósó gyí. ⁴⁸ Ogyi fé oha ání obá beyi obu á, olegyankpá kwí mú ntswiasí obó yótu butá, olowa ntswiasí ámu dínká mósó. Bréá ntsu lóbulá kítá mú á, imetalí kpínkí obu ámu, tsúfé oleyi mú wankláán. ⁴⁹ Táme ohagyíoha ání olonu mí asun blíhé, omegyi mósó gyí fé oha ání oleyi mu obu osulúsu keke, omowa mú ntswiasí. Bréá ntsu lóbulá wa mú á, ilobwie dá gbloo inonu, yíntá féé!”

7

Romafó Isá Akápú Ohande Osúmpú Oku Ilo Tsa
(Mateo 8:5-13; Yohane 4:43-54)

¹ Bréá Yesu lébláa ahá ámu asón ánfí féé tá á, oloyo Kapernaum wúluto. ² Romafó isá akápú ohande oku bu inu. Obo osúmpú okuá otehié kle mu asón. Osúmpú amu déló, odeklé owu. ³ Bréá isá akápú

ɔhande amu lónu Yesu nka á, ɔlɔwa Yudafo ahande aku sísi Yesu ɔbéε, buyókokóli mu ɔbeta mu osúmpú amu ilo ha mu. ⁴ Ahande amu behie kókóli Yesu bee, “Abwíi ipa, ní ɔku léhián fú mbua á, mómó oyin ánfí ní! ⁵ Tsúfé ɔtɔdwé aní pi. Mbléyi aní ofiakpa kóráá há aní ní.”

⁶ Mú su Yesu mba amónyɔ bɔpu ɔkpa. Bréá beta wóyí ámɔtɔ wie tá á, isá akɔpú ɔhande amu lówa mu anyawie ɔbéε buyéfiá Yesu, abubla mu bee, mbée, “Owíé! Máhan fú iwí, tsúfé mmɔfon ání féba mí wóyító. ⁷ Nawun ání mí é mmɔfon ání néba fú wá. Fú mú bli asvanku, iwí bówa mí osúmpú amu ɔnlín. ⁸ Tsúfé mí é mbu ahande aku asi. Isá akɔpú aku é bubu mí asi. Nelé ɔnó mbée amótó ɔku ɔnátí á, ɔtenátí. Ní mbée ɔbá é á, ɔteba. Tógyítóá nebláa mí osúmpú mbée ɔbwée á, ɔtɔbwé.”

⁹ Bréá Yesu lónu asún ánfí á, ɔnó lobwie mu, ɔledamlí bláa ɔɔm amú bú bubuo mu amu ɔbéε, “Ɔnɔkwali asún, nde mlí bláa, mmɔkówun ɔhá ání ɔbu hógyi kpɔnkpɔntí ánfí odu Israelfɔtɔ kóráá kí!”

¹⁰ Bréá abɔpu amú bú isá akɔpú ɔhande amu lówa ámu beyinkí yó wóyító a, bowun ání osúmpú amu iwí lawá mu ɔnlín.

Ɔsurapu Ɔku Mu Bi Tsinki

¹¹ Imɔwa ɔpá kuku Yesu lóyɔ Nain wúlutɔ. Ɔɔm bubuo mba mu akasípú. ¹² Bréá olowie wúlu ɔnó á, ɔlɔtu aku, busun fúli akpasu bebá. Obi yinhé ɔkule pé ogyi há ɔsurapu ɔku. Ɔɔm kpɔnkpɔnkpɔntíá bɔtsú wúlu amɔtɔ é bubuo ɔtsí ámu. ¹³ Bréá aní Wie lówun ɔtsí ámu a, mu asún lówa mu nwe, ɔlebláa mu ɔbéε, “Másu!” ¹⁴ Múú ɔlɔyópu ibi da akpa amu, asurápú amu besi lí. Inu ɔlebláa fúli amu ɔbéε,

“Oyasubi, nde fú bláa mbéε, kusu!” ¹⁵ Inu fúli amu lókusú tsíá, wá tói bi. Yesu lópu mu wá mu yin ibitò.

¹⁶ Ifú lekítá ahá ámu fée, bekanfó Bulu beε, “Bulu labòbúá mu ahá! Mu onósú otáipú kponkponti oku lalin anitò!”

¹⁷ Yesu iwí asún ánfí leklei wá Yudea omá pú awúlu ání ibo nsiné inu féeótó.

*Yesu Mva Asú Ɖòpú Yohane
(Mateo 11:2-19)*

¹⁸ Asú Ɖòpú Yohane akasípú beyébláa mu asún ánfí fée. Mú su olowa amótó abanyó sísí Yesu òbéε, ¹⁹ buyéfité mu beε, “Fúgyí òhá ámúò òbéba amu ni, ntée akí òha bambá okpa?”

²⁰ Bréá ahá ámu beba bowie Yesu wá á, bebláa mu beε, “Asú Ɖòpú Yohane òbéε abéfíté fú aníaa, ‘Fúgyí òhá ámúò òbéba amu ni, ntée akí òha bambá okpa?’”

²¹ Yesu létta alòpu pú ahá ání iwí dé amó osin tsatsòtsò alí bré ámútò. Olegya òje laláhe lé ahátò, bwíí ansibi abwiepú tsatsòtsò é ansíbi. ²² Inu oléε Yohane akasípú asún ámu onó òbéε, “Mliyinki yebláa Yohane tóá mlilabowun pú móa mlilabonu. Mlilabowun ání ansibi abwiepú bude ató wúun, abò buna. Ilo pepe alòpú iwí deplí, isu atínpu bude asún nu. Afúli buketsinkí, ahíánfò é bude asun wankláán ámu nu. ²³ Bulu obóyulá òhá ání mí bwehé məkusú líí musu.”

²⁴ Bréá abí ámúò Yohane lówa sumbí ámu beyinkí báyó á, Yesu lówa tói tsú Yohane iwí súná odòm amu bi. Ɖbéε, “Bréá mlilédalí yo dimbísú inu á, ntò okíkpa mlílóyo? Fítáa ání afú de mó tsúun lóó? Ekekεεke! ²⁵ Ní megyí mó á, ntò kóún okíkpa mlílóyo? Ɖhá ání odídí ntsrim. Ekekεεke! Ahá

ání b̄t̄edídá tati ámu odu gyi ɔdwe á, awíe wóyí b̄t̄etsiá. ²⁶ Ml̄bla m̄! Bulu ɔ́n̄s̄ ɔ́t̄ɔ́p̄ ml̄lédal̄ yéki? Ee, Yohane ni. Ɔ́d̄on Bulu ɔ́n̄s̄ ɔ́t̄ɔ́p̄. ²⁷ M̄w̄i as̄n̄ Bulu lébl̄i b̄ɔ́wanl̄ín m̄ó tsw̄i b̄ee, ‘K̄i, nde obí wa gya f̄v̄ nkpá. M̄v̄ ɔ́b̄éla ɔ́kpa há f̄v̄ ní.’ ” ²⁸ Yesu l̄óȳo m̄v̄ as̄n̄s̄ ɔ́b̄ée, “Nde ml̄i bl̄áa mb̄ée, ɔ́hagyíɔ́ha ání ɔ́ha tsihé lak̄en kwí m̄óf̄v̄n m̄v̄, táme m̄v̄ é ɔ́m̄f̄v̄n Bulu iwíeḡyí ám̄t̄o ɔ́k̄v̄s̄ k̄óráá.”

²⁹ Aha ání bonu Yesu as̄n̄ áníf̄i p̄ó lamp̄óo ah̄óp̄v̄ k̄óráá bowun ání Bulu as̄n̄ da ɔ́kpa. Botsulá há Asú Ɔ́b̄ɔ́p̄ Yohane l̄óbo amó asú. ³⁰ Táme Farisif̄o p̄ó Mose m̄bla asunáp̄u am̄v̄ m̄ó b̄um̄eha Yohane ɔ́bo amó asú. Bekiná t̄óá Bulu léh̄ih̄íe ha amó b̄we.

³¹ Yesu l̄óȳo m̄v̄ as̄n̄s̄ ɔ́b̄ée, “Séi áníf̄i á, am̄end̄i n̄óp̄okáp̄o ndemba-abí áníf̄i? Nt̄o belian? ³² B̄ogyi fé nyebíá butsie d̄ins̄v̄ b̄ud̄e aba kpolí, bl̄i b̄ee, ‘An̄l̄apl̄éi ansigyís̄o, ml̄im̄étsa. M̄ó s̄v̄ an̄lawá aw̄ir̄eh̄o ɔ́v̄, táme ml̄im̄ósú.’ ³³ M̄l̄igyí fé nyebí áníf̄i, ts̄úfé Yohane léba á, oletsíá kl̄i ɔ́n̄o, omonu ntá, táme ml̄iaa, ‘Ɔ́h̄e laláhe b̄v̄ m̄t̄o!’ ³⁴ Mí, Nyankp̄v̄sa-M̄-Bi áníf̄i m̄ó naba nde at̄o gyí, nde ntá núu. M̄ó é ml̄iaa, ‘M̄l̄iki opotsuap̄v̄ p̄ó nta ɔ́b̄ɔ́p̄. Lakpan ab̄w̄ep̄o p̄ó lamp̄óo ah̄óp̄v̄ onyawíe.’ ³⁵ Táme ɔ́há ání ɔ́b̄v̄ Bulu nyánsa á, m̄v̄ ts̄iát̄o telé m̄ó ɔ́wan.”

Ɔ́tsi Lakpan Ɔ́b̄w̄ep̄o Ɔ́k̄v̄

³⁶ Farisiyin ɔ́k̄v̄ lét̄i Yesu at̄o ogyíkpá m̄v̄ wóyít̄o. Bréá Yesu tsie ɔ́p̄ón̄o ám̄v̄ as̄i á, ³⁷ ɔ́tsi ɔ́k̄v̄á ɔ́b̄v̄ w̄úlu am̄t̄o, ogyi lakpan ɔ́b̄w̄ep̄o lónu Yesu nka ání bats̄w̄i ɔ́p̄ón̄o há m̄v̄ Farisiyin am̄v̄ wóyít̄o. In̄v̄ olotsu m̄v̄ ofobí fánfán ání ɔ́v̄ bíá p̄rent̄v̄a wankl̄áán ɔ́bo ba in̄v̄. ³⁸ Ɔ́leb̄eda akpawunu Yesu ayabias̄i, ɔ́lekpa isú yi woo. Ɔ́b̄ɔ́p̄v̄ m̄v̄ ntsú fwí Yesu

ayabiasí, pọ̀ mu nwunso-imi tsítisi mó. Ọ̀lọ̀kolá Yesu ayabi pútá, tséí ofobí fánfán ámu wólí mu ayabiso. ³⁹ Bréá Farisiyin amó ọ̀letí Yesu amu lówun íni á, ọ̀leblí wá nwuntọ̀ ọ̀bée, “Ní Bulu ọ̀nósú ọ̀táípọ̀ oyin ánfí gyí lélé á, tẹ̀kí alawun ọ̀há oduá ọ̀tsí ánfí gyí asa ọ̀dẹ̀pẹ̀ ọ̀bẹ̀ da mu, tsúfẹ̀ lakpan ọ̀bwẹ̀pọ̀ ogyi.”

⁴⁰ Yesu lébláa oyin ámu ọ̀bée, “Simon, mbu asoanku bláa fu.”

Simon léfité mu ọ̀bée, “Osunápọ̀, amansu igyi? Bla mi.”

⁴¹ Yesu lébláa mu ọ̀bée, “Ahá abanyó aku bẹpan sika oyin ọ̀ku wá. Ọ̀kọ̀lé lépan bliba-anu (5,000,000), ọ̀kọ̀lé é lépan mpím lafanu (500,000)*. ⁴² Bumenyá kóba amu ká. Mó so oyin ámu lésikíé amó abanyó fée. Bla mi, amótọ̀ ọ̀mọ̀mu ọ̀bódwẹ̀ oyin ámu dọ̀n?”

⁴³ Simon lébláa mu ọ̀bée, “Nahogyiá ọ̀mọ̀amóú mu ikọ̀ tso dọ̀n amu.”

Yesu lébláa mu ọ̀bée, “Ọ̀nọ̀kwali igyi.” ⁴⁴ Inu Yesu léyinkí kí ọ̀tsí ámu, ọ̀lebláa Simon ọ̀bée, “Fawun ọ̀tsí ánfí? Nẹ̀ba fú wóyítọ̀ a, fọ̀mẹ̀ha mí ntsu anfwí ayabiasí. Táme ọ̀tsí ánfí mó lapọ̀ mu ntsú fwí mí ayabiasí, pọ̀ mu nwunso-imi tsítisi mó. ⁴⁵ Fọ̀mẹ̀latá mí pútá, táme tsú bréá nẹ̀ba nfí ọ̀pá á, ọ̀tsí ánfí mókósí mí ayabi kọ̀lá pútá. ⁴⁶ Fọ̀mẹ̀tséí ofobí wólí mí nwuntọ̀, táme mu mó alatséí ofobí fánfán wólí mí ayabiso. ⁴⁷ Mó so nde fú bláa mbée, ọ̀dwe tsọ̀tsọ̀tsọ̀ ánfí alalé súná mí ánfí idesuná ání Bulu lasí mu lakpan tsọ̀tsọ̀tsọ̀ ámu fée kíé mu. Táme ọ̀há ání Bulu osii lakpan kpalobí kíé á, ọ̀dwe kpalobí ọ̀telé súná.”

* **7:41** Sika ánfí igyi sika futútú lafanu (500) móa aduenu (50), igyi oha nke lafanu (500) móa aduenu (50) ikọ̀ká.

48 Inu Yesu lébláa ɔtsi ámu ɔbéε, “Nasi fú lakpan fée kíé fú.”

49 Ahá ámúú amúa Yesu botsie ɔpónúasi ámu, beblí wá nwuntɔ beε, “Ma gyí oyin ánfɪ ɔbéε muna mude ahá lakpan sikíé amú.”

50 Múú Yesu lébláa ɔtsi ámu ɔbéε, “Fú hógyi lahɔ fu nkpa. Natɪ iwilwiitɔ.”

8

Atsiá Bobuo Yesu

1-2 Imɔwa ɔpá kuku, Yesu léki awúlu múa nkuda asi, ɔde Bulu iwíegyi ámu iwi asun wankláán ɔkan da. Mu akasípú dúanyɔ ámu pú atsi akvá olegya ɔɣe laláhe lé amótó, tsá amú ɪɔ bobuo mu. Atsi ámu gyí, Magdalayintse Maria ání Yesu légya ɔɣe laláhe asienó lé mutɔ. 3 Owíe Herode wóyísú ɔkírɔ Kusa mu ka Yohana. ɔtsi ɔkvá butetɪ mu Susana pú atsi tsɔtsɔtsɔá betsiá pú amú ató kɪ Yesu mna mu akasípúsu.

Ató-abi Owunyápu Iwi Yébi

(Mateo 13:1-9; Marko 4:1-9)

4 Bréá ɔɔm kpɔnkpɔnkpɔntɪ botsu awúlu-awúlusu ba befia Yesu wá á, ɔleha amú yébi ɔbéε,

5 “ɔɔɔɔpɔ ɔku lóyɔ ató-abi owunyákpa. Bréá ɔde mú wunyáa a, ɪku lówólí ɔkpatɔ, ahá betsatsáa mósú, mbubwi é bɔtswetswée mú fée. 6 ɪku lówólí abutásó, ɔtínéá ɪsi kpalobí dɪn. ɪlɔwa ɔsa kwe, táme bréá owí lelɪn a, ɪlɔtɔ mú mós, tsúfé imenya ntsu.

7 Abí ámu ku lówólí awutɔ, awu ámu lɔbolá kítá mú, ɪmedan. 8 Abí ámu ku lówólí ɔsulúw wankláánsó, dan. ɪloswie abí tsɔtsɔtsɔ fé mú amúú olodu ámu odu tsé lafa.”

Yesu lómò mu asún onó obéé, “Ọhá ání ọbu asu onúu.”

Tóá Súd Yesu Lótáí Ayébisu
(*Mateo 13:10-17; Marko 4:10-12*)

⁹ Yesu akasípú befíté mu yébi anfi así. ¹⁰ Ọlebláa amú obéé, “Bulu lahá mli ọkpa obéé, mlibú mu iwíegyi ámu iwí asun ñáínhé. Táme nde aha bambá asún bláa ayébisu, ménì bówun, táme bómébi. Bónu, táme bómóonu mó así.

Ató-abí Owunyápu Yébi Amu Así
(*Mateo 13:18-23; Marko 4:13-20*)

¹¹ “Yébi amu así ní. Ató-abí ámu gyí Bulu asún. ¹² Abí ámúú ọ̀wólí ọ̀kpatọ́ ámu gyí ahá ání ọ̀tonú asún ámu, táme Ọ̀bunsám teba bele mó lé amú klonṭọ́, ménì bómáọ̀họ́ mósú gyi, fówun bénya nkpa ání itamatá. ¹³ Abí ámúú ọ̀wólí abutású amu gyí ahá ámúú bonú asún ámu pé, bahọ́ mó ansigyísú, táme buma nlin. Mó su ọ̀utamahogyi wa ọ̀pá. Ní isóki ku inyá tú amú pé, badida. ¹⁴ Abí ámúú ọ̀wólí awutọ́ ámu gyí ahá ání bonú asún ámu a, bahọ́ mó, táme ọ̀yí ánfító atọ́ hiánhe iwí gywíin, pú mótọ́ atonyahé iwí ansigyí tegyi asún ámuṣu. Iní su ọ̀tamaswíé abí dan. ¹⁵ Abí ámúú ọ̀wólí ọ̀sulúw wankláánsú ámu gyí ahá ámúú bonú asún ámu a, ọ̀tọ́họ́ mu wá klon wankláán ání itonú asún, gyi mósú́tọ́. Iní su ọ̀totomi swíé abí tsọ́tsọ́tsọ́.

Ọ̀kandíe Iwí Yébi
(*Marko 4:21-25*)

¹⁶ “Ọ̀haa tamanywé ọ̀kandíe pú atọ́ bun mósú, ntée pówá mpá ayasí. Ọ̀foákpá ọ̀tọ́pọ́bian, ménì ibówankí há ahá ání béba wóyí ámuṭọ́.

17 “Tsúfě tɔtɔ má ɪnɔ́á ɪbérɔ́áɪn, ɪméɪɪn ɔwan. Asun ɔ́áɪnhé kuku é ma ɪnɔ́á buméebi mú.

18 “Mlɪkɪ wankláán mlɪ asún-nutó. Tsúfě ɔhá ání odekléá obónu mí atosunáhé amv asi á, Bulu ɔ́bóɔv ɪkɔ tsía mótó há mv. Táme ɔhá ání omedékléá obónu mú asi á, Bulu ɔ́bóswí mv kpalobí ámú olosusúu ání alabí ámv kóráá.”

Yesu Abusuanfɔ Onutó

(Mateo 12:46-50; Marko 3:31-35)

19 Yesu mv yin mva mv apíó beba mv wá, táme ɔ́ɔm amv sv bumetalí wíé ba mv wá. 20 Ahá ámɔtɔ ɔkɔ lébláa Yesu ɔ́béé, “Fú yín mva fú apíó bulí kpankpá, budekléá bówun fv.”

21 Yesu lébláa amú ɔ́béé, “Mí yín mva mí apíó gyí ahá ání butonú Bulu asún ámv, gyi mósó.”

Atsufú Asɪbá

(Mateo 8:23-27; Marko 4:35-41)

22 Eké ɔkɔ Yesu lébláa mv akasípú ɔ́béé, “Mlɪha afa Galilea ɔ́vɔ yɔ́ mú ɔ́bɪn.” Mú sv bɔ́vɔ ɔ́kpa bɔ́yó.

23 Bréá bɔ́yó á, Yesu lédɪɪɪ. ɪnɔ́ afú kɔ́nkpɔ́nkpɔ́ntɪ kɔ́ lówa tsúun bɪ. Ntsu ámv ɪdeda wíé ɔ́klɔn amvɔ, ideklé ɪme. ɪɔ́tɔ amú ansí pɛpɛ. 24 Mú sv betsinkí Yesu, bláa mv beé, “Anɪ Wíe! Anɪdé ntsu wie!”

Yesu lókɔsú lé ɔ́nɔ́ wa afú móa ntsu ámv, ɪnɔ́ fěé lɔ́bá. 25 ɪnɔ́ ɔ́lefíté amú ɔ́béé, “Mlɪ hógyi me?”

Ifú lɛkítá amú, ɔ́nɔ́ lobwie amú, befíté aba beé, “Nyankpɔ́sa ɔ́mɔmv nɪ, alalé ɔ́nɔ́ wa afú móa ntsu kóráá, banú mv ɔ́me alɪ?”

ɔ́ɔe Laláɔe Gyáa Le Ogbedéptó

(Mateo 8:28-34; Marko 5:1-20)

26 Yesu muva mu akasípó befa ɔpu tsú Galilea yówie Geraséfɔ* ɔsolúsu. 27 Bréá Yesu dédalɩ ɔklɩn amɔtɔ á, oyin ɔkɩvá otsú wúlu amɔtɔ, ɔɛ laláɛ bu mɔtɔ lébefia mu. Oyin ánfɩ lékpa ató, tú dáli wóyító, yó otsie afúli opulákpá ilawá ɔpá. 28 Bréá olowun Yesu a, ɔlɔsɔrá okitikítɩ, dá akpawunu Yesu ayabitɔ, kplón blí ɔbéɛ, “Ɔsósóúsú Bulu mu Bi Yesu, amansu igyi? Kókoli, mápití mí ató.” 29 Alɩ bré ámɔtɔ á, Yesu lakplón wa ɔɛ laláɛ amu ɔbéɛ, idáli mɔtɔ dodo. Mú su oyin ámu lébli alɩ ní. Ɔɛ laláɛ amu itowíé mɔtɔ brégyíbré. Mú su butɔwá mu ibɩ pú mu ayabi ikan, gyo mu iwɩ. Mú óó á, otebíá ikan amu, ɔɛ laláɛ amu itehá mu ɔtesrí wíé aputu.

30 Inu Yesu léfité mu ɔbéɛ, “Nkálɩ butetí fú?”

Oyin ámu lélé mú ɔnó ɔbéɛ, “Mí dá gyí ‘Ɔɔɔm.’ ” Tsúfé ɔɛ laláɛ tsɔtsɔtsɔ bu mɔtɔ. 31 Ɔɛ laláɛ amu bokokóli Yesu ɔbéɛ, ɔmágya amú yówa ilán klúklúúklúá ima ɔkatɔ.†

32 Mprákuo tsɔtsɔtsɔ aku budegýí okúku kusɩ inu fón. Mú su ɔɛ laláɛ amu bokokóli Yesu beɛ, ɔhá abuyowie mprákuo ámɔtɔ. Ɔleha amú ɔkpa ɔbéɛ buyó. 33 Inunu bedalɩ oyin ámɔtɔ yówie mprákuo ámɔtɔ, amú féeɛ besrí kpákpí okúku amu wíé ɔputɔ, wúwu.

34 Bréá mprákuo akpapó ámu bowun tóá ilaba a, besrí yéblí asún ánfɩ wúlutɔ pú ɔmá ámɔtɔ. 35 Inu ahá beba beki tóá ilaba. Bowun ání oyin ámúú tekɩ ɔɛ laláɛ bubu mɔtɔ ámu ansító ladí, alawá atadie otsie Yesu wá. Ilowa amú ifú. 36 Ahá ámúú bowun itó ámúú ileba amu bebláa amú alá oyín ámúú ɔɛ laláɛ bubu mɔtɔ ámu lénya mu ilɔtsá. 37 Ɔmá ámɔtɔ

* 8:26 Gadarafɔ bu nwuló dada amu akotɔ.

† 8:31 Ilán klúklúúklúá ima ɔka gyí ɔɛ laláɛ isu ɔbitikpá.

ahá fээ bokokóli Yesu бее, адáli амó амátó, tsúfэ ifú lеhиe kítá amó. Mú sv Yesu lówie оklun amotо обее amonati. ³⁸ Oyin amóú текι оηε laláhe tsie mutо ámu lókokóli mu обее, “Ha mí ambuo fu yо.” Táme Yesu méha mu оkpa.

³⁹ Mbouín олеbláa mu обее, “Yinki yо wóyí, afuyеbláa mli pi toyiléá Bulu labwé há fú.”

Mú sv oyin ámu léki wúlu amu fээ fiá, оде toyilé amóú Yesu labwé há mu amu blí wúlu amotо fээ.

*Жhande Оkv Mu Bi Mva Оtsi Оkv Ilo Tsa
(Mateo 9:18-26; Marko 5:21-43)*

⁴⁰ Bréá Yesu léyinkí yówie оpu amu обин a, одам боhо mu atúu, tsúfэ buде mu оkpa kí. ⁴¹ Inu oyin оkвá бутетí mu Yairo, оgyi Yudafo ofiakpa оhande léba беда akpawunu mu ayabitо, kókokóli mu обее, обá abuyо mu wóyító. ⁴² Mu bi tsíhé оkole péá обu, alahо nfi dúanyо da odewu.

Bréá Yesu lópu оyó inu á, одам amóú bubuo mu amu bekpa buo mu ye. ⁴³ Оtsi оkвá obugya де mu wolí nfi dúanyо ní, оhaa mókótálí tsá mu, alayíntá mó iwísw ató fээ ilo atsapó ibitо bu ahá ámutо. ⁴⁴ Оtsi ánfi lótsun yо Yesu оma, pó ibi da mu tati osiebí. Inunv obugya amu leka itin. ⁴⁵ Múú Yesu léfité обее “Ma lápó ibi da mi?”

Bréá ahá ámu fээ бее bumákópu ibi da mu a, Petro léfité Yesu обее, “Mí Wíé, одам anfi bupu fú anfi á, mó fúде asón anfi fité?”

⁴⁶ Táme Yesu lébli обее, “Okv lapó ibi da mi. Nawun ání оηé kv ladáli mitо.” ⁴⁷ Bréá оtsi ámu lówun ání itó amóú mabwé ámu lalin оwan á, оledali ba. Одеkpinkí kpakpakpakpa, оleyéda akpawunu Yesu ayabitо, bláa mu ahá ámu fээ ansító tóá svá mоpu ibi da mu, pó alíá manyá ilotsá. ⁴⁸ Inu Yesu

lébláa mu obée, “Mí bí, fú hógyi latsá fú ɔ́. Nati iwilwiitɔ́.”

⁴⁹ Bréá Yesu bu mu tói anfi su á, oku lésrí tsú Yairo wóyító ba bebláa Yairo obée, “Fú bí ámu ɔ́ɔ́kpa mɔ́wa alé. Mátepi trá wa osunápú tói.”

⁵⁰ Bréá Yesu lónu asón á nfi á, ɔ́lebláa Yairo obée, “Mánya ifú. Fú mó hógyi wɔ́le, obénya nkpa.”

⁵¹ Bréá Yesu lówie wóyító inu á, ɔ́meha ɔ́haa obu mu yɔ́ obuá kebi ámu da mótó, don Petro, Yohane, Yakobo pú kebi ámu akwípu. ⁵² Alí bré ámu tɔ́ á, ahá ámu fée bu desú, bu de okitikíti. Yesu lébláa amú obée, “Mlisi okitikíti su rá. ɔ́mákwú, didí ɔ́de.”

⁵³ Ahá ámu fée buyin á nfi otsibi amu lawú. Mó su bɔ́má sí Yesu. ⁵⁴ Inu Yesu lékítá otsibi amu ɔ́bi, kpólí mu obée, “Obí, kusu!” ⁵⁵ ɔ́hé lelawíé mu, ɔ́ɔ́kusu líi ɔ́sáwɔ́le pé. Mú Yesu lébláa amú obée, “Mludunka tɔ́ku ha mu ogyi.” ⁵⁶ ɔ́nó lobwie otsibi amu akwípu, táme Yesu léda amú ɔ́lá obée, “Mlímábláa ɔ́haa asón á nfi.”

9

Akasípú Dúanyɔ́ Amu Sumbiwa (Mateo 10:5-15; Marko 6:7-13)

¹ Yesu létí akasípú dúanyɔ́ ámu fia, ɔ́leha amú túmi, há amú ɔ́kpa obée, bu gyáa ɔ́he laláhe fée, abutsa ɔ́. ² ɔ́ɔ́wa amú obée, bu yéda Bulu iwígyí ámu ɔ́kan, abutsa alɔ́pu. ³ ɔ́lebláa amú obée, “Ní mlɔ́yó á, mlímátsu tɔ́tɔ́. Mlímátsu oyi yíáhé, akpankogyo, atogyihe, kóba ntée atadié nyɔ́asi. ⁴ Wóyígyíwóyítóá bóhɔ́ mli á, mlítsia inu yófon ekeá mlédali wúlu amu tɔ́. ⁵ Ní bɔ́má hɔ́ mli wúlu kusu, mlídédali mlɔ́yó á, mlíkpa mli ayabitɔ́-isi wɔ́li wúlu amu tɔ́, isuna á nfi bu mebi bwé.”

⁶ Benatí kí nsiné unu awúlu féesú, buɗe ason wan-kláán ámu okan da, tsá ɔ̀.

Herode Légyigyáa

(Mateo 14:1-12; Marko 6:14-29)

⁷ Bréá Galilea omású ogyípú Herode lónu tóá ɔ̀de mósú yá á, olegyigyáa. Tsúfɛ́ akɔ buɗeɓlí beɛ, “Asú ɔ̀ɔ̀pú Yohane lakúsú tsú afúlitɔ́.” ⁸ Akɔ é beɛ, “Bulu onósú atáípú dada Elia lálé ɔ̀wan.” Akɔ é beɛ, “Bulu onósú atáípú dada amɔ̀tɔ́ okɔ lákúsú tsú afúlitɔ́.” ⁹ Herode léɓlí ɔ̀béɛ, “Nahá batɔ̀n Yohane. Ngya oyin omomɔ́ ɔ̀wan asón ntráa ndenu alí?” Mú sɔ́ ɔ̀ɔ̀ɔ́ mbódí ání mówun Yesu.

Ahá Mpím-nu Atogyihɛ Ha

(Mateo 14:13-21; Marko 6:30-44; Yohane 6:1-14)

¹⁰ Yesu sumbí ayɔ̀pú amɔ́ beyinkí bá beɓláa mu tóá bayóɓwe. ɔ̀leɓpa amú buo ɔ̀wan, amú nkɔ̀le ɔ̀yɔ́ Betsaida wúlutɔ́. ¹¹ Bréá ɔ̀ɔ̀m amɔ́ beɓí ání ɔ̀bu unu á, begya mu okpa yó unu. Yesu lóhɔ́ amú atúu, ɔ̀leɓláa amú Bulu iwíegyi amɔ́ ɔ̀wan asón, ɔ̀letsa amúá buɗelo.

¹² Bréá owí deɓɔ́on a, sumbí ayɔ̀pú dúanyɔ́ ámu beɓa beɓláa Yesu beɛ, “Ha amú abɔ̀nati, méní bétalí yó awúlu ání ɔ̀bu mantáa nɔ́sɔ́ yóɗunká atogyihɛ móa ɔ̀ɔ̀kpa, tsúfɛ́ animéenya tɔ́tɔ́ há amú dimbí ánfítɔ́.”

¹³ Táme Yesu léle mú onó ɔ̀béɛ, “Mɔ̀ɗunka ató ha amú abɔ̀gyi.”

Akasípú amɔ́ beɓláa mu beɛ, “Tóá anɔ̀bu fée gyí bodobodo apin anu pú ntsutso iye bwáhé anyɔ́. Nkétɔ́ anɔ̀layóhɔ́ atogyihɛ ba ahá ánfɔ́ fée.” ¹⁴ (Ayin ání ɔ̀bu unu ɔ̀ɔ̀ɓwe fɛ́ mpím-nu (5,000).)

Yesu léɓláa akasípú amɔ́ ɔ̀béɛ, “Mɔ̀liha amú abɔ̀tsia okútɔ́. Iku ɔ̀le ɔ̀wéɛ fɛ́ ahá aduenu (50).”

¹⁵ Akasípó amu bəbwε dínká mósú, əhagyíəha létsiá asi. ¹⁶ Inu olotsu bodobodo anu pó ntsutso iye bwáhé anyə ámu. Inu olotsu ansí fṓá kí əsúsú, əleda Bulu ipán. Múú olebiabía mótó púhá akasípó amu əbée, buyée mó ha ahá ámu fée abugyi. ¹⁷ Amu fée begyi mwe sian. Bréá akasípó amu bətsí isianhe amu a, ɔbɔlá alakpá dúanyə.

Ọhá Aní Yesu Gyi

(Mateo 16:13-19; Marko 8:27-29)

¹⁸ Eke əku Yesu nkυle dé mpái bə, mu akasípó amu bubu inu. Múú əlefíté amú əbée, “Ma ahá bεε ngyi?”

¹⁹ Bele mó ənó bεε, “Aku bεε, fúgyí Asú Ọbəpú Yohane. Aku bεε, Bulu Ọnósú Ọtáipú Elia. Aku é bεε, Bulu Ọnósú Ọtáipú dada əku lákósú tsú afúlitə.”

²⁰ Múú əlefíté amú əbée, “Mli é mé? Mli a mígyí ma?” Petro léle mó ənó əbée, “Fúgyí Kristo, (əhá ámuú Bulu ladá mu ofúli amu) ni.”

Yesu Iwɔsun Pó Mv Lowu Iwi Asón Bli

(Mateo 16:20-28; Marko 8:30-9:1)

²¹ Inu Yesu léda amú əlá kpákpáákpá əbée, bu mábláa əhaa mu iwɔ asón áfi. ²² Əletrá bláa amú əbée, “Ilehián aní mí, Nyankpɔsa-Mv-Bi áfi néhie wun iwɔsun tsətsəətsə Yudafo ahandε, Bulu igyi ahapú dehen pó Mose mbła asunápú ibitə; amú fée békíná mí, há bómə mí, táme Bulu əbélakósúa mi tsú afúlitə eke sáási.”

²³ Inu əlebláa ahá ámu əbée, “Ní əku dékléa obóbuo mi á, osii tóá otekle bwε, otsu mu oyik-palíhe ekekegyíeke bobuo mi. ²⁴ Tsúfé ní əku lépri mu nkpa á, əbóhúli mó. Ní əku é lési mu nkpa há mí sv é á, Bulu əbóhə mu nkpa. ²⁵ Ní əku onyá əyítə ató fée, táme əhúli mu əkláa a, labi məmu ɔwa há mu? ²⁶ Ní əku onyá mía mí atosunáhé péli a,

mí, Nyankpɔsa-Mɔ-Bi ánfɪ é nénɔya mɔ péli bréá nna mía mí Sí pú mɔ abɔpɔ wánkíhé numnyamɔ nɛbá. ²⁷ Ɔnɔkwali ndɛ mlɪ bláa. Aku bubu mlitɔ nfi bɔmóowu asa bówun Bulu iwíegýí amɔ.”

Yesu Iwitsée

(Mateo 17:1-8; Marko 9:2-8)

²⁸ Yesu léblí asón ánfɪ ndawótswí ɔma a, ɔlekpa Petro mɔa Yohane pú Yakobo buo iwɪ, bɔɔ yó mpái ɔbɔkpá ɪbu kɔsɔ. ²⁹ Bréá ɔɔɛ mpái ámu bɔ á, mɔ ansító letɛ. Mɔ atadiɛ lofulí hónánáná, ɪɔɛ ogyá kpa. ³⁰⁻³¹ Inu á, ahá abanyó ání batsiá kɪ, bugyi Mose mɔa Elia beɛɛ iwɪ ɔwan ɔsósó numnyamɔ. Amóa Yesu bɔtɔí tsú mɔ lowuá Bulu léhiɛ tswɪ mɔ ání ɪmóowa ɔpá obówu Yerusalem iwɪ. ³² Petro mɔa mɔ aba ámu beɔɔɔɔ. Bréá bɔwan tsinkí á, bowun Yesu numnyam, ahá abanyó ámu é bulí mɔ wá. ³³ Bréá ahá abanyó ámu bɔɔɔnati á, Petro lébláa Yesu ɔbée, “Mí Wíé, ɪbu aléá abétsiá nfi. Ha ada abú asa. Fú klé kɔɔɛ, Mose klé kɔɔɛ, Elia é klé kɔɔɛ.” (Ɔmɛbi tóá ɔɔɔɔɔɔ).

³⁴ Bréá ɔɔɛ asón ánfɪ blí á, agyinde kɔ lobobun amó féesó. Inu ifu lekitá amó abasá ámu. ³⁵ Inu á, ɔmɛ kɔ ledali tsu agyinde amɔɔ ɔbée, “Ɔni gyí mí Bía nalé ní. Mliyaa asɔ amlɪnu mɔ ɔmɛ.”

³⁶ Ɔmɛ amɔ lótsutsúa ɪbeka tin á, ɪlasí Yesu nkɔɔɛ ɪnu. Akasípó amɔ bekpa ɔnó bun asón ánfɪsɔ nkɛ ámɔɔ. Bɔmɛbláa ɔhaa ɪtáá bayóowun.

ɪbɔ Didahɛ Ɔlɔpó Tsa

(Mateo 17:14-18; Marko 9:14-27)

³⁷ Mú ɔyi kɛkɛ a, Yesu mɔa akasípó abasá ámu bekplí tsú ɪbu ámɔsɔ, ɔɔɔm amɔ befia mɔ. ³⁸ Inu amótó ɔkɔ lókplɔn ɔbée, “Osunápó, kókoli, damli kɪ mí bí ha mɪ. Obi yinhé ɔkɔɔɛ pé ogyi mí. ³⁹ Ɔɛɛ

laláhe kv towié mwtə, ətəkpłón. Ətedida gbla, ədekə tsikitsiki, mʊ ənó təbwé afu. Ipiantə asa itesi mʊ, ide mʊ yintá. ⁴⁰ Nobobwii ipa há fú akasípó amʊ mbéé, bʊgyáa mó le mwtə, táme bʊmetalí.”

⁴¹ Yesu léle mó ənó əbéé, “Ndeмба-abíá młmá hógyi, mł tsiátó ma ale. Alí nétsiá mł wá, nyá kłvñ há mł ekekegyíeke ní?”

Inʊ əlebláa oyin ámʊ əbéé, “Kpa fú bí ámʊ ba mł.”

⁴² Bréá əlekpa kebi ámʊ əbá á, əhe laláhe amʊ léfin mʊ dá, ədekə tsikitsiki. Táme Yesu lókpłvñ wa əhe laláhe amʊ, tsá kebi ámʊ. Inʊ oleyinkía mʊ há mʊ si.

⁴³ Bulu túmi křənkřənti ámʊ leha ənó lobwie ahá ámʊ féé.

Yesu Lowu Iwi Asón Bli Otse Nyəsə

(Mateo 17:22-23; Marko 9:30-32)

Bréá mʊ bwehé ide əhagyíəha wánwan wa á, Yesu lébláa mʊ akasípó əbéé, ⁴⁴ “Młhíe yaa asʊ amlnu. Béle mí, Nyankřusa-Mʊ-Bi ánfí há adón bómə mí.” ⁴⁵ Táme akasípó amʊ bomonu mó asi. Bulu lópv mó asinu ģáin amó. Mó sv iməwankí amó asón ání ədeblí. Ifú é de amó ání bėfité mʊ.

Ma Əbóbwe Əhande?

(Mateo 18:1-5; Marko 9:33-37)

⁴⁶ Nwéen kv léba akasípó amʊ nsiné, tsú amótó əhá ání əbóbwe əhande iwí. ⁴⁷ Yesu lébı amó agywun. Mó sv əlekpa kebi əkv belí mʊ iwí wá.

⁴⁸ Mú əlebláa amó əbéé, “Əhagyíəha ání ələhə kebi ánfí mí dátó lahə mł. Əhagyíəha ání əhə mł é lahə əhá ámó əłwa mí ámʊ. Tsúfé əhá ání ogyi ətráhe młtə féé gyí ədéhen.”

Anı Obúopv

(Marko 9:38-40)

49 Yohane lébláa Yesu ɔ́bée, “Mí Wíé, anilówun oyin ɔ́ku dépu fú dá gya ɔ́ɛ laláɛ, aniléka mu tin, tsúfɛ́ ɔ́ma anító.”

50 Táme Yesu lébláa amú ɔ́bée, “Mlímáka mu tin! Tsúfɛ́ ɔ́há ání ɔ́mɔ́kúsú líí mlíso buo mlí.”

Samariafɔ́ Bómɔ́hɔ́ Yesu

51 Bréá nkéá Bulu obótsu Yesu ya ɔ́súsú dekpɔ́kpé ba a, ɔ́ɔ́bwe agywun ání ɔ́bóyɔ́ Yerusalem kokooko.

52 Ɔ́lɔ́wa abí gyankpá yó Samaria wúlu kusɔ́ ɔ́bée, buyéla inu yai ha mu. 53 Táme bómɔ́hɔ́ mu wúlu amɔ́tɔ́, tsúfɛ́ Yerusalem ɔ́yó. 54 Bréá mu akasípó Yakobo muva Yohane bowun alí á, bɛ́fité mu bɛɛ, “Aní Wíé, fɔ́deklé fɛɛ ahá ogyá itsu ɔ́súsú bɔ́hɔ́ amú mɔ́?”

55 Táme Yesu lédamlí, wá iyin wá amó.* 56 Múó bɔ́pu ɔ́kpa yó wúlu bámbású a.

Ahá Aní Bɛɛ Bóɔ́bwe Yesu Abúopu (Mateo 8:18-22)

57 Bréá buɔ́na ɔ́kpatɔ́ bɔ́yó á, oyin ɔ́ku lébláa Yesu ɔ́bée, “Nóbuo fu yó ɔ́tínɛgyíɔ́tínéá fɔ́yó.”

58 Yesu lébláa oyin ámu ɔ́bée, “Awíá buɔ́bu mbó, mbubwi é buɔ́bu asia, táme mí, Nyankpɔ́sa-Mu-Bi ánfí mɔ́ á, mma ɔ́tínéá nɔ́pu mí nwun tswí.”

59 Yesu lébláa ɔ́ha bambá é ɔ́bée, “Bobuo mlí.”

Táme oyin ámu lébláa mu ɔ́bée “Owíé, ha mí anyopulá mí sí asa ambobuo fu.”

60 Múó Yesu lébláa mu ɔ́bée, “Si awupú† abupula amó afúli. Táme fú mɔ́ yɔ́ afuyɛda Bulu iwíegyí ámu ɔ́kan.”

* **9:55** Iní bu nwóló dada amú akɔ́tɔ́: Ɔ́bée, “Mlíméyín ɔ́ɛ́ oduá ɔ́de mlí kpa. Tsúfɛ́ Nyankpɔ́sa-Mu-Bi ámu méba ahá ɔ́mɔ́kpá, nkpa ɔ́hɔ́kpa ɔ́leba.” † **9:60** Awupó gyí ahá ání bawú ɔ́ɛ́tɔ́.

⁶¹ Ɔku é lébláa mu ɔbéε, “Mí Wíé, nóbuo fu, táme ha mí anyinki yeκlá mí wóyító ahá asa.”

⁶² Yesu lébláa mu ɔbéε, “Ɔhá ání ɔtesrí dámlí kɪ ɔma mófon ha Bulu iwíegyí ámutɔ agyómá ya.”

10

Akasípú Aduesienó-nyɔ Sumbi Wa (Mateo 10:7-16)

¹ Inɪ ɔma a, Yesu léε mu akasípú aduesienó-nyɔ (72)* akɪ é, ɔlɔwa amú abanyó-abanyó ɔbéε bugyánkpa yó wúlugyíwúluá mu onutó móyɔ músó. ² Ɔlebláa amú ɔbéε, “Atɔ kpɔtíhé amɔ itsɔ, táme mú akpɔtípú buɔmɔtsó. Mú su mlɪkokoli ndɔ mu wie, ɔwa akpɔtípú tsɔtsɔ abɔba bɔkpɔtí mu ató ámu. ³ Mlɪnati, mlɪbɪ ání ndε mlɪ wa f́é akúfabi ɔyó adúndutɔ. ⁴ Mlɪmátsu sika kentε, akpankogyo ntée ntɔkɔta kítá. Ní mlɪná ɔkpatɔ á, mlɪmálú tóntɔn ahá. ⁵ Ní mlowíé wóyígýíwóyítóá a, mligyankpa bla amú mliaa, ‘Bulu ɔhá mlɪ iwilwii.’ ⁶ Ní wóyí mu wie amɔ tekle iwilwii a, mlɪ iwilwii bésin wóyí ámuɔɔ. Táme ní ɔtamakle iwilwii a, ɪbésankí bá mlɪ wá. ⁷ Mlɪtsia wóyí ámúɔ bɔhɔ mlɪ mótó ámutɔ. Mligyi ató, amlɪnu tógyítóá béha mlɪ, tsúfé agyómá ɔyɔpú bɔteká ɪkɔ. Mlɪmátu láyétsiá wóyí bámbátó. ⁸ Ní mlowíé wúlu kɔsu, bɔhɔ mlɪ á, mligyi tóá béha mlɪ. ⁹ Mlɪtsa alɔpu ání bubu wúlu amɔtɔ, amlɪbla wúlu amɔtɔ ahá mliaa, ‘Bulu iwíegyí lawíé wóyí tá.’ ¹⁰ Táme ní mlowíé wúlu kɔsu, buɔmɔhɔ mlɪ á, mlɪdalɪ yelí brɔnɔsu, amlɪblɪ mliaa, ¹¹ ‘Anɪdé mlɪ wúlutɔ otútúu amúɔ ɪlawólí anɪ ayabiasɪ amɔ kóráá kpakpáa wolí. Táme mlɪbɪ ání Bulu iwíegyí ámu lawíé wóyí tá.’

* **10:1** Aduesienó-nyɔ (72): Aduesienó (70) bu nwóló ámu akɔtɔ.

¹² Nde mli bláa mbéε, Bulu ðébití wúlu amotò ahá isu ðon Sodomfò mu asón ogyíké amu.

Ahá Aní Bumedamli Klontò Asóngyi
(Mateo 11:20-24)

¹³ “Korasinfò, mligyòwi. Betsaidafò, mligyòwi ní. Ní Tiro pú Sidon awúlu laláhe amotò nòbwe ofúla akpònkpònti ánfì nòbwe mlitò ánfì á, tekì buda akpekpetò, bakpá nsúó wá nwuntò pòsúná ání badámli klontò. ¹⁴ Táme mlibì ání Bulu ðébití mli isu mu asón ogyíké ðon Tiro móa Sidonfò. ¹⁵ Mli Kapernaumfò, mlidéklé mliaa mlótsu iwí fúá alu yówo òsúsú? Èkekεεκε! Bulu ðéba mli asì yówie afúlitò.”

¹⁶ Yesu lébláa mu akasípú amu ðbéε, “Òhá ání òhò mli asón lahò mi. Òhá ání òlekiná mli asón hò lakíná mí asón hò. Òhá ání òlekiná mí asón hò é lakíná mí Sí ámúbò òlòwa mí ámu asón hò.”

Akasípú Aduesienó-nyò Ámu Yinkí Ba

¹⁷ Akasípú aduesienó-nyò ámu beyinkí ba ansi-gyísò. Bebláa Yesu bεε, “Anì Wíé, ní akplón wa òhe laláhe kúráá fò dátò a, butobú anì.”

¹⁸ Yesu lébláa amú ðbéε, “Nowun ání Satan lékpa tsú òsúsú fé alíá nsaintò tòfwí ìbì beda òsolótò pò.

¹⁹ Mlinu! Nahá mli túmi ání mlítsatsa awò pú nyankpòkpíesù tsun, amligyì Òbunsám túmi féesò. Tòtòtò mòòbwe mli. ²⁰ Táme ansí mágyi mli ání òhe laláhe labú mli. Mbóun ansí igyi mli ání Bulu lawánlín mli adá tswì òsúsú.”

Ansí Legyi Yesu

(Mateo 11:25-27; 13:16-17)

²¹ Alì bré ámòtò á, Òhe Wankíhé léha ansí lehie gyi Yesu. Múbò òleblí ðbéε, “Mí Sí, òsò muva asì Owíé! Nedá fú ipán ání falé tóá fòpònjáín anyansapu pú

asón abipó òwan súná ahá ání bomeyín òlala, bugyi fé nyebí. Ee, Mí Sí! Alí fudeklé fεε íbá mótó ní.”

²² Mú ólebláa mu akasípú amu óbée, “Mí Sí lapú tógyító wá mí íbitò. Óhaa méyín óhá ání Obí ámu gyí, nkéti Ósí ámu nkúle. Óhaa méyín Ósí ámu é, nkéti Obí ámu, pú óhá ání Obí ámu latsulá ání óbée mu súná mu.”

²³ Bréá óhaa má amú wá á, óledamli kí amú, bláa amú óbée, “Mli mú á, Bulu layulá mli, mli dé ató ánfí wúun. ²⁴ Nde mli bláa mbée, Bulu ónósú atáípú pú awíe tsòtsòtsò bekle ání bówun ató ánfí, abonu asón ánfí mli dénu, táme bomenya mú alí.”

Samariayin Awitòlẹ̀pọ̀ Oko

²⁵ Mose mbla osunápú oko lókosó líí fité Yesu asón ánfí pòsò mu kí. Ólefíté mu óbée, “Osunápú, ntò mbwée asa anya nkpa ání ítamatá?”

²⁶ Yesu lébláa mu óbée, “Nkálí Mose Mbla léblí? Nkálí fonu mú así?”

²⁷ Oyín ámu lébláa mu óbée, “Pọ̀ fú klon, fú ókláa, fú ówonlín pú fú agywun fée dwe fú Wíe Bulu, afodwe fú bá fé fú iwí.”

²⁸ Yesu lébláa mu óbée, “Mú fablí á. Bwe mú, fénya nkpa ání ítamatá.”

²⁹ Táme oyín ámu lékléá obósuná ání mú asón da okpa. Mú su ólefíté Yesu óbée, “Ma gyí mí bá?”

³⁰ Yesu lébláa mu óbée, “Bré kusu oyín oko lékplí tsú Yerusalem oyó Yeriko. Bréá óna okpatò á, ol-eyéfiá ogyo atswapú aku. Ahá ánfí bekpa mu tati, swí mu ató fée, dá mu sian mu mọ̀, náti sí mu tswí.

³¹ Bulu igyí óhapú oko ná okpa ámu kénsú. Bréá olowun mu sísí á, ólebai tsun ífóntó náti sí mu. ³² Alí kén Lewiyín oko é lóbòtu mu, báí tsun ífóntó náti ní.

³³ Táme Samariayín okvá óná okpa ámu su mú léba

bowotíí mʉsu. Bréá olowun oyin ámu a, ɔ̀ɔwa mu nwe. ³⁴ Ɖlenatí yótu mu. Ɖletséi nta kpekplé wólí mu nɔsu, yí ofobí wá mú, klí mó, tsú mu dínká mu afrimúsú, pó mu ya afóó ɔswúkpá yéki mʉsu. ³⁵ Mú ɔyi kehe a, Samariayin amu léle sika futútú anyɔ há afóó ɔswúkpá mʉsu ɔkípu ɔbéé, ‘Kí mʉsu ha mi. Ní feyintá tɔku tsía a, neyínkí néka fú.’ ”

³⁶ Yesu lómɔ mú ɔnó ɔbéé, “Fú atɔ kɪhetɔ á, ahá abasá ánfɪtɔ ɔmɔmu gyí oyin ámuú olefia ogyo atswapó ámu mu ba?”

³⁷ Mose mbla osunápú amu lébláa mu ɔbéé, “Oyin ámuú olowun mu nwe ámu.” Yesu lébláa mu ɔbéé, “Mómó yɔ afuyɔbwe mú odu.”

Marta Mva Maria Wá Yɔ

³⁸ Bréá Yesu mva mu akasípú buna ɔkpatɔ bɔyó Yerusalem a, bowie wúlu kusu. Ɖtsi ɔkɔá butetí mu Marta lóhɔ mu ɔfóó, ɔlekpa mu ya mu wóyító.

³⁹ Mu pio tsihé gyí Maria. Maria anfi lébetsiá Yesu ayabiasɪ, ɔde mu atosunáhé nu. ⁴⁰ Marta nkɔle dédamlí tsɔn mútɔ, alíá íbɔbwe ɔbɔbwe amú afóóɔ. Iɔɔɔn mu. Múú ɔlenatí yó Yesu wá, yéfité mu ɔbéé, “Mí Wíé, fawun ání mí pío lasí agyómá ámu fée tswi mi nkɔlesu? Bla mu ɔbetsa mí.”

⁴¹ Yesu lébláa mu ɔbéé, “Oo Marta, Marta! Fɔde fú iwɪ háan ntobí tsɔtsɔɔtsɔ iwɪ. ⁴² Toku kɔle pé déhián, Maria lalé múá íbu alé ɔn. Ɖhaa méetálí swíí mu.”

11

Mpáíɔ Iwɪ Atosundhé (Mateo 6:9-13; 7:7-11)

¹ Eke ɔku Yesu bu ɔtɪnekɔ ɔde mpáí bɔ. Bréá ɔɔbɔ mpáí ámu tá á, mu akasípú amɔtɔ ɔkɔle lébláa mu

ἄβέε, “Μί Wíé, suna aní mpái bə fé alíá Asú Ὁbəpú Yohane lósuná mu akasípú.”

² Yesu lébláa amú ἄβέε, “Ní mlóbə mpái á, mlibə mú alí.

‘Aní Sí,

ahá bubúu fú dá.

Ba begyi iwíé.

³ Ha aní atogyihéá íbófɔn aní ekekegyíεke.

⁴ Si aní lakpan kie aní,

fé alíá anitesíkíé ahá ání butəpú ílá gyi aní.

Mákpa aní wá ísókítə.’ ”

⁵ Inu əlebláa amú ἄβέε, “Ní mlítə əku bu onyawíe a, ἄbókusú yó mu wá əyínsuné yébláa mu ἄβέε, ‘Mí nyáwíé, pan mi bodobodo apin asa. ⁶ Mí nyáwíe əku labəswí mí sésééséi. Mma tətəá néha mu obégyi.’

⁷ “Mu nyawíe amu ἄbébláa mu sísí ἄβέε, ‘Máwa mí tóu. Mía mí abí aníladí. Nafin obu, mméetalí kósú beha fú tətə.’ ⁸ Nde mlí bláa mbéε, fiálí onyawíe əkpasu á, əmókusú há mu. Táme alíá əde mu kokóli kótóó su á, ἄbókusú há mu alíá odeklé.

⁹ “Mú su nde mlí bláa mbéε, mlíkuli Bulu, ἄbéha mlí. Mlídunka, mlówun. Mlída mu klonsu, obéfinkí mú há mlí. ¹⁰ Tsúfé əhá ání ətəkóli átó tenyá. Əhá ání otodúnká átó towun. Əhá ání ətedá klonsu bótəfinkí há. ¹¹ Ὁsí əməmu bu inu, mu bi əkóli mu iye a, ἄbékitá iwə wá mu íbitə? ¹² Ntéε ní əkóli mu bəno a, ἄbékitá nyankpəkpíe wá mu íbitə? ¹³ Mlí lakpan abwəpú kóráá mliyin alíá butəpú atə wankláán há mlí abí. Ntogyi só mlí Sí ámuú əbu əsósú ámu mú móəpu Ὁηε Wankíhé há ahá ání bude mu kulí?”

Yesu Mva Beelsebul
(Mateo 12:22-30; Marko 3:20-27)

¹⁴ Yesu légya ɔɛ laláɛ lé oyin ɔkúá alató omúmutɔ. Bréá ɔɛ laláɛ amv lédalɪ a, oyin ámv lówa tóí bɪ. Mú sv ɔnó lobwie ɔɔɔm amv. ¹⁵ Táme amótó akv beblí beɛ, “Ɔɛ laláɛ owíe Beelsebul túmi ɔɛpɔgya ɔɛ laláɛ lé ahátɔ.”

¹⁶ Amótó akv é bekleá bósɔ Yesu kv. Mú sv bebláa mv beɛ, ɔbwéɛ osúna pɔsuna ání lélé otsú Bulu wá. ¹⁷ Táme Yesu lébɪ amó agywɪn. Mú sv ɔlebláa amó ɔbéɛ, “Iwíe ogyíkpa ání daye anyɔ, buɔɛ aba kɔ tɛɔɔɔ. Wóyí oduá mótó atsiápú buɔɛ aba kɔ é tobwíé. ¹⁸ Ní Satan iwíe ogyíkpa labóí anyɔ, buɔɛ aba kɔ á, mv iwíegyí bédɔɔɔ. Táme mlíɔɔblí mlíaa, Beelsebul dátó nde ɔɛ laláɛ gyáa ɛ ahátɔ. ¹⁹ Ní Beelsebul túmi ndepɔgya ɔɛ laláɛ lé ahátɔ á, mómó ma túmi mlí abí é buɔɛpɔgya ɔɛ laláɛ lé ahátɔ? Mlí abí ámv onutó obégyí mlí asún. ²⁰ Táme íníá Bulu túmi ndepɔgya ɔɛ laláɛ sv á, mlíɔɔblí ání Bulu iwíegyí ámv laba mlí wá dodo.

²¹ “Tsúfé ní ɔwɔnlínɔ bu akɔtɔ, ɔɔɔ mv wóyí gyo a, mv tɔtɔ tamafwí. ²² Táme ní ɔhá ání ɔbu ɔwɔnlín ɔvɔn mv ɔbá begyi mvsv á, ɔtɔswíí mv mv akɔtɔ ámvú mv ansí ɔn mósú ámv, yéɛ mv atɔá olenya étó.

²³ “Ɔhá ání omobuo mɪ dé mí lu. Ɔhá ání ɔmedé mí tsa akpa ahá ba Bulu é dé amó gyáa tɛía mɪ.

Ɔɛ Laláɛ Yinkí Ba Ɔhato
(Mateo 12:43-45)

²⁴ “Ní ɔɛ laláɛ ɪdálɪ ɔhato á, iteyéki dimbísú dúnká otsiákpá, táme ɪtamanyá. ɪnv ɪteblí ání ɪbéyinkí yó mó wóyí dadatɔ. ²⁵ Ní ɪsánkí yó á, ɪtowun ání baféí mótó, lá mótó wankláán. ²⁶ ɪteyínkí yékpá mó aba asienó ání buɔɔbwé laláɛ

dɔn mu, bɔteba betsiá mu. Inu ɔhá ámu tsiátó teyíntá dɔn alá igyi yáí.”

Oyúla Onutó

²⁷ Bréá Yesu dé asón ánfí blí á, ɔtsi ɔku bu ɔɔm amɔtɔ. ɔtsi ámu lótsu ɔme fúá blí ɔbéé, “Bulu layúlá opúni amóó fedi mótó pú nyópo amóó fonyɔpó ámu.”

²⁸ Táme Yesu lébláa mu ɔbéé, “Ahá ání bɔtonú Bulu asón, gyí mósú mboún Bulu layúlá!”

Bodunká Ofúla

(Mateo 12:38-42)

²⁹ Bréá ɔɔm amu bɔdemoní tsía a, Yesu léblí ɔbéé, “Nɔemba-abí laláhe, mli dé osúna dunká amliwun, táme mli mósowun kɔkɔku dɔn Bulu ɔnósú ɔtáipú Yona osúna amu. ³⁰ Tsúfé alí amóó Yona lóbwe osúna há Niniwefɔ ámu a, alí mí, Nyankɔsa-Mu-Bi ánfí é nóbwe osúna há nɔemba-abí ní. ³¹ Seba owíe tsihé ɔbókusú líí Bulu asón ogyíké, há mli nɔemba-abí ánfí ipón. Tsúfé olotsu ɔsaasí ɔmá kɔtɔ kéín gya ɔkpa ba, bonu Salomo nyánsa atosunáhé. Mliki, ɔhá ání ɔɔn Salomo líí nfi á. ³² Niniwefɔ é bókusú líí Bulu asón ogyíké amu, há mli nɔemba-abí ánfí ipón. Tsúfé bréá Yona léda Bulu asón ɔkan súná amú á, beɔdamlí klɔntɔ ba Bulu wá. Mliki, ɔhá ání ɔɔn Yona onutó líí nfi á.

Nyankɔsa-oyí ɔkandíe

(Mateo 5:15; 6:22-23)

³³ “ɔhaa tamanywé ɔkandíe pónáín, ntée pú ɔlɔ bun mósó. ɔfɔákpá ɔtɔpɔbian, méní ibówankí há ahá ání béba wóyí amɔtɔ. ³⁴ Fú ansíbi igyi ɔkandíe há fú nyankɔsa-oyí. Ní fú ansíbi bu alé á, fú nyankɔsa-oyí ámu féé bówankí. Táme ní fú ansíbi ma alé a, fú nyankɔsa-oyí ámu féé ibóklun.

³⁵ Mú sù mlíkí ání wankí onutó bó mlítò, megyí oklún. ³⁶ Ní fú nyankpúsa-oyí ámu lówankí, oklún ma òtinetine a, fú iwí fée bówankí fè alíá òkandíe tówankí wólí fúsó.”

*Mose Mbla Asunápó Pó Farisifò Tsiátó
(Mateo 23:1-36; Marko 12:38-40)*

³⁷ Bréá Yesu lótoí tá á, Farisiyin òkù létí mu ató ogyíkpa mu wóyító. Mú sù Yesu lóyò yétsiá òpónú ámu así. ³⁸ Ilòwa Farisiyin amu wánwan ání Yesu mófwi ìbí pógyóra iwí asa òde ató ámu gyí. ³⁹ Iní sù Yesu lébláa mu òbé, “Mlì Farisifò mlítòfwí mlì nwe pò mlì ablanwé wankláán, táme ònsípe móa owuntòlín sòón lábóólá mlì. ⁴⁰ Mlì aha mimláhe, megyí mótó móa mú òma fée Bulu lóbwe? ⁴¹ Mlìpù mlì atonyahé ámu ha ahiánfò, tógyító iwí bétín ha mlì.

⁴² “Farisifò, mlìgyòwí ní! Mlìteye mlì òtsòtsó pò kpántánkplámá aná féeótó idú, pò idúsí amu há Bulu. Táme mlìmédé Bulu mbla ámuó ihíe dehián, igyí asóngyí òòkwalìsù pò Buludwe ámu sù gyí. Múdéhíán ní, táme mlìmákiná iyétò dúsí amu é ha.

⁴³ “Farisifò, mlìgyòwí ní! Mlìtekle otsiákpá yilé tsiá Yudafo ofiakpa. Mlìtekle mlíhaa, ahá bobún ha mlì itsiá dínsù. ⁴⁴ Mlìgyòwí ní! Mlìlabwé fè ntsán ání bómehíe mú nsù*, ahá bótòtsòn mósó bómeyín ání ntsán igyí.”

⁴⁵ Mose mbla asunápó amutò òkùle lébláa Yesu òbé, “Osunápó, ní feblí alí á, fasiá aní é o.”

⁴⁶ Yesu léblí òbé, “Mose mbla asunápó, mlì é mlìgyòwí ní! Tsúfè mlítòpó atò dwindwín sùrá

* **11:44** Yudafo amándíe ònó á, ní fetsá ntsánsó a, ifin lada fò. Mú sù botekpá mú afá futútú, póhíe mú nsù.

ahá, táme mlitamapú osrebi okole kórará tsá amú sorá. ⁴⁷ Mlignyawi ní! Tsúfé mlitapwé Bulu onósú atóipú amú mli anáin bómó ámu ntsán wankláán. ⁴⁸ Iní désuná ání mlilatsúlá dínká mli anáin bwehé ámu su ní. Tsúfé mli anáin bómó amú, mli é mlilapwé amú ntsán. ⁴⁹ Mú su Bulu lópu mu nyánsa blí obéé, ‘Nówa mí onósú atóipú pú mí sumbí ayapú amótó. Bómó aku, dínká aku ésú.’ ⁵⁰ Bulu obéfité mli ndemba-abí ánfí mu onósú atóipú ámu obugya amú ulowolí así tsú bréá ayí lélín opá ámu. ⁵¹ Obéfité tsú Habel obugyasu alu bafun Sakaria kléso. Mu bómó afodíe-asubwi múa Bulu otswékpa amu nsiné ní. Ee! Nde mli bláa mbéé, Bulu obéfité mú tsú mli ndemba-abí ánfí wá.

⁵² “Mose mbla asunápú, mlignyawi ní! Tsúfé mlidé asónbi sáafi amu. Mliméfinkí wíé, mliméhá ahá okpa é abuwie.”

⁵³ Bréá Yesu lénatí mu ayó á, Mose mbla asunápú pú Farisifó ámu bopu mu iwí oblé, yó bude mu asún tsatsotsó fité púfíní mu yibi, ⁵⁴ kí beé bénya mu onótó asvanku púkítá mu.

12

Apinabwεbibwε Iwí Oláda (Mateo 10:26-27)

¹ Igyi alí, bréá ahá mpím-mpím beba befia mu, bude aba ayabiasí tsatsáa a, Yesu légyankpá dá mu akasípú amu olá obéé, “Mlíki wankláán Farisifó Bodobodotu-afású,* tsúfé apinabwebí abwepú bogyi. ² Tótó má muvá babun ató mósú ání bumóobwíí mósú. Tógyító é ma muvá ilejáin ání

* **12:1** Farisifó Bodobodotu-afá gyí amú afunu atosunáhé. Kí Mateo 16:12.

uméelun ɔwan. ³ Bédá asón ání mliléblí nklobító ɔkan. Kugyíkúá igyi, ɔpló bóbon.

*Ɔhá Aní Abénýa Ifú
(Mateo 10:28-31)*

⁴ “Apíó aba, nde mli bláa mbéε, mlimánýa nyankpɔsa ifú. Ɔbétalí mó mli ɔyɔlɔv, táme ɔméetalí bwé mli tɔtɔ mú ɔma. ⁵ Nósuná mli ɔhá ání mlinýá ifú. Mɔgyí Bulu. Mv ɔmó mli ɔma a, ɔbv túmi tswi mli ɔkláa é wá ɔvɔbití ogyá ání itamaduntɔ. Ee! Mv mlinýá ifú ní!

⁶ “Afini bɔtɔkuku fe akénsire anu kéké? Megyí kóba ana? Amú kóráá á, Bulu tamatan ɔkokɔsv, ⁷ ménɔ bεε mliá Bulu yin mli nwunsv imi kóráá klátɔ. Mó sv mlimánýa ifú. Mlibv ibiá dɔn akénsire tsɔtsɔɔtsɔ!

*Adánsiεgyí Pú Asónkindá
(Mateo 10:32-33; 12:32; 10:19-20)*

⁸ “Nde mli bláa mbéε, ní ɔkv létalí gyi mí ɔwɔ adánsiε ahátɔ á, mí, Nyankpɔsa-Mv-Bi ánfɔ é négyi mv ɔwɔ adánsiε Bulu-abɔpv ansító. ⁹ Táme ní ɔkv lékiná mí ahátɔ á, mí é nékiná mv Bulu-abɔpv ansító.

¹⁰ “Ɔhagyíɔha ání ɔleblí mí, Nyankpɔsa-Mv-Bi ánfɔ ɔwɔ asɔn laláhe a, Bulu ɔbétalí sikíé mv. Táme ní ɔkv léblí Ɔhe Wankíhé amv ɔwɔ abususu a, Bulu méesikíé nde, oméesikíé mv ɔke.

¹¹ “Ní bekpá mli ya Yudafo ofiakpa, ntée ɔmásv agyípú pú awíε ansító á, mlimágywɔn asón ání mléblí póká ɔwɔ lé ntée alíá mléle mó ɔnó. ¹² Tsúfé Ɔhe Wankíhé amv obósuná mli alíá mléblí alɔ bré ámɔtɔ.”

Osikani Mimláhe Ɔkv ɔwɔ Yébi

13 Ɔɔɔm amɔtɔ ɔku lébláa Yesu ɔbéɛ, “Osunápó, bla mí déhen, ɔha mía mɔnyɔ aye atɔ́á anɪ sí lési yáí anɪtɔ.”

14 Táme Yesu léfité mu ɔbéɛ, “Agya, ma léyaí mí asún ogyípó ntée atɔ́tɔ oyépu há mli?” 15 Múú ɔlebláa ahá ámu fée ɔbéɛ, “Mliki wankláán ɔnsíɛwasu, tsúfɛ nyankpɔsa nkpa ima atonyahé tsɔtsɔtsɔtɔ.”

16 Inu ɔleha amú yébi ɔbéɛ, “Osikani ɔku ndɔtɔ ató lehiɛ wá alé ofi ɔku. 17 Múú ɔlefité mu iwɪ ɔbéɛ, ‘Nkáli nóbwe mí ató-abí? Mma ɔtínéá nɔpuyaí.’ 18 Inu ɔleblí ɔbéɛ, ‘Nyin tɔ́á nóbwe. Nóbwie mí idan, láwá akpɔnkpɔntɪ. Mótɔ nɔpu mí atíko pú mí ntobí ámu wá ní. 19 Fówun nabláa mí ɔkláa mbée, “Mí ɔkláa, iklɔn idí fú asi. Ki, fɔbu ató tsɔtsɔtsɔ́á ida ha fú nfi-nfi. Gyi, afɔnu, ansí igyi fu.” ’ 20 Inu Bulu lébláa mu ɔbéɛ, ‘ɔha mimláhe! Onyeni nde fú ɔkláa hɔ́o le fú ibitɔ. Ma obégyi ató ánfɪ fakle yáí ánfɪ fée?’ ”

21 Yesu lómɔ mú ɔnɔ ɔbéɛ, “Alí bóbwe ɔhá ání olekle ató yáí há mu iwɪ ɔsulúv anfɪsu, táme ɔma tɔtɔ Bulu wá ní.”

Ansí Pɔdínká Bulusu (Mateo 6:25-34)

22 Inu Yesu lébláa mu akasípó ɔbéɛ, “Mú su nde mli bláa mbée, mlimáhan iwɪ tɔ́á mlégyi, tɔ́á mlónu pú tɔ́á mlédídá su. 23 Nyankpɔsa nkpa dehián dɔn atogyihɛ. Mu ɔyulúv é idɔn atɔ dídáhé. 24 Mliki ak-lankpa. Bɔtamadú, bɔtamasíétí wá idantɔ. Bɔma idan ntée ifa, táme Bulu tehá amú atogyihɛ. Mlimá labi dɔn mbubwi? 25 Mlitɔ ma ɔbétalí han iwɪ pú bré kpalobí tsía mu nketɔ? 26 Ní mliméetalí bwé itó túkúríibi ánfɪ kóráá á, ntogyi sù mli dé iwɪ háan tráhe amɔsu? 27 Mliki alá pututɔ-oyí ntswítswí tɛdan. Itamayó agyómá ntée ló atati. Táme nde mli

bláa mbéε, Owíe Salomo, mu inya féétó a, ɔmetalí híhíε iwí wá akíle fé oyí ntswítswí anfitó koku. ²⁸ Ní Bulu dé ífá ání nde ilí, ɔke ilawú, bawá mú ogyá tati dídá á, ɔméetalí dídá mli atati dɔn mú? Ntogyi só mli hógyi mɔtsó ali?

²⁹ “Mó su mlimágywín tóá mlégyi ntée tóá mlónu iwí, iha mli ansí ipe. ³⁰ Tsúfé ínı aná ɔmá-ɔmá bɔtesrí gya nı. Mli Sí ámu yin ání ide mli hián. ³¹ Itóá mligyánkpa dunka gyí Bulu iwíegyí, Bulu ɔbópu ínı tsía mótó há mli.

Atonyahé Pvyáí Ɔsúsó (Mateo 6:19-21)

³² “Ɔpasua túkúríibi, mlimánya ifú. Tsúfé ibu mli Sí ámu ɔdwe ání ɔbópu iwíε ogyíkpa ámu há mli. ³³ Mlifé mli iwísu ató, amlıpu kóba ámu kie ahá ání buma tɔtɔ. Mlibun akenteá iméeyintá ha mli iwí. Múgyí, mliyaı mli siadie ɔsúsó. Inu mú á, koku méedalı mótó, tsúfé awikplu buma inu, atéple é bɔtamawí ató inu. ³⁴ Tsúfé ɔtínéá fú siadie bu a, inó fú agywın tetsiá.

Asúmpóá Bɔtogyo

³⁵ “Mliwa atadie, amlınywe mli nkandíε. ³⁶ Mlibwe iwí fé asúmpóá bɔde ámu wíε ɔkpa kí, obótsu ɔká otsiákpá ba. Fékı ní ɔbá beda klınsu á, béfinkı há mu. ³⁷ Ansı bégıyı asúmpó oduá ámu wíε ɔbéba bɔtu ámu bɔtsie bɔgyo mu. Ɔnɔkwalı nde mli bláa. Ámu wíε ámu ɔbésabáa tati, há ámu bétsiá ɔpúnúasi, mu onutó ɔbókɔnkı atogyihε ámu há ámu. ³⁸ Ansı bégıyı ámu, ní ɔbá bɔtu ámu bɔtsie bɔgyo mu, ɔyínsıné ntée bake. ³⁹ Táme mlinu asún ánfı. Nı wóyı mu wie yin bréá owikplu ɔbéba mu wóyıtó a, tɛkı omesi wóyı ámu tswı, owikplu móbwie wíε wı

mu ató. ⁴⁰ Mli é mligyo, tsúfé mí, Nyankpusa-Mu-Bi ánfí néba bréá mli ansí medín mísú.”

Osúmpó Wankláán Pó Ɔlaláhe
(Mateo 24:45-51)

⁴¹ Petro léfité mu ɔbéé, “Ani nkole fude yébi anfi ha lóó, ntée ania ahá ánfí fée?”

⁴² Yesu léblí ɔbéé, “Ma mee gyí osúmpóá ɔletin ansí, ɔbu ɔnɔkwali? Mu ibito mu wie tɔpó mu aba atráhe wá, ɔbéé ɔhá amú atogyihe dinka brésó.

⁴³ Ansí bégyi osúmpó amu ní mu wie amu ɔbá bowun ání lélé ɔde mú bwe. ⁴⁴ Ɔnɔkwali nde mli bláa. Mu wie amu ɔbɔpu mu ató fée wá mu ibito.

⁴⁵ Táme ní osúmpó amu léblí wá nwuntɔ ɔbéé, ‘Mí wie íbábi mɔkúfon, ɔbówa ɔpá.’ Iní su olefi asi ɔde mu aba asúmpó atsi múa ayín da, ɔde ató gyí si amú, ɔde ntá núu bu á, ⁴⁶ mu wie amu ɔbéba bofwie mɔtɔ ekeá ɔmedín ansí. Mu wie amu ɔbéhie títi mɔtɔ, trá bití mva ahá ání bɔmɔhɔ mu gyi isu kékée.

⁴⁷ “Osúmpó oduá oyin tóá igyi mu wie apé, táme ɔmela iwí bwé yáí á, mu wie ɔbéhie pítí mu ató wankláán. ⁴⁸ Táme osúmpóá omeýín mu wie apé, ɔɔbwe tóá ilehián ha ató pití á, mu wie ɔbépití mu kpalobí. Bulu tefíté tsɔtsɔ tsú ɔhá ání ɔleha mu tsɔtsɔ wá, ɔtefité tsɔtsɔtsɔ é tsú ɔhá ání ɔleha tsɔtsɔtsɔ wá.

Ipián Yesu Lópoba, Megyí Iwilwii
(Mateo 10:34-36)

⁴⁹ “Ogyá ɔɔɔákpa néba ɔsolóu anfisú. Ní mí nkole su mú á, tekí idetsíí dodoodo. ⁵⁰ Asúɔ ku ida misvá bóbɔ mí. Mí klɔn méedi mí asi yófon bréá ilamó ɔnó. ⁵¹ Imábwe mli fé iwilwii nɔpoba ɔsolóu anfisú. Megyí iwilwii, ahá nsiné yintá nɔpoba. ⁵² Tsúfé tsú séi púya a, wóyí ání ahá abanú bubu mótó á, abasá

bókusú lí abanyósú. Abanyó é bókusú lí abasású.
⁵³ Abi yinhé móa amú así nsiné béyintá. Abi tshé
 móa amú ayín é nsiné béyintá. Osia tshé móa mu
 sia tsíhé nsiné é béyintá.”

Brétó Asón Asinu
(Mateo 16:2-3)

⁵⁴ Yesu létrá bláa ahá ámu obéε, “Ní nyankpu
 obílá busu á, mlitebli mlíaa, nde nyankpu obótswie,
 lélé ototswie. ⁵⁵ Ní nsainto itsú fúá á, mlitebli mlíaa,
 nde owí obéln, lélé itelín. ⁵⁶ Apinabwεbí abwεpó!
 Mliyín alá butélé osulúsu pú nwwólótaasu ató asi.
 Ntogyi só mlimétálí nú itó ánfí idεbá séi ánfí mó asi?”

Anyabá Nsinéla
(Mateo 5:25-26)

⁵⁷ “Ntogyi só mlitamatálí gyí asón wankláán há
 mlí iwí? ⁵⁸ Ní oku osáma fu á, wa asa ha amlíbli
 mó wóyító, méní fú onyabá móopu fú ya asón
 ogyíkpá. Fówun asón ogyípó méegyí fú asón, pú
 fú wá prósiyín íbitó, owa fú obu. ⁵⁹ Ní megyí alí á,
 mméemlé fú, nkéti faká tógyító tá asa fédalí inu.”

13

Mlidamli Iklontó, Méní Mlimóowu

¹ Ahá ámúú bubu inu alí bré ámuto aku bebláa Yesu
 bεε, Pilato lamó Galileafó aku bréá bude afódiε bó
 há Bulu, Yerusalem Bulu otswékpa inu, há obugya
 lada afódiε ámu. ² Yesu léfité amú obéε, “Mlíki mlíaa,
 Galileafó ánfí bugyi lakpan abwεpú don Galileafó
 atráhe, só bowun iwíwsín ánfí odu? ³ Nde mlí
 bláa mbéε, megyí alí ígyi! Ní mlí é mlimédamlí
 klontó á, mlí féé mlówu fé amú. ⁴ Ntéε ahá dúkwe
 ámúú abansóru lobwie dá mó Siloam omanti ání íbu
 Yerusalemtó ámu mé, mlíki mlíaa, lakpan abwεpú

bugyi don aha atráhe ání betsiá Yerusalem aḷi bré ámuto fée? ⁵ Nde mli bláa mbéé, megyí aḷi ígyi. Ní mlímédamlí kḷonto á, mli é mlówu fé amó.”

Pɔntɔ Mɔswiéhé

⁶ Móú ɔleha amó yébi ɔbéé, “Oyin ɔku lótswie pɔntɔ mu ndɔtɔ. Eke ɔku ɔlɔɔ yéki beé, abí ku idin mótó. ɔlɔɔ á, kuku medín mótó. ⁷ Inu su ɔlebláa mu ɔpayin ɔbéé, ‘Nfinsa ní, nna oyí áñfi asi. Mmɔkówwun kukukuku mótó. Ntogyi sù ibétrá lí yíntá ɔsolúv? Kun mó da!’ ⁸ Táme ɔpayin amu lébláa mu ɔbéé, ‘Mí wíé, fú mó si mó itra lu ofi ɔkule, ampulipuli mó asi, kpa wúna wa mó asi. ⁹ Ní ofiébá iloswie á, ibu alé, támé ní imoswie á, nakun mó dá.’”

ɔtsi ɔku Ila Tsa ɔkpónú ɔdaké

¹⁰ Yesu lóɔ ɔde ató suná Yudafɔ ofiakpa ɔkpónú ɔdaké iku. ¹¹ ɔtsi ɔkúv ɔhe laláhe lówa mu ilo nfi dúkwe ní, ilahá mu alaklo, ɔmetáli bwíí nátí bu inu. ¹² Bréá Yesu lówwun mu á, ɔletí mu bláa mu ɔbéé, “Ani yín, iwí iwá fú ɔnlín!” ¹³ Inu ɔlɔpɔ ibi da ɔtsi ámu. Inu ɔlɔtswií lí kánfú Bulu.

¹⁴ Ofiakpa ɔhande amu lénya ɔbló ání Yesu latsá ɔha ɔkpónú ɔdaké. Mó su ɔlebláa ahá ámu ɔbéé, “Nkensíé bu inu há agyómá yɔ. Mliba nke ámuto, abutsa mli ilo. Megyí ɔkpónú ɔdaké!”

¹⁵ Ani Wíe Yesu léle mó ɔnó ɔbéé, “Apinabwebí abwepú! Mlitɔ okugyíɔku tɔwóí mu nnantswie ntée afrímú lé ibantɔ, pó amó ya ntsu onúkpa ɔkpónú ɔdaké. ¹⁶ Mó ima aleá mí mó nésankí Abraham mu na áñfi ɔbonsám lakíkli mu nfi dúkwe kéké áñfi ɔkpónú ɔdaké?” ¹⁷ Mu asun blíhé anfi léha péli lékitá mu alupó ámu, ansí légyi atráhe amu fée, ofúla kpɔnkpɔnti ámú ɔdebwe ámu su.

Takyí-akpin Ibi Yébi

(Mateo 13:31-32; Marko 4:30-32)

¹⁸ Inu Yesu léfité ɔ́bée, “Ntɔ́ Bulu iwíegyí ámu lɛlian? Ntée ntɔ́ nɔ́pɔkápó mu? ¹⁹ Igyi fɛ́ takyí-akpin ibí, oyin ɔ́ku lódu wá mu ndɔ́tɔ́. Uedan mlí oyi yilé, mbubwi bɔ́togyónká mú abámbitɔ́.”

Bodobodotu-afá Yébi

(Mateo 13:33)

²⁰ Yesu létrá blí ɔ́bée, “Ntɔ́ mpókapy Bulu iwíegyí ámu? ²¹ Igyi fɛ́ Bodobodotu-afá ání ɔ́tsi ɔ́ku lóputsiá bodobodo nfúó kente kule, ileha mú ilotu.”

Obu-ɔ́nó Kplánhe

(Mateo 7:13-14, 21-23)

²² Bréá Yesu ɔ́yó Yerusalem a, ɔ́lɔ́tsun nkudasí pú awúlusu. Ɔ́na ɔ́de amó ató suná. ²³ Ɔ́ha ɔ́ku léfité mú ɔ́bée, “Owíé, ahá kpalobí ku obénya nkpa?”

Yesu lébláa ahá ámu ɔ́bée, ²⁴ “Mlɔ́bɔ́ mbódí amlɔ́tsun obu-ɔ́nó kplánhe amɔ́tɔ́. Tsúfɛ́ ahá tsɔ́tsɔ́tsɔ́ bɔ́bɔ́ mbódí ání bɔ́tsun wie inu, táme bɔ́mɛ́etalí. ²⁵ Táme ní wóyí mu wie ɔ́kósó fin obu ámu, mlɛ́bá belí kɔ́n ɔ́ma, dá kɔ́n amusu mlíaa, ‘Owíé, finki ha aní!’ á, ɔ́bébláa mlí ɔ́bée, ‘Mmeyín mlí, mmeyín ɔ́tínéá mlotsú.’ ²⁶ Inú mléblí mlíaa, ‘Ania funyɔ́ létsiá gyi ató, nú ntá, fetsiá suná ató aní dinsó!’ ²⁷ Táme ɔ́béle mú ɔ́nó ɔ́bée, ‘Mmeyín mlí. Mmeyín ɔ́tínéá mlotsú. Mlinatí tɛ́i mísó, mlí lalahɛ abwɛ́pú fɛ́é!’ ²⁸ Ní mlowun Abraham, Isak, Yakob pú Bulu ɔ́nósó atáíró amu fɛ́é bɔ́bɔ́ Bulu iwíe ogyíkpá, táme bɔ́mɛ́ha mlí mú ɔ́kpa amlíwie inu á, inó mlósu kpisii ní. ²⁹ Ahá bɔ́tsu owí ɔ́dalíkpa pú owí ɔ́kplíwíékpá, bɔ́nasu mɔ́a gyɔ́pɔ́isu ba betsiá ató ogyíkpá Bulu iwíegyí ámɔ́tɔ́. ³⁰ Ɔ́nɔ́kwali, amapy

aku bémlí agyankpapu. Agyankpapu aku é bémlí amapu.”

*Yesu Lósú Ha Yerusalem
(Mateo 23:37-39)*

³¹ Inu Farisifó aku beba Yesu wá bebláa mu bee, “Dali Galilea omátó nfi, tsúfé omású ogyípú Herode dékléá obómó fú.”

³² Yesu lébláa amú obée, “Mliyebláa okpataku ámu mliaa, ‘Négya oje laláhe lé ahátó, tsá ahá ilo nde, gya le oke, mó mó onó kláí.’ ³³ Táme ilehián aní nógó mí onátí amusu nde, oke móa kláí. Tsúfé okpa má inuá bómó Bulu onósú otáírú okoku otinetine, don Yerusalem!

³⁴ “Oo Yerusalemfó, Yerusalemfó! Mlitómó Bulu onósú otáírú, dá abí aní Bulu lawá sísí mli abwi mó ní. Ntekleá nóbun mli abísú brégyibré, fé alá bate tobun mu abísú, táme mlitamahá mí okpa. ³⁵ Mliki, Bulu obési mli otswékpa tswi mli. Nde mli bláa mbée, mlíméetrá wun mi ekekeeke, yófun ekeá mléblí mliaa, ‘Bulu oyúla ohá amúú obá mu dátó’ ámu.”

14

Olupu Oku Tsa

¹ Farisifó ohande oku létí Yesu ató ogyíkpa mu wóyító okpónú odaké. Ahá bopu ansí yi Yesusu, bude mu téé. ² Inu oyin okuá alapúnyá léba Yesu wá. ³ Yesu léfité Mose mbla asunápú pú Farisifó ámu obée, “Ani mbla léha okpa aní butsáa ilo okpónú odaké lóó, ntée imeha okpa?”

⁴ Amótó okoku móbwíí onó. Múú Yesu lékitá oyin ámu, tsá mu ilo, olesi mu olenatí. ⁵ Inu olefté ahá ámu

ἄβέε, “Mlito ma mu bi ntée mu ɔnantswie ḁbékpadá wíé ibúntó ɔkpónó ɔdaké, ɔmóɔkɔsí lé mu?”

⁶ Bume talí lé mú ɔnó.

Iwiasibá

⁷ Inu Yesu lówun ání ahá ámóú beti ató ogyíkpa inu ámuto aku buɔe otsiákpá yilé dunká bétsiá. Múú ɔleha amú yébi ḁbée, ⁸ “Ní ɔku ɔtí fú ɔká otsiákpá a, máyétsiá ɔfúákpá. Fialí ɔleti ɔhande ɔkúá ɔɔun fu. ⁹ Inu ɔhá ámóú ɔleti mlí ámu ɔbebláa fu ḁbée, ‘Mí wíé, kusu pu obíá ha ɔhá ánfí.’ Inu péli békítá fú, fépetí yódunká ɔtineku tsíá. ¹⁰ Mú su ní ɔha ɔtí fú ató ogyíkpa a, yetsiá obíá kusubisu mbóun, ɔhá ámu ɔbebláa fu ḁbée, ‘Mí wíé, betsiá ɔfúákpá nfi.’ Inu obótsu fú ansító fúá ahá ámu féé ansító. ¹¹ Tsúfé ɔhagyíɔha ání ototsú iwí á, Bulu teba mu asi. ɔhagyíɔha ání ɔteba iwiasí é á, Bulu totsú mu fúá.”

¹² Yesu lébláa ɔhá ámóú ɔleti mu ató ogyíkpa amu é ḁbée, “Ní fɔtswi ɔpónó ɔpa onyé á, máti fú anyawíe, fú apíó, fú abusuanfɔ ntée iwí anyapúá bɔtsie mantáa fú. Ní fɔbwé mú alí á, amú é bélatí fú amú kle asi ká ikɔ. ¹³ Mbóun ti ahíánfɔ, tsukole asínpu, abubúpu pú ansibi abwiepú. ¹⁴ Bulu obóyulá fú, tsúfé buma tɔtɔá bópuká fú ikɔ. Bulu ḁbéka fú ikɔ ekeá ɔbókusúa aha yilé tsú afúlitɔ.”

Nke Kpɔnkpɔnti Ku Yébi

(Mateo 22:1-10)

¹⁵ Ahá ámóú amóa Yesu bɔtsie ɔpónúasi ámuto ɔkule lónu mu asun blíhé anfi, ɔleblí ḁbée, “Ansí bégýi ahá ání bégýi ató Bulu ɔpónó ɔtswíke mu iwíegýí ámuto!”

¹⁶ Táme Yesu lébláa mu ḁbée, “Oyin ɔku lótswi ɔpónú kpɔnkpɔnti ku, ɔleti ahá tsɔtsɔatsɔ.

17 Bréá beniná atogyihe amu tá á, olowa mu asúmpó òbée buyébláa ahá ámúú òleti ámu bee, ‘Babwé tá!’

18 Táme amó fée beblí bee amó ibi de. Ogyankparu òbée, ‘Nahò òsolóu ku. Ilehíán ání néyékí mú. Mú su mlikita mótó ha mi.’ 19 Onyòòsi é òbée, ‘Nahò nnantswie yínhé idú, bópulipúli mí ndòtò há mí. Neyékapó amó ki. Mú su mlikita mótó ha mi.’

20 Òbambá é òbée, ‘Nwéén kótóò netsiá òká. Mú su mméetalí ba.’

21 “Inu osúmpó amu léyinkí bebláa mu wie. Òbló lèkitá mu wie amu, òlebláa mu òbée, ‘Wa òsa sri yeki ònsu pò brònsu, afòkpa ahiánfò, tsukule asínpu, ansibi abwierú pò abubúpu ba.’ 22 Imòwa òpá osúmpó amu léba bebláa mu òbée, ‘Mí wíé, nayó sumbí ámu, támé otsiákpá trá da.’ 23 Mu wie amu lébláa mu òbée, ‘Tsun mmuátse móa nkpakwí fée. Tí òhagyíòha ání fówun fée òbá, méní ahá bóbulá mí wóyító. 24 Nekáse, ahá ámúú nehie tí ámúú òkuku méeeda mí ató ánfí ònó!’ ”

Yesu Búotò Ipián (Mateo 10:37-38)

25 Yesu muva òdòm kpònkpònkpònti ámu ná báyó. Múú òledamí bláa amú òbée, 26 “Òhagyíòha ání òleba mí wá, támé òde mu si, mu yin, mu otsiába, mu abí, mu apíó, mu onutó kóráá iwí dwe òun mi á, òméetalí bwé mí òkasípú. 27 Òhá ání omotsu mu oyikpalíhe bobuo mi mófòn ání òbóbwe mí òkasípú.

28 “Mlító òmòmu bú inu, ní obéyi obu kpònkpònti á, òméetsiá así kí tóá obéyintá, wun ání mu kóba bófòn? 29 Ní òmekí mú alí, asa òkòksú wá obu ámu ntswiasi, pwé mú fun òkpatò, òmetalí mó mú ònó á,

obu ámu awúnpu fée bómási mu. ³⁰ Bébli bεε, ‘Oyin ánfí lókusó oδε obu yíi, ometalí mó mú onó.’

³¹ “Ntée owíe omomubv unvá ní owíe oku dé akapú mpím-advanyo (20,000) obá bako mu a, oméetsiá asi kí alá obóbwe obópu mu isá akapú mpím-dú (10,000) yéfia amó? ³² Ní owun ání ometalí á, obówa abí osasv bógyokokóli mu há ikolebwe, bréá bumakónyá kpókpe ba. ³³ Iní sv mlito ohá ání omesi mu tógyító omagyáa ometalí bwé mí okasípó.

Nfólá Ima Labi

(Mateo 5:13; Marko 9:50)

³⁴ “Nfólí bv alé, táme ní itá odwe á, ntó bélapówá mó odwe? ³⁵ Itráa ma ale há tótoto bwe. Tsei butetséi mó tsítsá wúnasv. Ohá ání obv asv onúu asón ánfí.”

15

Kufa Fwihé

(Mateo 18:12-14)

¹ Eke oku lampóo ahópu pú lakpan abwepú beba Yesu asv blíhé onukpá. ² Farisifo pú Mose mbla asunápo amv bowuntí mu bεε, “Oyin ánfí mva lakpan abwepú ténátí, butowá ibi gyi ató kóráá.”

³ Mó sv Yesu léha yébi púsúná amó ató obée,

⁴ “Mlito ma bú akúfa lafakule (100), okule ofwí á, omesi adukwebá-kwebá (99) tráhe wá dimbitó unv, yódunká mu alí kpéfvn bréá obówun mu?

⁵ Nahogyi mbée, ní owun mu a, ansí bégyi mu, obótsu mu wá nkankó, ⁶ pú mu ya wóyító. Obéti mu anyawíe pú mu aba, bláa amó obée, ‘Mliha anya ansigyí. Nawun mí kufa amó obfwí ámu!’ ⁷ Alí kén nde mlí bláa mbée, ní lakpan obwepú okule pé odámlí kluntó á, ansí béhie gyi ahá osósó unv dun alá

ibégyi amó aha wankláán adukwebá-kwebá (99)
 ání bume trá hián klontódamlí iwí.

Kóba Fwihé

⁸ “Ntée ní ɔtsi ɔku bu sika futútú dú, mótó kule lafwí á, omóonywe ɔkandíe kiki mu wóyító wankláán, kpákpá ntobító ki, fíi wóyí ámɔtɔ wankláán yɔfon bréá alawun mó? ⁹ Ní owun mó á, ɔbėti mu apíó aba, bláa amó ɔbéé, ‘Mliha anya ansigyí. Nawun mí sika futútú ámóú ɔɔfwí ámu. ¹⁰ Nde mli bláa mbéé, alí ansí béhíe gyi Bulu-abɔpu ní lakpan ɔbweɔpó ɔkule ɔdámli klontɔ ní.’ ”

Obi Fwihé Ɔku

¹¹ Yesu létrá ha amó yébi ɔbéé, “Oyin ɔku létsiá, ɔbu abi yinhé anyɔ. ¹² Ɔkusɔ amu lébláa mu si ɔbéé, ‘Mí sí, ye fú atótó, afɔpu mí klé ha mi.’ Inu mu si lékitá mu atótó ye há amó. ¹³ Imegyí nke koku ɔkusɔ amu lókulá mu ató fée, olotu ɔkpa yó tsútsúútsú ɔmá kutɔ. Inu oleyétsiá nkpa laláhe yíntá mu ató ámu fée. ¹⁴ Bréá oleyintá ató ámu tá á, akón kpɔnkpɔnti ku léba ɔmá ámɔtɔ, ɔɔwa akón di bi. ¹⁵ Mó su ɔɔpu iwí yémantá inuyin ɔkusɔ, oyin ámu lékpa mu yáa mu ibúasi ɔbéé, ɔyéki mu mprákuosɔ ha mu. ¹⁶ Teki olekleá obétsiá gyi mprákuo atogyihe amu ku, táme ɔhaa méha mu mó iwí ɔkpa. ¹⁷ Bréá mu ansí leyinkí ba mu iwísu á, ɔlefíté mu iwí ɔbéé, ‘Apafɔ amɔmu kóráá má mí sí wóyító, bumedé ató gyí sian ekekegyíeke? Mó ntsie nfi, akón de mí mɔ? ¹⁸ Nókusó yínkí yó mí sí wá, yébláa mu mbéé, mí sí, napó ɔl á gyi Bulu, púgyi fú é. ¹⁹ Mmekanáa ání fétrá ti mí fú bí. Pu mí bwéé fú apafɔ ámɔtɔ ɔkule.’ ²⁰ Mó su ɔɔkusó pú ɔkpa ɔbá mu si wá.

“Bréá olowotií, mu si lówun mu sísí á, ɔ̀ɔ̀wa mu nwe, ɔ̀lesrí yéfia mu, látá mu pútá. ²¹ Inu mu bi ámu lébláa mu ɔ̀béé, ‘Mí sí, napó ɔ̀lá gyí Bulu, pógyi fú é. Mmekanáa ání fêtrá ti mí fú bí.’ ²² Táme mu si létu mu asúmpú, bláa amú ɔ̀béé, ‘Mliwa ɔ̀sa yotsu atadiɛ wankláán ámu bɔ̀wa mu. Mliwa mu opetia, amliwa mu ntukuta. ²³ Mliyele ɔ̀nantswie yínhé kánáhe amú alawá nfo ámu ba, amlibɔ̀mɔ̀ mu, apugyi nke ha mu. ²⁴ Tsúfé mí bí áñfi lawú tsínkí. ɔ̀ɔ̀fwɪ, anɔ̀lawun mu.’ Inu bɔ̀wa nke gyí bi.

²⁵ “Alí bré ámuɔ̀tɔ̀ á, obi dehen amu bu ndɔ̀tɔ̀. Bréá olotsu ndɔ̀ ámuɔ̀tɔ̀ ɔ̀bá, alatá wóyítɔ̀ wie tá á, olonu ání pléi de wóyítɔ̀ inu. ²⁶ Mú su ɔ̀leti mu si asúmpú amuɔ̀tɔ̀ ɔ̀kule, fité ɔ̀béé, ‘Amansu lába?’ ²⁷ Osúmpú amu léle mú ɔ̀nó ɔ̀béé, ‘Fú pió laba. Mú su fú sí lahá bamó ɔ̀nantswie kánáhe amu, tsúfé alayínkí bɔ̀tu mu, ɔ̀bu nkpa, ɔ̀bu ɔ̀nlɪn.’

²⁸ “ɔ̀bló lekítá ɔ̀déhen amu. Mú su olesin mmuáa. Mu si lédalɪ ba bokokóli mu ɔ̀béé, ɔ̀bá wóyítɔ̀. ²⁹ Táme ɔ̀lele mú ɔ̀nó ɔ̀béé, ‘Mí sí, ki nfi dúdúúdúá napótsiá fú wá súm fú. Mmákwé mábúla kuku ki. Táme fomákwé mí ɔ̀kpalábi fɛɛ mía mí aba apówa iwɪ ansigyí ki. ³⁰ Táme fú bí áñfi alayintá fú tógyítɔ̀, muva akipú bayégyi nkpa áñfi mú laba a, famó ɔ̀nantswie yínhé kánáhe amú alawá nfo ámu há mu!’ ³¹ Inu mu si lébláa mu ɔ̀béé, ‘Mí bí, yéé fú mú fóbú mí wá brégyíbré. Fóbú mí ató féé. ³² Fú pió áñfi lawú tsínkí. ɔ̀ɔ̀fwɪ, anɔ̀lawun mu. Mú su lehián ání abégyi mú nke, nyá ansigyí.’ ”

16

Agyómású ɔ̀kipu Ansítinpu ɔ̀ku

¹ Yesu lébláa mu akasípú òbée, “Iwi onyapú òku létsiá, òbu agyómású òkípu. Ahá bowi tsá mu wie amusu bée òde mu gyí. ² Iwi su òleti oyin ámu, fíté mu òbée, ‘Ntò asún ndenu tsú fú iwi alí? Bobu akúnta ha mi, tsúfé fómétrá kí mí agyómású.’ ³ Agyómású òkípu amu léfité mu iwi òbée, ‘Nkálí nóbwe? Mí wie òbá begya mi. Mma òwonlín ání nénatí dò ha ahá. Ibo mi péli ání nénatí kúlí ató é. ⁴ Ibo alé! Nyin tsá nóbwe, méní ní osí mí á, nénya ahá ání bóhò mi wá amó wóyító.’

⁵ “Mú su òleti ahá ání bude mu wie ikò kulèkule. Òlefíté ogyankpapu òbée, ‘Ikò afiní fúde mí wie?’ ⁶ Ikò òkitápú amu léle mú ònó òbée, ‘Nfò agbòngbó lafa-anyò (200).’ Agyómású òkípu amu lébláa mu òbée, ‘Tsan fú adánsiè òwolú ámutò, afòwanlín lafakule (100).’ ⁷ Òlefíté òku é òbée, ‘Ikò afiní fúde?’ Ikò òkitápú amu lébláa mu òbée, ‘Bodobodo nfúò akente òpím-òkule (1,000).’ Agyómású òkípu amu lébláa mu òbée, ‘Tsan fú adánsiè òwolú ámutò afòwanlín lafakwe (800).’

⁸ “Osikani ámu lékanfú agyómású òkípu anfi òma òòkwali anfi ání alatálí tìn ansí alí.” Yesu lómò mú ònó òbée, “Ndeмба-abí ání búbuo òyító ató ansítíun ání bòpu bòtsiè amó abatò idun amóá buyin Bulu klé.

⁹ “Nde mli bláa mbée, mlipu òyító ató bwe apíó, méní ní itá á, Bulu òbóhò mli wá mu wóyíá ibu inu bré féétó. ¹⁰ Ohá ání òletalí kítá ató túkúrííbi, olegyi òòkwali músú á, mu kén obégyi òòkwali ató kpònkpòntí ésú nì. Táme ohá ání òmòwa òòkwali ató túkúrííbìsù òmóowa òòkwali ató kpònkpòntìsù. ¹¹ Mú su ní mli má òòkwali òyító atósú a, ma mée òbóhò mli su gyi, pú òsúsú ató onutó wá mli ibitò?

12 Ntée ní fuma ɔ̀nɔ̀kwali ɔ̀ku klésu á, ma mee ɔ̀bɔ̀pu fú klé há fú?

13 “Osúmpó ɔ̀kuku méetalí sùm awie anyo. Ɖ̀bódwe ɔ̀kule, lú ɔ̀kule. Ntée obóbu ɔ̀kule, omóobu ɔ̀kule. Fóméetalí sùm Bulu, sùm Kóba.”

Yesu Ason Blíhé Kɔ̀

(Mateo 11:12-13; 5:31-32; Marko 10:11-12)

14 Farisifɔ̀ bɔ̀tɔ̀dwé kóba. Mó su bréá bonu Yesu ason blíhé anfi á, bɔ̀bwe mu ahinlá. 15 Inu Yesu lébláa amú ɔ̀béé, “Mlɛlé iwɛ súná ání aha yilé mligyí ahá ansító, táme Bulu mó yin mli klɔ̀ntɔ̀. Tsúfé tóá nyankpɔ̀sa tekíá ɛ̀bu labi igyi Bulu akísító.

16 “Mose Mbla ámu pó Bulu ɔ̀nɔ̀sú atɔ̀ípú amu ason wanlínhé lɔ̀yo agyómá alu bɔ̀fon Asú Ɖ̀bɔ̀pu Yohane brésó. Tsú musu bude Bulu iwígyí ámu iwɛ ason wankláán ɔ̀kan da, ahá é budeprú wie mótó. 17 Ɖ̀sú móa así bétalí mó ɔ̀nɔ̀, táme itoduáhé ntée asúnbi ikule kóráá móowu Mose Mbla ámutɔ̀.

18 “Oyin okíná mu ka láyétsiá ɔ̀tsi bámbá á, alató mbua. Oyingyíoyin ání otsiá ɔ̀tsi ání mu kulu lakíná mu é lató mbua.”

Iwɛ Onyapó Ɖ̀ku Mva Lasaro

19 Yesu lébláa amú ɔ̀béé, “Iwɛ onyapó ɔ̀ku létsiá. Atati wolihɛ ɔ̀tedídá, otegyi nkpa wankláán ekek-egyíeke. 20 Ató ɔ̀kólípú ɔ̀kúá mu iwɛ letsitsíí nɔ̀ é létsiá. Bɔ̀tɛ́ti mu Lasaro. Betsiá pó ohiáni ánífi yéyaí iwɛ onyapó ámu ɔ̀kpa ɔ̀nɔ̀. 21 Ɖ̀kíá obénya atogyihɛ mpupubiá ɛ̀békpa kpáa bun oyin ámu ɔ̀pónóasi gyi. Akíai létsiá beyintá mu nɔ̀ ámu kóráátó.

22 “Bréá ohiáni ánífi lówu á, Bulu-abɔ̀pu botsu mu ya, oleyétsiá aní náin Abraham wá ɔ̀súsú. Iwɛ onyapó ánífi é lóbowu, bopulá mu. 23 Ɖ̀ɔ̀yo ɔ̀bu isubúti ogyá ání itamaduntɔ̀, ɔ̀de iwɛasɛn wúun.

Olotsu ansí fọ́á, olowun ání Lasaro tsie Abraham wá tsútsúútsú. ²⁴ Inu ọ̀kplón ọ̀bée, ‘Aní sí Abraham-ée! Wun mi nwe, afoha Lasaro ọ̀yọ̀pọ̀ mu osrebi da ntsutso pọ̀bẹ̀da mí ọ̀dandọ̀sọ̀, ilwii kpalobí. Nde iwiasin wúun ogyá ánfító ọ̀bẹ̀!’

²⁵ “Támẹ Abraham lébláa mu ọ̀bée, ‘Obí, kain, fọ̀ nkpatíátọ̀ a, fegyi ọ̀dwe, Lasaro é letsiá ọ̀sintọ̀. Séí á, ọ̀bẹ̀ ọ̀dwetọ̀, fọ̀ é fọ̀bẹ̀ ọ̀sintọ̀. ²⁶ Ọ̀ma a, ilán kponkpọ̀nkponnti ku da ania fonyo nsiné. Mó sọ́ ọ̀haa méetalí fá tsú nfi ba fọ̀ wá inu, ọ̀haa é méetalí fá tsú inu ba aní wá nfi.’ ²⁷ Oyin ámu lébláa Abraham ọ̀bée, ‘Mómọ̀ nobwíí ipa, aní sí Abraham, wa Lasaro sisi mí sí wóyítọ̀. ²⁸ Mbẹ̀ apio yinhé abanú aku inu, ọ̀yẹ̀da amọ̀ ọ̀lá, méni bowú á, bọ̀mẹ̀eba bowun iwiasin ánfí odu.’

²⁹ “Abraham léle mú ọ̀nọ̀ ọ̀bée, ‘Mose muva Bulu ọ̀nọ̀sú atáípọ̀ amu nwulọ̀ bẹ̀ amọ̀ wá, ide amọ̀ ọ̀lá da. Bọ̀núu mú, abugyi mọ̀sú.’ ³⁰ Oyin ámu léle mú ọ̀nọ̀ ọ̀bée, ‘Aní sí Abraham, asún ámu nu keke mécha amọ̀ abudamli klontọ̀. Mboun ní ọ̀ku ọ̀kọ̀sú tsú afúlitọ̀ yọ̀ amọ̀ wá á, bédamli klontọ̀.’ ³¹ Támẹ Abraham lébláa mu ọ̀bée, ‘Ní bọ̀megyi Mose muva Bulu ọ̀nọ̀sú atáípọ̀ amu nwulótọ̀ asún ámu sọ̀ á, ọ̀ku ọ̀kọ̀sú tsú afúlitọ̀ yọ̀ inu kúráá á, bọ̀mọ̀onu ọ̀há ámu asún.’ ”

17

Lakpanbwe

(Mateo 18:6-7, 21-22; Marko 9:42)

¹ Yesu lébláa mu akasípọ̀ amu ọ̀bée, “Ibwébwéé́bwéé́ á, tọ̀ku béha nyankpọ̀sa ọ̀bọ̀bwe lakpan, támẹ ọ̀há ání ina mu sọ̀ mu ba ló́bwe lakpan ọ̀yọ̀wọ̀ ní. ² Ní ọ̀ku léha ahá ánfí bọ̀mọ̀kúdan mísú hógyitọ̀ ánfító ọ̀ku

lóbwe lakpan á, ní beda nfúókwebu síán mu ameto, tswi mu wá opu okluklúkpá pó á, ibu alé don. ³ Mú su mlíkí mlí iwí wankláán.

“Ní fò bá opu ilá gyi fu á, wa iyin wa mu. Ní adamlí kluntá á, sikie mu. ⁴ Ní opu ilá gyi fu tse sienó* ekewóle owító, aléla bobwií ipa há fú á, sikie mu.”

Hógyi

⁵ Yesu sumbí ayopó ámu bebláa mu beε, “Ha aní hógyi imoni tsiá.”

⁶ Yesu léle mú onó obée, “Ní mlí hógyi lómoní fé takyí-akpin ibí á, mlétalí bláa kelí ánfí mlíaa, ‘Pulí yelí oputo.’ Ibóbwe dínká músú.

Osúmpó Gyumagyihε

⁷ “Ní mlítá oku bu osúmpóá otáyó agyómá mu ndoto ntée otelí mu akúfasu, otsú agyómátó ba a, bláa mu wie tebláa mu obée, ‘Wa asa bwe afogyi ató?’ Ekekeke! ⁸ Bláa otelbláa mu obée, ‘Tsu tati saba, afobotswi opónú ha mi. Belí mí angyi ató. Negyi ta á, fayégyi fú klé.’ ⁹ Otadá osúmpó amu ipán obée, alabwé tóá mowa mu bwe? Ekekeke! ¹⁰ Iní su ní mlí é mlóbwé tóá bowa mlí bwe tá á, mlíblí mlíaa, ‘Asúmpó keke anigyí. Tóá igyi aní bwehé anlabwé á.’ ”

Iló Pεpe Alópó Dú Tsa

¹¹ Yesu ná Samaria pó Galileafá okasu oyó Yerusalem. ¹² Bréá aléta wúlu kusu wie tá á, iló pεpe alópó dú aku bona bebá befia mu, besi lí tsútsú. ¹³ Inu bokplón blí beε, “Yesu! Owíé! Wun aní nwe.”

* **17:4** Idesuná aní tsé dódóá opu ilá gyi fu.

14 Yesu lótsu ansí kɪ amú, ɔlebláa amú ɔbéε, “Mliɔv mli iwɪ yosuná Bulu igyí ɔhapó.†”

Bréá bɔɔv ɔkpa bɔyó á, amú iwɪ léplɪ. 15 Ɔkule mú lówun ání mv iwɪ laplí a, oleyinkí ɔdekplón kanfó Bulu kóklókúú. 16 Olebemlí bún Yesu ayabitɔ, ɔde mv ipán da. Samariayin oyin ánfɪ gyí. 17 Inu Yesu léfité ɔbéε, “Megyí ahá idú natsá? Mú kwebá atráhe mé? 18 Mú sv amótó ɔkukv méba bekanfó Bulu dɔn Samariayin ɔfɔ́ ánfɪ nkule?” 19 Inu ɔlebláa oyin ámv ɔbéε, “Kusv natɪ. Fú hógyi latsá fú ɪɔ.”

Bulu Iwiegyi Amv Ibá

(Mateo 24:23-28, 37-41)

20 Farisifo aku befité Yesu beε, “Ɖmenke Bulu iwiegyí ámv ibéba?” Yesu lébláa amú ɔbéε, “Megyí tóá ɔha ɔbóɔv ansíbi wun Bulu iwiegyí ámv igyi. 21 Ɖhaa méetalí blí ɔbéε, ‘Kɪ, múbv nfi.’ Ntéε ‘Múbv nána á.’ Tsúfé mli klɔntɔ Bulu iwiegyí amv bv.”

22 Inu Yesu lébláa mv akasípú ɔbéε, “Eke ɔkv ibá, mlódunká ání mlówun mí, Nyankɔusa-Mv-Bi ánfɪ ekewóle pé, táme mlimóowun mú. 23 Ahá bébláa mli beε, ‘Ɖbv nfi.’ ntéε ‘Ɖbv nána,’ táme mlimásrí buo amú yéklɪ. 24 Tsúfé mí, Nyankɔusa-Mv-Bi ánfɪ ɔbáke bóbwe fé alɪ ámvú nyankɔv ɔfwi ɪbi, bɔtowun mú nsaintɔ féé ámv. 25 Táme négyankpá wun iwɪɔsun tsɔtsɔtsɔ, ndemba-abí ánfɪ é békiná mí. 26 Alɪ ámvú ilegyi Noa brésú amv a, alɪ ibégyi mí, Nyankɔusa-Mv-Bi ánfɪ é ɪbábɪ nɪ. 27 Ahá betsiá, bɔde ató gyí, bɔde ntá núu; bɔde aká tsiá, bɔde atɪ kítá há akúlu alu yófon ekeá Noa lówie mv dáka kɔɔnkɔntɪ ámvɔ, ntsu lóbulá bɔmɔ amú féé. 28 Alɪ kén ɪleba Lot é brésú nɪ. Ahá betsiá, bɔde ató gyí,

† 17:14 Abɔbɪ ání mli iwɪ laplí Mose mbla ɔkpasv.

bude ntá núu, bude ató hóo, bude ató fε; bude ató du, bude ibu yíi, ²⁹ yófun ekeá Lot lédalí Sodom wúluto, ogyá móa atonkodu lotswie tsu ɔsúsú behi amó fée. ³⁰ Alí kén mí, Nyankpɔsa-Mv-Bi ánfɪ iwɪɔwanleké bófwie ahátɔ ní.

³¹ “Eke ámv a, ɔhá ání ɔdin obusu, mv ató ibu obuto ɔmákpɪ́ botsu tɔtɔ. Alí kén ɔhá ání ɔbu ndɔtɔ é máyinkí botsu tɔtɔ ní. ³² Mlikain Lot mv ka asónsú! † ³³ Tsúfé ní ɔku lódunká ání ɔbéprɪ mv nkpa á, ɔbóhólú mv. Táme ní ɔku lóhólú mv nkpa á, ɔbélanyá mv. ³⁴ Nde mli bláa mbée, alí eke ámv onyé á, ní ahá abanyó buda ɔklan kulesv á, Bulu obótsu ɔkule sí ɔkule.

³⁵⁻³⁶ “Ní atsi abanyó bude nfúó kwe á, Bulu obótsu ɔkule sí ɔkule. §” ³⁷ Yesu akasípú amv befité mv beε, “Ani Wíe, nkónó ibéba?”

Yesu lébláa amó ɔbée, “Ɔtínéá itɔ wuhé da a, inó alása butefia ní.”

18

Ɔsvrapv Mva Asón Ogyípú Ɔku

¹ Inu Yesu léha yébi ku púsúná ání bobóo mpái brégyíbré, imákpɔn amó. ² Ɔlebláa amó ɔbée, “Asón ogyípú ɔku létsiá wúlu kusv. Ɔtamanyá Bulu ifú, ɔtamanyá ɔhaa é péli. ³ Ɔsvrapv ɔku é létsiá wúlu amɔtɔ. Oletsíá bokokóli mv ɔbée, ogyíi mv asón ɔɔkwalisv ha mv, ɔle mv tsu mv olupú ibitɔ! ⁴ Teki olekle okina, táme ɔma-ɔma a, ɔlebláa mv iwɪ ɔbée, ‘Ibu mótóá ntamanyá Bulu ifú, ntamanyá ɔhaa é

† **17:32** Bréá omobu Bulu, ɔledamlí kɪ ɔma a, olemlí nfóhísín. Kɪ Genesis 19:26. § **17:35-36** Mótó yée 36 bu nwuló dada amv akotɔ: Ní ayin abanyó bude agyómá yɔ ndɔ kuletɔ á, Bulu obótsu ɔkule sí ɔkule.

pélu. ⁵ Táme ali ánfí ɔsurapu anfi ná ɔde mí háan anfi su á, négyi mu asún ɔnɔkwalisu. Ní megýí ali á, oméesi mí tói wa. Ɔmééha mméenya ɔkpa bwé tɔtɔ.’ ”

⁶ Yesu lóyɔ mósú ɔbéé, “Mlíki alíá asún ogyípú anfi ɔtamagyi asún ɔnɔkwalisu ánfí lablí. ⁷ Múmú nkáli Bulu mú méegyí mu ahá ámú alalé, budesú kpólí mu ɔpa-onyé ámu asún ɔnɔkwalisu? Obési amú asún wá obiátót? Ekekeke! ⁸ Nde mlí bláa mbéé, obégyi mú ɔnɔkwalisu há amú ɔsasú. Táme ndefíté mbéé, ní mí, Nyankpɔsa-Mv-Bi ánfí neyínkí bá a, nówun ahógyipu aku ɔsulúv anfisú?”

Lampóo Ɔhópɔ Mva Farisiyin

⁹ Yesu létrá ha yébi ku púsúná amú ató tsú ahá ání buteki amú iwí yilé abwepú dɔn amú aba. ¹⁰ Ɔléha yébi amú ɔbéé, “Ayin abanyó aku bɔdu yó mpái ɔbɔkpá Bulu ɔtswékpa. Amótót ɔkule gyí Farisiyin, ɔkule é gyí lampóo ɔhópɔ.

¹¹ “Farisiyin amú lókusú líí, bó mpái wá nwuntɔ ɔbéé, ‘Bulu, nedá fú ipán ání mmegýí fé aku. Mí mú mma ɔnsípe, ntamasísi ɔha, ntamató mbɔa, mmegýí fé Lampóo ɔhópɔ anfi é. ¹² Nteklí ɔnó tse nyɔ ndawótswí ikoleto. Nteye mí ató féétót dú, lé idúsí há fú.’

¹³ “Táme lampóo ɔhópɔ amú mú léyelí tsútsú, oloko nwuntɔ wá. Omotsulá tsú ansí kóráá fúá kú ɔsósú. Ɔlɔpɔ ɔbumáa dá ibitɔ, kókóli Bulu ɔbéé, ‘Oo Bulu, wun mi nwe, lakpan ɔbwepú ngyi.’ ” ¹⁴ Yesu lómɔ mú ɔnó ɔbéé, “Nde mlí bláa mbéé, asa beyínkí yó wóyí á, Bulu ansí légyi lampóo ɔhópɔ amú iwí dɔn Farisiyin amú. Tsúfé ɔhá ání ototsú iwí á, Bulu ɔbéba mu asi. Ɔhá ání ɔteba iwiasí é á, Bulu obótsu mu fúá.”

*Nyebi Yulá**(Mateo 19:13-15; Marko 10:13-16)*

¹⁵ Aha akv bɔpu amó abí ba Yesu bεε, ɔpúu ibi dinka amósú, oyula amó. Mv akasípú bowun amó. Mú sv bɔwa iyin wá amó. ¹⁶ Táme Yesu létu nyebí ámv ba mv iwí wá, ɔlebláa akasípú amv ɔbéε, “Mliha nyebí ámv abuba mí wá. Mlímátin amó ɔkpa, tsúfé ahá ánfí odu bó Bulu iwíegýí amv ni. ¹⁷ Ɔnɔkwali nde mli bláa. Ɔhá ání ɔmɔhɔ Bulu iwíegýí ámv fé kebi á, omóowie mótó.”

*Atonyahé Iwi Atosundhé**(Mateo 19:16-30; Marko 10:17-31)*

¹⁸ Eke ɔkv Yudafo ɔhande ɔkv lébefité Yesu ɔbéε, “Osunápú yilé, ntɔ nóbwe asa nénya nkpa ání itamatá?”

¹⁹ Yesu létíté mv ɔbéε, “Ntogyi só fɔde mí ti ɔha yilé? Ɔhaa mégyí ɔha yilé, nkétu Bulu nkule. ²⁰ Yéε foyin Bulu mbli ámv o. Múgyí, máto mbua, mámɔ ɔha, máwi ató, máka asón dínká fú bású, bu fú sí mv fú yín.”

²¹ Ɔhande amv lébláa mv ɔbéε, “Tsú mí nyebito ɔpá nde mó féésú gyí.”

²² Yesu lónu mv asvn blíhé anfi á, ɔlebláa mv ɔbéε, “Toku kule ilasí ání fóbwe. Yéfe fú iwísv ató féé, afoye kóba amv ha ahiánfo, méní fénya siadiε ɔsósú. Fɔbwé mó tá á, ba afobobuo ni.” ²³ Bréá oyin ámv lónu asón ánfí á, ɔlɔto mv klɔn, tsúfé ɔhíé ɔbv ató.

²⁴ Yesu lówun ání ɔlahan mv. Mú sv ɔleblí ɔbéε, “Ibv ɔnlɔn asa iwí onyapú obówie Bulu iwíegýí ámvto. ²⁵ Lélé mó á, ɔlɔpɔn ha kpósú ání ɔbótsɔn ɔbun-atɔ ɔbótó, dɔn ání iwí onyapú obówie Bulu iwíegýí ámvto.”

26 Ahá ání bonu asón ání befité beε, “Mómó ma mεε Bulu obóhò nkpa?”

27 Táme Yesu lébláa amó obéε, “Tóá nyankpusa méetalí bwé mɔdón Bulu bwε.”

28 Inu Petro lébláa Yesu obéε, “Mí Wíε, kí, anlasí aní wóyí tswí bobuo fu.”

29 Yesu lébláa amó obéε, “Ɔnɔkwali nde mli bláa. Ɔhaa má uná obési mu wóyí, mu ka, mu apíó, mu akwíró ntéε mu abí tswí Bulu iwíegyí ámu su,
30 Bulu méelawá mú otsiákpá há mu tsé dú tsé lafa séi, láha mu nkpa ání itamatá bré ámóú íbá ámυτɔ.”

*Yesu Lowu Iwi Asón Blí Otse Saasi
(Mateo 20:17-19; Marko 10:32-34)*

31 Yesu létí akasípú dúanyɔ ámu ya itsétó, ɔlebláa amó obéε, “Ayó Yerusalem. Inú asón ámóú Bulu ɔnósú atáíró amu bɔwanlín tsú mí, Nyankpusa-Mu-Bi ání íwi ámu fée béba mútótó ní. 32 Béle mí há ahá ání bomegyí Yudafɔ. Bóbwe mí ahinlá, síá mí, tú atsonó wólí mí. 33 Bépití mí ató, mó mí. Mú eke sáási a, nókusú tsú afúlitɔ.”

34 Akasípú amu bɔmonu íni asi, tsúfé Bulu lópuháin amó. Bumebi tóá ɔdeblí é.

*Ansibi Obwiepú Ɔku Ilo Tsa
(Mateo 20:29-34; Marko 10:46-52)*

35 Yesu léta Yeriko wúluto wie tá á, ansibi obwiepú ɔku tsie ɔkpa ɔnó, ɔde ató kulí. 36 Ansibi obwiepú ámu lónu ání ɔɔm budetsún. Múó ɔlefíté obéε, “Amansu igyi?”

37 Ahá bebláa mu beε, “Yesu Nasaretyin amu détsún.”

38 Inu ansibi obwiepú ámu lókpɔlun blí obéε, “Aní wíε Dawid mu na Yesu, wun mi nwe!”

³⁹ Ahá á múú bɔgya Yesu nkpa ámu bəklón wa ansibi obwepó ámu bεε, ɔwáa ɔsa kpa ɔnó bun. Ɔlɛlakplón dɔn alɪ ɔbée, “Anɪ wíe Dawid mu na, wun mi nwε!”

⁴⁰ Yesu lési líí, ɔleha ɔbée bukpá mu ba mu. Bréá bεkpa mu ba a, Yesu léfité mu ɔbée, ⁴¹ “Ntɔ fɔdeklé fεε mbwée ha fu?”

Ɔlɛlɛ mú ɔnó ɔbée, “Owíe, ha mí anwun ató!”

⁴² Yesu lébláa mu ɔbée, “Fó hógyi latsá fó ɪɔ. Wun ató.”

⁴³ Inɔnɔ mu ansibi lobwii, ɔlekplá buo Yesu, ɔde Bulu kanfó. Ɔdɔm amu fée bɔwun ínɪ, amó é bεkanfó Bulu.

19

Yesu Mva Sakeo

¹ Yesu déka tsɔn Yeriko wúlutɔ. ² Lampóo ahópu ɔhande ɔkɔá ɔbu kɔba bu wúlu amutɔ, bɔtetí mu Sakeo. ³ Oyin ánfɪ dékléá ɔbɔpu ansibi wun Yesu, táme ɔma ɪswí, ahá é bɔdɔbɪ. ⁴ Mú su ɔlesrí yódu pɔntɔ-oyí kɔá Yesu ɔbɔtsɔn mú asi, ménɪ obówun mu. ⁵ Bréá Yesu lówie oyí ámu asɪ á, olotsu ansí fɔá, wun Sakeo, ɔlebláa mu ɔbée, “Sakeo, wa ɔsa kplɪ ba. Nde, fó wóyí nɔswí ní.”

⁶ Sakeo lówa ɔsa kplí, pú ansigyí kpá mu ya wóyító. ⁷ Ahá ání bɔwun mú fée bɔwuntí bεε, “Oyin ánfɪ layóswí lakpan ɔbwepó wóyító.”

⁸ Sakeo lókɔsú líí wóyító ɪnɔ, bláa anɪ Wíe Yesu ɔbée, “Mí Wíé, kɪ, néye mí atótó anyɔ, pú ɪfɔn kíé ahiánfɔ. Ní nasísi ɔkɔ é á, nélahá mu mú aku ana.”

⁹ Yesu lébláa mu ɔbée, “Nde Bulu laho wóyí ánfɪ nkpa, tsúfé Abraham mu na ɔní ánfɪ é gyí. ¹⁰ Ahá

ání bafwí odunkákpa mí, Nyankpɔsa-Mv-Bi áñfi neba, anhɔ amú nkpa.”

Asúmpú Kóba Ha
(Mateo 25:14-30)

¹¹ Ahá ámu buɔe asún ámúú Yesu déblí ámu nu. Alí bré ámúto á, Yesu latá Yerusalem wie tá. Mú su ɔleha amú yébi pútswíí amú, tsúfé buɔesusúu beɔ Bulu iwíegýí béfi así inunv. ¹² Ɔleha yébi amv ɔbéɔ, “Iwi onyapú ɔkv lóbwɔe agywun ɔbéɔ, mótu ɔkpa yó amú owíe dehen wá, ɔyai mv owíe, oyinki begyi iwíe mv ɔmátó. ¹³ Asa ɔbóyɔ á, ɔleti mv asúmpú idú, oleye póɔnv kolekule há amú féé. Ɖlebláa amú ɔbéɔ buɔúyɔ agyúmá yófun ekeá méba. ¹⁴ Táme mv wúluto ahá bolu mv, wá abí buo mv beɔ, buɔmedékléá ɔbwéɔ amú owíe.

¹⁵ “Táme mú óó á, owíe dehen amv léyai mv iwíe amv, ɔlesankí ba wóyí. Olenya wíé pé ɔleha beti mv asúmpú amv, ɔkí tóá banyá dínká kóba amvsv. ¹⁶ Ogyankpapo léba bebláa mv ɔbéɔ, ‘Mí wíé, nanyá póɔnv dú tsía fú klé amúto.’ ¹⁷ Múú ɔlebláa osúmpú amv ɔbéɔ, ‘Fabwé ató. Osúmpú wankláán fúgyi. Iníá fawá ɔnɔkwali itó túkúrííbi áñfi iwi sv á, nópɔ awúlu idú wá fú ibito, féki músú.’ ¹⁸ Onyɔɔsi léba bebláa mv ɔbéɔ, ‘Mí wíé, nanyá póɔnv anu tsía fú klé amúto.’ ¹⁹ Owíe amv lébláa mv ɔbéɔ, ‘Fú é féki awúlu anusu.’

²⁰ “Ɖbambá é léba bebláa mv ɔbéɔ, ‘Mí wíé, fú sika ámu ni. Neda mú wá dúkubi ɔnó yáí. ²¹ Nyin fu. Nɔe fú ifú nya, tsúfé fú asún bu ɔnlɔ. Futotsú ató ɔtínéá fómɔɔv tɔto yáí, fútokpótí ató é ɔtínéá fómɔdu tɔto.’ ²² Mv wie amv lébláa mv ɔbéɔ, ‘Osúmpú laláhe. Fú ɔnótó asún nópɔgyi fv asún. Yéɔ fuyin áñfi mí asún ihíe bu ɔnlɔ, ntotsú ató ɔtínéá mmɔɔv tɔto tswi,

kpótí ató òtínéá mmodu tótò a? ²³ Mú ntogyi sù fómòpò mí kóba amu yótswí sika òyaíkpa. Fékí ní neyínkí ba a, nýyòhò móa mósó abí?”

²⁴ “Ìnu owíe amu lébláa ahá ání búbu ìnu òbée, ‘Mlìswu osúmpó anfi kóba amu ha òmòamóò olenya idú ámu.’ ²⁵ Táme ahá ámu bebláa mu bee, ‘Nanáin, òbu pòònu dú dodo o!’ ²⁶ Owíe amu lébláa amú òbée, ‘Nde mlì bláa mbée, òhá ání odekléá obónu mí atosunáhé amu asì á, Bulu òbòpò ìku tsía mótó há mu. Táme òhá ání omedékléá obónu mí atosunáhé amu asì á, Bulu òbòswí mu kpalobí ámuó alabí ámu kóráá. ²⁷ Séi á, mlìkpa ahá ámuó bókusú líí mísú bee mmágyi iwíe amu ba, amlìbòòmómó amú mí ansító nfi!’ ”

Bòhò Yesu Fé Owíe Yerusalem

(Mateo 21:1-11; Marko 11:1-11; Yohane 12:12-19)

²⁸ Yesu léha amú yébi anfi tá á, òlòtsun gyankpá pò òyó Yerusalem. ²⁹ Òlèta Betfage móa Betania awúluá idin Nfò-nyíbu* ámusu wie tá á, òlòwa mu akasípú abanyó gyankpá, ³⁰ bláa amú òbée, “Mlìyò wúlu anfi ida mlì ansító ánfisù. Ní mlowíe wúlu ònó á, mlówun afrímú kanáhe òku da òfétó, òhaa mókótsíá musu kí. Mlìsankì mu ba mi. ³¹ Ní òku òfité mlì òbée, ‘Ntogyi sù mlìdé mu sankí?’ á, mlìbla mu mlíaa, ‘Anì Wíe dé mu hián.’ ”

³² Akasípú abanyó ámu bọyówun afrímú kanáhe ámu fé alíá Yesu lébláa amú. ³³ Bréá buđe mu sankí á, mu awíe befíté amú bee, “Ntogyi sù mlìdé mu sankí?”

³⁴ Bèlè mú ònó bee, “Anì Wíe dé mu hián.” ³⁵ Besi bèkpa afrímú kanáhe amu ba Yesu, beyaí amú atati

* **19:29** Nfò-nyíbu igyi obubwí koá ìbu mantáa Yerusalem, bútetí mú Olifbu.

dínká m̄osu, tsú Yesu bian m̄osu. ³⁶ Bréá Yesu tsie m̄osu oyó á, ahá ám̄u b̄ekpa amó atati yáí tswi okpat̄o, olenatí m̄ósú t̄sun.

³⁷ Bréá Yesu lówa Nf̄o-nyíbu ám̄u kplí oyó Yerusalem wúlut̄o bi a, m̄u abúop̄u am̄u f̄éé b̄atswi opé kánfú Bulu kóklókú, ofúla amóú olobwe, bowun am̄u f̄éé su. ³⁸ B̄ee, “Bulu oyúla owíe anfi obá m̄u dátó anfi! Iwilwii bu osósó. Numnyam ibwéé Bulu klé osósósó inu.”

³⁹ Farisif̄o ak̄u b̄ub̄u od̄am am̄ut̄o. Inu bebláa Yesu b̄ee, “Osunápó, ka f̄o abúop̄u anfi itin!”

⁴⁰ Yesu lébláa amó obéé, “Nde mli bláa mbéé, ní ahá anfi behíé kpá onó bun kóráá á, abwi anfi bókpl̄un kanfú Bulu.”

Yesu Lósú Yerusalem Su

⁴¹ Bréá Yesu léta Yerusalem wie tá, olowun wúlu am̄u sísí á, olosu ha mó. ⁴² Obéé, “Yerusalemf̄o, tek̄i ilehián aní mlébi tóá itopú iwilwii ba nde, tám̄e m̄limétálí bí mó. ⁴³ Bré ku íbá, mli alupó békafia mli abuntii, pwé okpó wá mli, sá mli tin okpagyíokpasu. ⁴⁴ Béh̄i wúlu anfi pó mótó atsiápó. B̄uméesi íbwi k̄ule dínká mó bású, tsúf̄e m̄limébi bréá Bulu léba mli nkpa ohókpa!”

Ibíá Agyípó Gyáa Le Bulu Otswékpa Wunsinésó

(Mateo 21:12-17; Marko 11:15-19; Yohane 2:13-22)

⁴⁵ Bréá Yesu lówie Yerusalem a, ob̄oyo Bulu otswékpa wunsinésó. Olenya wíe inu alí, ob̄owa íbíá agyípó gyáa bi. ⁴⁶ Obebláa amó obéé, “B̄owanlín wá Bulu asón am̄ut̄o b̄ee, ‘Béti mí otswékpa b̄ee, mpái obokpá.’ Tám̄e m̄lilapó inu mli awikplu ohaínkpá.”

⁴⁷ Oletsiá súná ató Bulu otswékpa inu ekek-egyíeke. Bulu igyí ahapó dehen, Mose mbla

asunápo pú Yudafo ahande amv bodunká okpa ání bótson mósú mó mv. ⁴⁸ Táme bumenya, tsúfé ahá ámv féé bubuo mv asv n blíhé.

20

Yesu Túmi Iwí Asv n Fitéhé
(Mateo 21:23-27; Marko 11:27-33)

¹ Èké okv Yesu bv Bulu otswékpá wunsínésú inv oðe Bulu asv n wankláán ámv okan da, oðe ató suná. Inv Bulu igyí ahapó dehen, Mose mbíla asunápo pú Yudafo ahande beba botv mv. ² Befité mv beé, “Ma léha fú okpa fóde ntobí ánfí bwe? Ma léha fú túmi?”

³ Yesu léle mú onó obéé, “Mí é nfité mlí asv n kua kvle. ⁴ Bulu wá Asú Obopú Yohane lénya túmi póbó ahá asú lóó, ntéé nyankpusa? Mlíbla mv.”

⁵ Amó wulewule boyo asv n ánfito beé, “Ní ablí aníaa itsú Bulu wá á, obéfité aní obéé, mú ntogyi sù anímóhó mv gyí? ⁶ Ní ablí aníaa nyankpusa wá é á, oðom anfi béda aní abwi mó, tsúfé bohogyi ání Bulu onósú otáipú Yohane gyí.” ⁷ Mú sv bele mú onó beé, “Ohwée! Anímeyín otínéá olenya mv túmi tsú.”

⁸ Yesu lébláa amó obéé, “Mómú mí é mméébláa mlí túmi oduá ndepubwé ntobí ánfí.”

Apafó Laláhe Akv
(Mateo 21:33-46; Marko 12:1-12)

⁹ Inv Yesu létrá ha amó yébi obéé, “Odotopv okv lódo wáin ndo, otovv ndo ámv wá apafó ibito, tú okpa yó omá koto yétsiá inv nfi-nfi. ¹⁰ Bréá wáin-abí ámv kpótíbi lófon a, otowa mv osúmpú apafó ámv wá obéé, oyóhó mv ogyíkpá ba mv. Táme apafó ámv beba obí ámv, gya mv sísí ibikpan. ¹¹ Odotopv amv lélawá mv osúmpú nyosv amó wá. Apafó ámv beba mv, sópa mv, gya mv é sísí ibikpan. ¹² Oletrá lawá

ɔba saási. Apafɔ ámu bepilán mu, gya mu lé ndɔ ámutɔ. ¹³ Mú ndɔ mu wie amu léblí ɔbéε, ‘Nkálí kúráá nóbwe? Nónwa mí onutó mí bí ɔdwepó amú wá. Fialí bóbu mu mú.’ ¹⁴ Táme bréá apafɔ ámu bowun mu bi ámu sísí á, bebláa aba beε, ‘Ɔni obégyi mu si ató ní. Mliha amɔ mu, méní ndɔ ámu ibémlí aní klé.’ ¹⁵ Inu bekitá mu, bítía mu dáli ndɔ ámutɔ yómɔ mu.

“Ntɔ mlílahogyi mliha ndɔ mu wie amu ɔóbwe apafɔ ánti? ¹⁶ Ɔbéba bɔmɔ amú, pó ndɔ ámu wá apafɔ bámbá íbitɔ.”

Bréá ahá ámu bonu asón ánti á, beblí beε, “Ɔni mú itsúun anisú!”

¹⁷ Yesu lékí amú ansító díín, ɔlefíté amú ɔbéε, “Bulu asón ánti así mé? ‘Ibwi ámutú obu ayípu bekiná ámu lébemlí okonkísóbwi ní.’

¹⁸ Ɔhagyíɔha ání ɔledida íbwi ámutusu obébiabía blúblúblúblú. Ní íbwi ámu isúnkí dá ɔkusú é á, íbókwe mu fikófíkáfikó fé nfúó.”

Lampóoka

(Mateo 22:15-22; Marko 12:13-17)

¹⁹ Ilɔwankí Mose mbla asunápú pó Bulu igyí ahapó amu ání amú iwí yébi alahá. Inu bekleá békitá mu, táme benya ahá ámu ifú. ²⁰ Mú su bodunká ɔkpa ání bótsun músó kítá Yesu. Inu bele ahá beε bupína bwe iwí fé aha wankláán, abote mu kí beε bónu asuanku tsú mu ɔnó, méní béli músó kítá mu ya ɔmású ogyípú. Mubúu túmi gyi mu asón. ²¹ Yesu atépu amu befité mu beε, “Os-unápú, aniyin ání ɔnɔkwali pu fuyi, fútosúná mú é. Futamakí ɔhaa ansító. Mboún fútosúná Bulu ɔkpa ámu ɔnɔkwalisu. ²² Afíte fú! Aní mbla leha ɔkpa ání

akáa lampóo ha Roma owíe dehen Kaesare, ntée animáka?”

²³ Táme Yesu lówun amó agywun. Mú su òlebláa amó òbée, ²⁴ “Mlupu kóba amu ku ba mí anki.” Bəpuba mu. Múò òlefíté amó òbée, “Ma nwun pó mu idá dín mósó?”

Béle mú ònó bεε, “Kaesare.”

²⁵ Múò òlebláa amó òbée, “Mómú mlupu tóá igyi Kaesare klé ha Kaesare, amlupu móá igyi Bulu klé é ha Bulu.”

²⁶ Mú su bumetalí líi Yesu asun blíhé anfisun kítá mu ahá ámu ansító. Ònó é lobwie amó, bumetalí trá bwíí ònó.

*Kvsú Tsú Afúlitó Iwí Asun Fitéhé
(Mateo 22:23-33; Marko 12:18-27)*

²⁷ Sadukifó ɔpasua boteblí bεε, kvsú tsú afúlitó ma inu. Amótó aku beba Yesu wá, ²⁸ befité mu bεε, “Osunápó, Mose lówanlín tswi aní òbée, ‘Ní ɔku muva mu ka buɔkwíí asa olowu sí mu ka ámu a, mu pio otsú mu ka ámu tsia, féki ɔkwu ha owupú ámu.’” ²⁹ Oyin ɔkole abí abasiénó aku betsiá. Amótó ogyankpapu létsiá ɔká, táme ɔɔkwíí asa olowu.

³⁰ Mu gyama lótsu ɔsurapuka amu tsía, táme mu é ɔɔkwíí. ³¹ Ɔsaasi é lótsu ɔtsi ámu tsía. Mu é ɔɔkwíí. Alu yótu osienósí amu. Amótó ɔkuku mókwíí asa olowu. ³² Ɔma-ɔma a, ɔsurapu amu é lóbowu. ³³ Afúli ɔkvsúké a, amótó ɔmɔmu ɔbóbwe mu kulu? Tsúfé amó abasiénó ámu féé betsiá mu.”

³⁴ Múò Yesu léle mú ònó òbée, “Ɔyí ánfító ahá tétsiá aká móa akúlu. ³⁵ Táme iméeba alí bré ámuó íbá ámuɔ. Ahá ámuó bɔfon aní bóksó tsú afúlitó, tsía nkpa ɔyí ámuó íbéba amuɔ ámu mú buméetsiá akúlu, buméetsiá aká. ³⁶ Bumeétrá wu, tsúfé bóbwe fé Bulu-abəpu. Bulu ahá bugyi, tsúfé

bakósú tsú afúlitó. ³⁷ Aní náin Mose kóráá lówanlín ató tsú afúlikusó iwí. Tsúfě olówanlín ɔbée, eke ámú olowun oyíbi kú de ogyá tsií, táme imeđéhóo amú a, ɔleti Bulu ɔbée, ‘Abraham mva Isak pú Yakob Bulu.’ ³⁸ Megyí awupó Bulu ógyi, akiankpaw Bulu ógyi, tsúfě mú ansító mú á, amó fěé bobu nkpa.”

³⁹ Inu Mose mbla asunápó amú aku beblí bee, “Osunápó, fabí lé mú ɔnó!” ⁴⁰ Mú su amótó ɔkukukú métrá wa klɔn fité mú asvansu.

Ma Gyí Kristo Amú?

(Mateo 22:41-46; Marko 12:35-37)

⁴¹ Inu Yesu léfité mbla asunápó amú ɔbée, “Nkáli ɔbwe asa ahá bee, Owíe Dawid mú na gyí Kristo amú? ⁴² Tsúfě owíe Dawid onutó léblí Israelfó ɔb ámúto ɔbée,

‘Aní Wíe Bulu lébláa mí Wíe ɔbée,

Tsia mí gyɔpɔsu,

⁴³ yófun bréá nópú fú alupú bwé fú ayabi oyíkpa.’

⁴⁴ Owíe Dawid létí Kristo amú ɔbée, mú wie. Mú nkáli su ɔtráa ogyi mú na?”

Mose Mbla Asunápó Tsiátó

(Mateo 23:1-36; Marko 12:38-40)

⁴⁵ Inu ɔlebláa mú akasípó ahá ámú ansító ɔbée, ⁴⁶ “Mhíkí Mose mbla asunápó anfi wankláán. Butekle ligá wa náti kí. Butekle bee ahá bobún ha amó itsiá dɔnsu. Otsiákpá yilé butekle tsiá Yudafo ofiakpa pú nke ogyíkpa. ⁴⁷ Butɔswíí asvrapu amó wóyí, butepina bɔ mpái tɔntíntín ahátó póbun amó lalahesu. Bulu ɔbébutí amó ɔsu kínkínkín!”

21

Ɔsurapu Ɔku Tswitswi (Marko 12:41-44)

¹ Bréá Yesu tsie mantáa tswitswi dáka ámu Bulu ɔtswékpa inu á, olowun alíá ahá ání amú íbitɔ bu odwin buɔɛpu kóba akpɔnkpɔnti bɔwa dáka ámutɔ. ² Inu ɔsurapu ohiáni ɔku é lópu mu kóba ana bɔwa mótɔ. ³ Múú Yesu lébli ɔbée, “Ɔnɔkwali nde mli bláa, tswitswiá ɔsurapu anfi, ɔma tɔtɔ anfi lawá á, idun ɔhagyíɔha klé. ⁴ Tsúfé atráhe amu fée á, amú kóba tsɔtsɔtsɔ balé kpalobí tsú bɔwa. Táme ɔsurapu anfi mú íniá ɔma tɔtɔ su tɔá ɔbu fée alapɔ bɔwa á.”

Bulu Ɔtswékpa Amu Bwie (Mateo 24:1-2; Marko 13:1-2)

⁵ Yesu akasípú aku buɔɔtɔí tsú alíá bɔpu abwi ání ibu bíá yi Bulu ɔtswékpa amu, pú atokiehé wankláán lá mótɔ. Táme Yesu lébláa amú ɔbée, ⁶ “Bré ku íbá, bóbwie mú fée bun. Ibwi kule kóráá méesian dínká mú bású.”

Iwɔsin Múa Ikplán (Mateo 24:3-14; Marko 13:3-13)

⁷ Múú mu akasípú amu befité mu beɛ, “Osunápú, bré mɔmɔtɔ íni fée béba? Osúna mɔmu abɔpɔbíá bré ámu ílafun?”

⁸ Inu Yesu lébláa amú ɔbée, “Mliki wankláán, méni ɔhaa méemlé mli. Tsúfé ahá tsɔtsɔtsɔ bɔpu mí dá ba beɛ, amúgyí Kristo amu ni. Mú bré lafun ta, táme mli mábuo amú. ⁹ Ní mlonúá ísá múa kpokiti ladá á, opúni mátsíí mli. Tsúfé ilehián ání íni aná bégýankpá bá, táme ɔyí ɔnómɔké íméeba inuɔnu.”

¹⁰ Inu ɔlebláa amú ɔbée, “Ɔmá bókɔ aba. Awíe bókusú líí abasu. ¹¹ Ɔsolúu íbékɔnkí ntíné-ntíné.

Akón móa ðo tsánkíhé é béba ntíné-ntíné. Ntobíá ihíé bu ifú pò osúna akpɔ̀kpɔ̀nti béba tsú ɔ̀sósó. ¹² Táme asa mó fээ́ béba a, békítá mli, béhie dínká mliṣu, pò mli ya Yudafo ofiakpa yégyi mli asón, wá mli obu. Mí su békpa mli ya awíe pò ɔ̀másó agyípó ansító. ¹³ Ini ɔ̀béha mli ɔ̀kpa mlétalí gyi mí iwí adánsíe súná amó ní. ¹⁴ Táme mli máhan mli iwí susúu alá mléle iwí ɔ̀nó. ¹⁵ Tsúfé néha mli nyánsa móa ɔ̀nɔ̀wanki, mli anyabá ámɔ̀tɔ ɔ̀kɔ̀kɔ̀ méetalí gyi mli nwéen. ¹⁶ Mli akwíyó, mli apió, mli wóyító ahá pò mli anyawíe kóráá béle mli há, bómɔ mli tɔ̀ aku. ¹⁷ Mí su ahá fээ́ bólu mli. ¹⁸ Táme mli nwunṣu-imi kɔ̀le kóráá móɔ̀fwí. ¹⁹ Ní mletalí líi kínkín á, mlénya nkpa ání itamatá.

*Yerusalem Bwie Iwí Asón Blí
(Mateo 24:15-21; Marko 13:14-19)*

²⁰ “Ní mlowun ání isá akɔ̀pó bakáfia Yerusalem wúlu a, mli bíá wúlu amu íbá obwiekpá. ²¹ Mómó ahá ání bɔ̀bɔ̀ Yudea ɔ̀mátó bɔ̀sríi yɔ̀ abɔ̀ṣu. Ahá ání bɔ̀bɔ̀ Yerusalem wúlutɔ̀ bɔ̀dálí. Amóá bɔ̀ma wúlu amɔ̀tɔ é bɔ̀máýinkí ba. ²² Tsúfé alí nke ámu íbóbwe Israelfo íṣubítí nke fé alá Bulu ɔ̀nósú atóipó amu bɔ̀wanlín tswí. ²³ Amenyapó pò abí ayín ání bɔ̀pia abí bɔ̀bwe alí bré ámɔ̀tɔ, bɔ̀gyówí ní. Tsúfé asun wunhe amu ɔ̀nó bówa ɔ̀nlín. Ikplán kpɔ̀kpɔ̀nti béba ɔ̀solóṣu, íṣubítí kpɔ̀kpɔ̀nti é íbéba mósó atsiápósu. ²⁴ Amótó aku bésin ɔ̀dayí ɔ̀nó. Békítá amó aku é ndoun ya ɔ̀má-ɔ̀mátó. Yerusalem wúlu bétsiá ɔ̀má bámbásófo así, alí yófun bréá amó ɔ̀má ámu asitsiábí lamó ɔ̀nó.

*Nyankpɔ̀sa-Mv-Bi Ámu Ibábi
(Mateo 24:29-31; Marko 13:24-27)*

25 “Bówun osúna owí, ɔtsra pú ntsrakpabisu. Ɔpu béda ifúsú. Ɔsolósu atsiápó bénya ifú, bóméebi t́á búbwéé. 26 Nwulótáa ḿa mótó ató f́éé békpinkí. Mú su ahá bénya ifú, t́in ńé t́á ideb́a su. 27 Alí bré ám̀t̀t̀ á, ɔhagyíɔha obówun ání mí, Nyankpusa-Mu-Bi ánfí napó túmi ḿa numnyam kp̀ɔ̀nkp̀ɔ̀nt̀i mbu nwulótáat̀ tsú ɔsúsú neb́a. 28 Ní ntobí ánfí ide mósó ỳɔ́ á, mlíkusu lu, amlitsu ansí f̀ɔ́a k̀i, tsúf́é mlí nkpahób̀i laf̀ɔ̀n.”

Ɔyí Ɔnóm̀ɔ Iwí Osúna

(Mateo 24:32-35; Marko 13:28-31)

29 Yesu léha amó yébi ɔbéé, “Mlíp̀k̀i p̀ɔ̀nt̀ɔ́ ḿa nyí atráhe. 30 Ní ide ate p̀ɔ̀p̀wé le á, mlítowun mó, bí ání awikpan bré laf̀ɔ̀n ta. 31 Alí ḱén, ní mlowun ání ntobí ánfí f́éé ide mótó bá a, mlíbi ání Bulu iwíegýí ámu ilawíé wóyí t́a.

32 “Ɔǹɔ̀kwali nde mlí bláa. Ndemba-abí ánfí f́éé b́umóowu t́a, asa ínı́ f́éé b́éba mótó. 33 Ɔsú ḿa ası́ f́éé b́óts̀ɔ̀n, táme mí as̀ɔ̀n blíhé ḿóɔts̀ɔ̀n ekekékeke.

Iwísvda

34 “Mlík̀i wankláán, ménı́ opotsuawa, ntábu pú ɔyító ató ɔmagyáa méegyi mlí agywunsu, ménı́ mí, Nyankpusa-Mu-Bi ánfí ɔbáke amu méebekítá mlí f́é yibi. 35 Tsúf́é ibéba ɔyító ahá f́éésú. 36 Inı́ su mlıgyo, amlıb̀ɔ́ mpái, ménı́ mlénya ɔwɔnlín tálı́ ts̀ɔ̀n ofúla amu f́éétó, belı́ mí, Nyankpusa-Mu-Bi ánfí ansító.”

37 Nke ám̀t̀t̀ á, Yesu létsiá yósuná ató Bulu ɔtswékpa inu ɔpa. Onyé á, alanátı́ yó Nf̀ɔ́-nyíbu ám̀s̀s̀. 38 Ahá ts̀ɔ̀ts̀ɔ̀ts̀ɔ́ b́ut̀k̀úsú ba Ɔtswékpa inu b́aké, bonu mu as̀ɔ̀n blíhé.

22

Bekiklì Yesu Nwunsv

(Mateo 26:1-5; Marko 14:1-2; Yohane 11:45-53)

¹ Israelfɔ Bodobodo Mátúhénkε, igyi amósú Katsɔn Nkε ámv gyí íbá bɔfɔn. ² Bulu igyí ahapó dεhen pú Mose mb̄la asunápó amv bodunká ɔkpa ání bótɔsv mósú kítá Yesu n̄áintɔ, mó mv, tsúfé bude ahá ámv ifú nya.

Yuda Iskariot Lótsulá Aní Ɔbéle Yesu Há

(Mateo 26:14-16; Marko 14:10-11)

³ Inv Ɔbunsám lówie Yuda Iskariot, ogyi Yesu akasípú dúanyɔ ámvɔɔ ɔkuletɔ. ⁴ Mú sv ɔbɔyɔ Bulu igyí ahapó dεhen pú Bulu ɔtswékpa agyópv dεhen wá, bekítá agywɔn alíá ɔbéle Yesu há amó. ⁵ Ansí légyi amó. Mú sv bɔtsulá ání béka mv ikɔ. ⁶ Yuda lótsulá. Mú sv olodunká ɔkpa ání ɔbótɔsv mósú híéé lé Yesu há amó, bréá ahá tsɔtsɔɔtsɔ ámv buma inv.

Katsɔn Atogyihε Gyí

(Mateo 26:17-19; Marko 14:12-21; Yohane 13:21-30)

⁷ Bodobodo Mátúhénkε ámvɔɔ ekéá bɔtɔmó Israelfɔsv Katsɔn Nkε akúfa lɔfɔn. ⁸ Yesu lówa Petro mva Yohane ɔbéε, bɔyóbwε Israelfɔsv Katsɔn atogyihε amv yai ha amó.

⁹ Petro mva Yohane befíté mv bεε, “Ani Wíé, nkónv ayóbwε mú yai?”

¹⁰ Mú ɔlebláa amó ɔbéε, “Ní mlowíé wúlu ɔnó á, mléfia oyin ɔkuá ɔsv ntsu-ɔlɔ. Mlɔbuo mv yɔ wóyítɔ. ¹¹ Mlowíé á, mlɔfite wóyí mv wie amv mlíaa, ‘Osunápó ɔbéε, afíte fú, nkónv afɔɔ ɔswíkpa bv, ání mía mí akasípú abéba begyi Katsɔn atogyihε amv?’ ¹² Obósuná ml̄ abansórv yílé kuá balá mótɔ yái. Mlɔbwε ató ámv yai inv.”

13 Petro muva Yohane bɔpu ɔkra. Boyɔwun tɔgyítɔ alɪ á múú Yesu lébláa amó ámu pépéépé, bɔbwe Katsun atogyihe amu yáí inu.

Yesu Ntɔpwe Atogyihe Tráhe

(Mateo 26:26-30; Marko 14:22-26; 1 Korintofɔ 11:23-25)

14 Ató ámu gyibi lɔfun, Yesu muva mu sumbí ayɔpú beba betsiá ɔpónú ámu asi. 15 Yesu lébláa amó ɔbéé, “Nhíé ndeklé mbéé, mía mlɪnyɔ abégyi Katsun Nketɔ atogyihe anfi asa mí anwun iwɪɔsin. 16 Tsúfé nde mli bláa mbéé, mméetrá gyi mú ekekεeke yɔfun ekeá itó amóú atogyihe anfi ulí há ámu laba mótó Bulu iwíegyí amɔtɔ.”

17 Inu olotsu ntá-ewe, dá Bulu ipán, ɔlebláa amó ɔbéé, “Mliɔ amlɪnu ha aba. 18 Tsúfé nde mli bláa mbéé, mméetrá nu wáin-abí ntá ánfi ekekεeke yɔfun bréá Bulu iwíegyí ámu íbéba.”

19 Inu ɔlele bodobodo ipín, ɔleda Bulu ipán, bíábía mótó púhá amó, blí ɔbéé, “Mí ɔyulóá mli sv nasi há ní. Mlɪtsia bwe ínɪ pɔkaɪn mísú.” 20 Alɪ kén, bréá begyi ató ámu tá á, olotsu ntá-ewe ámu há amó, blí ɔbéé, “Ntá-ewe ánfi gyí Bulu ntam pɔpwe ání nétseí mí obugya wólí púsí músú há mli ní.

21 “Iníá ndeblí á, mía ɔhá amóú ɔbéle mí há ámu íbɪ da ɔlepε ɔkuletɔ. 22 Mí, Nyankpɔsa-Mu-Bi ánfi nówu fé alíá Bulu léhie yáí, táme ɔhá amóú ɔbéle mí há ámu ɔgyówi.”

23 Inu befi asi bude aba fité beε, “Ngya anɪtɔ ma ɔbóbwe ínɪ?”

Ma ɔbóbwe ɔhande?

24 Nwéengyi léba sumbí ayɔpú amɔtɔ, amótɔ ɔmɔá ɔbóbwe ɔhande sv. 25 Yesu lébláa amó ɔbéé, “ɔmátɔfɔ

awíe bubu túmi amú ahásu. Ahá ámu botetí amú ahande bee, ‘Buale agyípú.’ ²⁶ Táme mlitò mú á, umába ali. Zhá ání odekléá ðóbwwe mlitò ðhande ðbwéé mu iwí ðtráhe. Zhá ání odeklé ðbéé, móbwe mli nkpa ogyápu é ðbwéé mu iwí fé osúmpú. ²⁷ Ma dón mu ba? Zhá ání otsie ðpónúasi lóó, ntéé zhá ání odesúm ðpónú ámu asi? Megyi zhá ámú otsie mú asi ámu dón? Táme mbu mlitò fé osúmpú.

²⁸ “Mlilówa klon buo mi mí isóki féétó ni. ²⁹ Ali ámú mí Sí layáí mí owíe amu a, alí mí é nde mli yaí ní, ³⁰ méní mlétsiá mí ðpónúasi, gyi ató, nú ntá mí iwíe ogyíkpa iwu. Mlétsiá awíe mbíású, gyi Israel abusuan dúanyo ámu asón.”

Petro ðbóswí ðbéé Mvmeyín Yesu

(Mateo 26:31-35; Marko 14:27-31; Yohane 13:36-38)

³¹ Yesu lébláa Simon Petro ðbéé, “Simon, Simon! Ki, ðbunsám dé ðkpa kulí ðbéé, obófuní mli fé ayó. ³² Táme nakókóli Bulu há fú mbéé, fvmádida hógyito. Ní feyínki ba mí wá á, wa fú aba ámu é ðwunlín.”

³³ Petro lébláa mu ðbéé, “Mí Wíé natsúlá, ní obu igyi kóráá mía fwnyo abédi. Ní lowu igyi é á, mía fwnyo abówu.”

³⁴ Yesu lébláa mu ðbéé, “Petro, nde fú bláa mbéé, nde, asa bate ðbéle ðnó á, fóswí pú ibi wá ogyá tse sa ffe fomeyín mí.”

Iwiklí Aní Ibéba Ekekó

³⁵ Iwu Yesu léfité akasípú amu ðbéé, “Bréá nowa mli sumbí, mlimédé sika akente, mlimédé akpankogyo ntéé ntokuta nyosasi a, toku lehián mli?”

Bele mú ðnó bee, “Ekekeke! Tòto mehián ani.”

³⁶ Múú òlebláa amú òbée, “Táme séi mú á, fúá fúbu sika kenté, ntée akpankogyo a, tsu kita. Ní mlúto òku má òdayí ɪya anyo á, òfé mu tati puho ku! ³⁷ Tsúfé ilehián ání mí ɪwi asón ámúú ɪbu Bulu ason wanlínhétò ámu ɪbéba mútò. Bòwanlín bée, ‘Bekla mu wá lakpan abwepótò.’ Tsúfé asón ámúú bòwanlín tsú mí ɪwi ámu ɪbá lafon ta.”

³⁸ Akasípú amu bebláa mu bée, “Ani Wíe, ki, ndayí anyo ní.”

Múú Yesu lébláa amú òbée, “Itso.”

Mpáibò Nfò-nyíbu

(Mateo 26:36-46; Marko 14:32-42)

³⁹ Yesu lédalí wúluto yó Nfò-nyíbu ámuṣu, fé aliá otetsiá yó ɪnu yái. Mu akasípú é bobuo mu. ⁴⁰ Bréá bowie ɪnu á, òlebláa amú òbée, “Mlikokoli Bulu, ménì mlímóowie isókito.”

⁴¹ Múú òledali amótó yó nkpa kpalobí fé nfi múa nfi, yéda akpawunu bó mpái òbée, ⁴² “Mí Sí, ní fótusulá á, ha ntá-ewe ánfí* ɪtsun mɪsu. Táme megyí tóá ndeklé, múa fodeklé ɪbá mútò.” ⁴³ ɪnu Bulu-òbòpu lótsu osúsú bá bele ɪwi òwan súná mu, wá mu òwonlín. ⁴⁴ Asón ihíé de mu háan. Mó su òòbò mpái kínkínkín. ɪleha mu apípi lemlí fé obugya, ɪdetún da osulótò ta-ta-ta.

⁴⁵ Bréá òòkúsú tsú mpái ámu òòkpa, yínkí ba akasípú amu wá á, olowun ání buɔɔɔɔ. Awíreho de amú. Mó su ɪwi lawú amú. ⁴⁶ Múú òlefíté amú òbée, “Ntogyi sò mlíɔɔɔɔ? Mlikusɔ amlíkokoli Bulu, ménì mlímóowie isókito.”

Yesu Kitá

(Mateo 26:47-56; Marko 14:43-50; Yohane 18:1-11)

* **22:42** Ntá-ewe ánfí igyi ɪwíɔsin ání Yesu obówun.

47 Yesu ɔnó mesi, ɔɔm bowotií amósú. Akasípó dúanyɔ ámutɔ ɔkoléá botetí mu Yuda gyá amú nkpá. Inu ɔlenatí tó Yesu ɔbéε, amulata mu puta, 48 táme Yesu léfité mu ɔbéε, “Yuda, latá félatá mí, Nyankpɔsa-Mu-Bi ánfí pútá, pólé mí há?”

49 Akasípó amúú bubu Yesu wá ámu bowun tsá íbá. Mú su befité Yesu bεε, “Akóɔ amó? Anubu ndayí.” 50 Inu amótó ɔkolé lótswi mu ɔdayí kpá Bulu igyí ɔhapú dehen osúmpó ɔku gyɔpi-ɔsu lé.

51 Yesu lébláa ɔkasípó amu ɔbéε, “Mábwe! Isii mli ɔka!” Inu ɔɔpu ibi da osúmpó amu ɔsu ámu, ileyinkí tsá.

52 Múú Yesu léfité Bulu igyí ahapú dehen, Bulu ɔtswékpa agyópu ahandε pú Yudafo ahandε amúú beba mu ɔkitákpá amu ɔbéε, “Ogyo otswapú ngyi, só mlilatsú nkpotí pú ndayí mlebá mí ɔkitákpá? 53 Ntsie mli wá Bulu ɔtswékpa wunsinésú ekek-egyíeke, mlímópu ibi da mi ekekεeke. Táme mli bré ní, oklún túmi dé iwíε gyí.”

Petro Lóswú ɔbéε Mmemyín Yesu

(Mateo 26:57-58, 69-75; Marko 14:53-54, 66-72; Yohane 18:12-18, 25-27)

54 Inu ahá ámu bekitá Yesu, kpá mu ya Bulu igyí ɔhapú dehen wóyító. Petro lépetí obuɔ amú ɔma tsútsúútsú. 55 Táme bréá bosun agyabi wunsinésú inu, butsie mú asi á, Petro léyétsiá amú wá. 56 Otsibi ɔkúá ogyi osúmpó inu lówun ání Petro tsie ogyá ámu asi, ɔleki mu díín, blí ɔbéε, “Oyin ánfí é buo Yesu!”

57 Táme Petro lópu ɔnólí blí ɔbéε, “ɔtsi, mmeyín mu ɔtinεtine!”

58 Ilɔbwe kpalobí á, ɔha ɔku é lówun Petro, ɔlebláa Petro ɔbéε, “Fú é fóbu amótó.”

Támε Petro lébláa mu óbée, “Owíé, megyí mí ní!”

⁵⁹ Fέ dαnhwírι kυλε αμα α, αha bambá é léba botsulá músú óbée, “Lélé, oyin ánfι é létsiá mu wá, tsúfέ Galileayin ogyi.”

⁶⁰ Támε Petro léλε mú ónó óbée, “Agya! Kι, mmeyín asón ánfι ιwι kυku.”

Petro ónó mesi, bate lóbαn. ⁶¹ Anι Wíε Yesu lédamlí kι Petro. Inu Petro lékain asón ámú αnι Wíε lébláa mu óbée, “Fóswwí tse sa fεε fεmeyín mí asa bate óbέλε ónó onyenu.” ámuσυ. ⁶² Inu αledαhι yó kpankpá híε yósu.

Yesu Ahinlá Bwe

(Mateo 26:67-68; Marko 14:65)

⁶³ Yesusu akípυ befi asι buδε mu ahinlá bwe, buδε mu da. ⁶⁴ Bαpu ató klí mu ansibi, fité mu beε, “Bulu ónósú ótáípú, maládá fú? Bla anι.” ⁶⁵ Bekpa mu asiabi, bláa mu nyányála.

Yudafó Asón Agyípó Ansító Lú

(Mateo 26:59-66; Marko 14:55-64; Yohane 18:19-24)

⁶⁶ Yudafó ahandε, Bulu igyí ahapó dehen pó Mose mbla asunápú amu befia αyι kehe nyankι-nyankι, bebitía Yesu belí amú ansító. ⁶⁷ Bebláa Yesu beε, “Ní fógýí Kristo, (αhá ámú Bulu ladá mu ofúli amu) α, bla anι.”

Yesu lébláa amú óbée, “Ní nebláa mli kóráá, mlimóohogyi. ⁶⁸ Ní nefité mli asvankυ é á, mliméελε mú ónó. ⁶⁹ Támε tsú séi póya α, mí, Nyankpuσα-Mu-Bi ánfι nétsiá Bulu Otúmípu amu gyαpισυ.”

⁷⁰ Amú fέé befité Yesu beε, “Mú sv fógýí Bulu mu Bi ámu nι?”

Yesu lébláa amú óbée, “Ee, ónαkwahι amu mlilablí á.”

71 Inu befité aba bεε, “Ntogyi só abétrá dunká adansifó bámbá? Mú anlanú tsú mu onutó onó á.”

23

Yesu Kpa Ya Pilato

(*Mateo 27:1-2, 11-14; Marko 15:1-5; Yohane 18:28-38*)

1 Inu ahá amóú befia inu ámu bókusú kpá Yesu ya amású ogyípó Pilato. 2 Beka asón dínká musu bεε, “Anulawun ání oyin ánfí dé amá ánfító ahá yintá. Ɖde amó bláa obéε, bumátra ka lampóo há Roma owíε dehen. Ɖdeblí é obéε, muɣyí Kristo, (ohá ání Bulu ladá mu ofúli amu), idesuná ání owíε ogyi.”

3 Pilato léfité Yesu obéε, “Fúgyí Yudafó owíε amu ni?”

Yesu léle mú onó obéε, “Ee, mú fablí á.”

4 Pilato lébláa Bulu igyí ahapú dehen pú adam amu obéε, “Mmákówun tsitsa kokuá oyin ánfí labwé.”

5 Táme amó mú buɔe mótó kótóó bεε, “Ɖdepu mu atosunáhé tí itré múa ikó wá Yudea amá ánfító. Olefi mú asi tsú Galilea, alapó bowie nfi.”

Yesu Líí Herode Ansító

6 Bréá Pilato lónu asón ánfí á, ɔlefíté obéε, “Galileayin oyin ánfí gyí?” 7 Bréá ɔlebi ání Yesu otsú Galilea, otínéá owíε Herode dé iwíε gyí a, ɔleha bekpa mu ya Herode. Alí bré amoto á, Herode bu Yerusalem wúluto inu. 8 Bréá owíε Herode lówun Yesu a, ansí lehie gyi mu. Tsúfé olodunká ání obówun mu dodoodo, mu iwí asón ání alanú su. Odeklé ání Yesu obwéε osúna ku suna mu. 9 Mú su ɔlefíté Yesu asón tsatsɔtsɔ, táme Yesu méle kuku onó. 10 Bulu igyí ahapú dehen amu pú Mose mbla asunápó amu bolú inu, buɔekplón ka asón dínká

musu. ¹¹ Owíe Herode muva mu isá akapó ámu é bəsupáa mu, bwé mu ahinlá. Bəpu sriki ligá ku wá mu, beyinkía mu ya Pilato. ¹² Owíe Herode muva Pilato bemlí anyawíe tsú eke ámu. Teki amó nsiné uma ale yáí.

Yesu Lowu Ipón Ha

(Mateo 27:15-26; Marko 15:6-15; Yohane 18:39–19:16)

¹³ Pilato létí Bulu igyí ahapó dehen, Yudafə ahande pú əmá ámu féé befia. ¹⁴ Múú əlebláa amú əbéé, “Mliléka oyin ánfí ba mi mlíaa, əde əmá ámu agywun yintá. Nafité mu ənótó asún mli ansító, nawun ání asún ámuú mliléka dínká musu ámu uma mótó. ¹⁵ Owíe Herode é lawun mú alí. Mú sú alayinkía mu sísí aní ní. Oyín ánfí mókóbwé tətəá bómə mu. ¹⁶ Iní su néha bəpítí mu ató, mí ansi mu ənatí.”

¹⁷⁻¹⁸ Inu ədəm amu féé bəkplón blí beé, “Le mu inu, afusi Baraba ha aní!”* ¹⁹ (Baraba anfi da obu, tsúfé ələkúú lí wúlu amusu, ələmə əha é mótó.)

²⁰ Pilato lékléa obési Yesu. Mú su əletrá tóí kplá ədəm amu. ²¹ Táme bəkplón kóklókúú bláa mu beé, “Da mu manta oyikpalíhesu! Da mu manta oyikpalíhesu!”

²² Pilato lébláa amú otse saasi əbéé, “Tsitsa məmu alabwé? Mməkówwun tás alabwé, sú néha bómə mu. Néha abupiti mu ató, ənatí.”

²³ Táme bobu mósú bodekplón kóklókúú beé, əháa abuda mu manta oyikpalíhesu. Inu bəđun mu ənəlí. ²⁴ Mú su Pilato lóbwe dínká tó ámuú bodedunká

* **23:17-18** Mótó yée 17 bu nwołó dada amu akotə: Katsun Nke kugyíkotə á, lehián ání Pilato obési obu ədipó əkole ání Yudafə ámu bodeklé há amú.

ámusu. ²⁵ Olesi oyin ámuú òlòkúṣú líí òmá ámuṣu, mó òha mútò sù òda obu ámu, olesi Yesu há mu isá akòpú òbée búbówée mu alá ahá ámu búdeklé.

Yesu Da Mántá Oyikpalíhesu

(Mateo 27:32-44; Marko 15:21-32; Yohane 19:17-27)

²⁶ Bréá bekpa Yesu bọ́yó á, befia Kireneyin òkúá búteṭí mu Simon. Otsú abúasi. Isá akòpú ámu beka mu híé beé òsóra oyikpalíhe amu buo Yesu.

²⁷ Òḍam bobuo Yesu. Atsiá bobu amútó búpu amó anyópu, búhíé búdesú ha Yesu. ²⁸ Yesu lédamli, òlebláa amó òbée, “Yerusalemfo atsi, mlimásu mi. Mlisu mli iwí pú mli abí. ²⁹ Tsúfẹ́ nkẹ́ kú ibá mléblí mlíaa, ‘Bulu layúlá atsiá búmòkókúwí kú, obí mókódí amó opúnitò kú, obí mókónyópó amó é kú.’ ³⁰ Alí bré ámuṭò á, ahá bébláa abu beé, ‘Mlúbwie bun anisu. Nkúku, mlípula aní.’ ³¹ Tsúfẹ́ ní búde oyi bóbwe ogyá wa alá á, nkálí bóbwe oyi wólihe?”†

³² Isá akòpú ámu bekpa lalahé abwepú abanyó é mántá Yesusu, bọ́yómò amó. ³³ Bréá bowie otínẹkúá búteṭí inu “Nwun Okokobi” a, beḍa Yesu mántá oyikpalíhesu. Beḍa amó abanyó ámu é mántá nyikpalíhesu. Òkúle bu Yesu gyọ́píṣu, òkúle é bu mu búnasu. ³⁴ Inu Yesu léblí òbée, “Mí Sí, sikie amó, tsúfẹ́ búmeyín tóá búdeḅwe.”‡

Isá akòpú ámu bọ́ṣwí abi ye Yesu atadietò. ³⁵ Ahá tsòtsòṣòṣò amúú bobuo amó yó inu ámu besi bulí inu búde mu kí. Yudafo ahande amu bóbwe mu ahinlá beé, “Òlòhò ahá nkpa. Ní lélé múgyí Kristo, òhá

† **23:31** Ní mí ánfí mí asón da òkpa ánfí kóráá búdeḅwe alá á, nkálí Bulu òbóbwe ahá ání bégýi pón mu ansító? ‡ **23:34** Mútó yée 34 ima nwóló dada amu akòṭo.

ámú Bulu ladá mu ofúli), mu Bulu lalé ní á, òhò mu iwí nkpa!”

³⁶⁻³⁷ Isá akòpú ámu é bopu ntá odáí tin mu onó, bwé mu ahinlá bée, “Ní fúgí Yudafo owíe amu ní á, le fú iwí!”

³⁸ Bòwanlín ató mántá oyikpalíhe amu awunso bée, “YUDAFÒ OWÍE AMU NÍ.”

³⁹ Lalahé abwepú ámú beda mántá oyikpalíhesu ámútò okule léblí Yesu iwí abususu òbéé, “Megyí fúgí Kristo amu ní? Le fú iwí, afulé aní mée!”

⁴⁰ Táme onyòòsi amu lówa iyin wá mu òbéé, “Fumédé Bulu ifú nya! Fúa monyò fée dé isubití kule hò. ⁴¹ Aní mú á, aní isubití ida okpa, aní lakpan ání anilóbwe su. Táme oyin ánfí mú mókúbwé laláhe kuku.” ⁴² Múú òlebláa Yesu òbéé, “Yesu, ní febá fú iwíe ogyíkpa a, kan mísú!”

⁴³ Yesu lébláa mu òbéé, “Ònòkwali nde fú bláa. Nde, mía fonyò abétsiá Paradiso.”

Yesu Lowu

(Mateo 27:45-56; Marko 15:33-41; Yohane 19:28-30)

⁴⁴⁻⁴⁵ Alí bré ánfí íbóbwe fé òpa dódúanyò. Owí leta osulúv amusu fée alí yáfun ntópwe òsatò. Owí metrà lun é. Inu á, tati ámú bopuká Bulu Òtswékpa obu ámútò òlebalí anyò. ⁴⁶ Yesu lókpìlun kóklókúú blí òbéé, “Mí Sí, napú mí òhé wá fú íbitò.” Olenya blí alí tá pé, òlele òhé.

⁴⁷ Bréá isá akòpú òhande amu lówun tóá òlaba a, òlekanfú Bulu òbéé, “Lélé, òha yilé oyin ánfí gyí.”

⁴⁸ Ahá ámú bulí inu ámu fée bowun tóá òlaba, bopu awírehò nátí boyó wóyí. ⁴⁹ Táme amúá buyin Yesu pú atsi ámú bobuo mu tsú Galilea òmátó ámu besi bulí tsútsúútsú bude itóá òde músú yò kí.

Yesu Pulá
(*Mateo 27:57-61; Marko 15:42-47; Yohane 19:38-42*)

⁵⁰⁻⁵¹ Oyin akw létsiá, butetí mu Yosef. Otsú Yuda wúlu kuá butetí mú Arimateato. Jha yilé ogyi, obú é bu musu. Ibo mótóá abo amá ámu asún agyíputo, táme omotsulá dínká amó agywun pú amó bwehé ánfisu. Otsie ogyo Bulu iwíegyi ámu. ⁵² Oyin ánti lóyo Pilato wá, yókulí mu akpa abéé, osíi Yesu fúli amu ha mu. Pilato léha mu akpa. ⁵³ Inu Yosef léyesíi Yesu fúli, aláyo áhráda kíklí mu iwí, pú mu yówa abó kuá mu onutó aléha beda butátó há mu iwí, bumakúpulá áhaa mótó kí. ⁵⁴ Eke ámu igyi Fieda. Eke ámu igyi ogyá adudáké. Owí inyá tá pé, akpónú adaké ámu lafi asi.

⁵⁵ Atsi ámuú bubuo mu tsú Galilea amu bobuo Yosef yéki Yesu opulákpá pú aláyo aláyo fúli amu tswi abó ámutó. ⁵⁶ Beyinkí yó wóyí yókwé ohuam, áhíén pú ofobí fánfán ání bóyo yékpá Yesu. Botsutsúa abubwe ta á, owí latá, beda akpónú akpónú adaké ámu fé alá Mose Mbla leblí.

24

Yesu Kvsó Tsú Afúlitó

(*Mateo 28:1-10; Marko 16:1-8; Yohane 20:1-10*)

¹ Kwasiada, igyi ndawótswító eke gyankpapu bake a, atsi ámu bokósó tsú afá ámuú bokwe yáí ámu yó Yesu ntsán ámu asi. ² Bowun ání bamína ibwi ámuú baputin abó ámu onó ámu lé inu. ³ Mú su bebitiwíé abó ámutó, táme bumowun Yesu fúli amu. ⁴ Besi bulí, bude nwuntó bu. Beki a, ayin abanyó akw líi amó wá inu á. Amó atadie de ogyá kpa. ⁵ Ifú lekítá atsi ámu, beda akpawunu pú ansító bun

ᾶsolútṵ. Táme ayin ámu befité amó beε, “Ntogyi só mlidé ḡkiankpapu dunká afúlitṵ? ⁶Ḷma nfi, alakósó! Mlikain asón amóú ḡlebláa mli bréá mlia mnyo mlibu Galilea ḡmátṵ amusu. ⁷Ḷbéε, ‘Ilehián ání béle mí, Nyankpusa-Mu-Bi ánfi há lakpan abwεpó. Bédá mí mántá oyikpalíhesu. Mú eke sáásí a, nókusu tsú afúlitṵ.’ ” ⁸Inu atsi ámu bekaín Yesu asón ánifisu. ⁹Beyinkí tsú ntsán ámu asi bebláa sumbí ayḡpó dúḡkun ámu pú aha atráhe amóú bubu inu ámu fée tóá bayówun.

¹⁰Atsiá bḡḡ ntsán ámu asi gyí, Magdalayintse Maria, Yohana pú Yakobo mu yin Maria. Amóa atsi akvá bubu amótṵ lékla asón ánfi suná sumbí ayḡpó ámu. ¹¹Asón ámu lḡbwe sumbí ayḡpó ámu fé mimlála. Mú su buməhḡ mósú gyi. ¹²Táme Petro mú lókusu, tsíi ᾶsri yó ntsán ámu asi. Olobun kpéléki ḡbḡ ámuṵ. Tati amóú bḡpupúlá Yesu nkole olowun ání ida ifúntṵ. Oleyinkí yó wóyítṵ, ḡde nwuntṵ bu tsú asón ánfi ilaba anfi iwí.*

Emaus Wúlutṵ Yḡ
(Marko 16:12-13)

¹³Eke ámu kén á, abúopu amu abanyó benatí bḡyḡ wúlu kvá butetí mú Emaustṵ. Tsú Yerusalem ya inu bḡbwe fé máli asienó. ¹⁴Amó nkule buna bude nkəmbḡ gyí tsu asón amóú ilaba amu iwí. ¹⁵Bréá bude mótṵ yḡ á, Yesu onutṵ é lḡbḡtu amó, muva amónyḡ buna. ¹⁶Bulu létin amó ansí. Mú su buməbi mu. ¹⁷Yesu léfité amó ḡbéε, “Amansu iwí nkəmbḡ mlíná mlidégýí ali?”

Besi lí tikpa, awirehḡ lekítá amó. ¹⁸Amótṵ ḡkuleá butetí mu Kleopa léfité ḡbéε, “Fú nkule gyí ḡfḡḡ

* **24:12** Mótṵ yée 12 ima nwóló dada amu akṵṵ.

Yerusalem wúluta, fómeyín asón ání ilaba inu nke ánfita?”

¹⁹ Yesu léfité mu obéé, “Amansu igyi?”

Bébláa mu bée, “Yesu, Nasaretyin amu iwí asón igyi. Bulu onósú atáíró ogyi. Olobwé ofúla akpónkpóni, bí Bulu asón t́miso, Bulu muva anyánkpósa f́éé ansító. ²⁰ Aní Bulu igyi ahapó dehen ṕ ẃlu ahande bapó mu há ahá, bahá mu lowu ipón, dá mu mántá oyikpalíhesu. ²¹ Teki mogyí ohá aní aniléki okpa aniaa, obéha aní Israelfo abégyi iwí ní. Nde eke sáásí opá asón ánfí ĺbá. ²²⁻²³ Ḿbá idun kóráá á, anito atsi aku bayó mu ntsán ámu asi bakieni, táme bumowun mu f́lí amu. Bée, bayówun Bulu-abopu aku babláa amó bée, obu nkpa. T́á beyinkí bebláa aní lawá aní wánwan. ²⁴ Inu su anito aku é basrí yó ntsán ámu asi, bayówun mó fé alí atsi ámu beba beblí. Amó é bumowun f́lí amu.”

²⁵ Yesu lébláa amó obéé, “Mlímimlá o! Mli agywun tamayó agyómá osasu. Nkálí igyi só mlímóhó asón amóú Bulu onósú atáíró amu beblí tswi amu f́éésú gyi? ²⁶ Mlíméyín mlíaa, ilehián aní Kristo, (ohá aní Bulu ladá mu ofúli amu) obówun iwíwusin, asa obénya mu numnyam?” ²⁷ Inu Yesu léle mu iwí asón aní b́wanlín wá Bulu ason wanlínhé amoto, tsú Mosesu b́tu Bulu onósú atáíró amu f́éésú asi súná amó.

²⁸ Bréá bowie ẃlu amoto b́yó á, Yesu lóbwe fé odetsoón oyó otine bambá. ²⁹ Táme abúopu amu bebláa mu bée, “Aní sí, owí lapon, di aní wá nde.” Mó su Yesu lébaí yó amó wá. ³⁰ Bréá bude ató gyí a, Yesu léle bodobodo ipín, dá Bulu ipán. Ḿú olebiabía mótó ṕhá amó. ³¹ Inunu amó ansísú letítí

amó, bebi mu, táme olófwí sí amó. ³² Inu befité aba bee, “Ansí mehie gyí aní bré ámóú ania munya aniná, ode aní asón bláa, ode Bulu ason wanlínhé amu así le súná aní ámu?”

³³ Bákúsó inunu yínkí ba Yerusalem. Beba a, sumbí ayopó dúokun ámu pú aha tráhe bafia, ³⁴ búdeblí bee, “Lélé, aní Wíe lakúsó. Alalé iwí owan súná Simon!”

³⁵ Mú su ahá abanyó ámu é beblí tóá bayówun okpató. Tóá bopóbí mu gyí bodobodo amóú oleye ha amó ámu.

Yesu Iwíowanle Súná Mu Akasípó

(Mateo 28:16-20; Marko 16:14-18; Yohane 20:19-23; Gyumagyihe 1:6-8)

³⁶ Ahá abanyó ámu bubu mósó budetóí alí á, Yesu onutó léba belí amó nsíné. Odeblí obéé, “Iwí ilwíí mlí.”†

³⁷ Opúni letsíí amó, bəwan. Iləbwe amó fé fúli budewúun. ³⁸ Inu Yesu léfité amó obéé, “Ntogyi só mlídé ifú nya, mlídé nwéen gyí mlí kluntó alí? ³⁹ Mlíki mí ibí, amlíki mí ayabiasí. Megyí mí onutó ní? Mlíki tá mí amlíki. Fúli má ayulúv móa awú fé alá mbv.”

⁴⁰ Bréá odeblí asón ánfí tá á, oləpu mu ibí pú mu ayabí súná amó. ⁴¹ Ansí lehíe gyí amó, asón ámu é lówa amó wánwan. Mú su bumohogyí ánílélé mu ní. Inu oléfité amó obéé, “Mlíbu atogyíhe ku nfí?” ⁴² Beha mu iye təhé itin ku, ⁴³ oləhə mú, wí mó amó ansító inu.

⁴⁴ Inu olebláa amó obéé, “Iní gyí asón ání nebláa mlí bréá mbv mlí wá ní. Nebláa mlí mbéé, ilehián ání mí iwí asón kugyíkúá bəwanlín wá Mose Mbla,

† **24:36** Odeblí obéé, “Iwí ilwíí mlí.” uma nwoló dada amu akotó.

Bulu ɔ́nɔ́sú atɔ́ipú nwoló pú Israelfɔ́ ɔ́lɔ́ ɔ́wulótó f́éé b́éba mótó.”

⁴⁵ Inu olobwii amú agywun, méni bónu Bulu asun wanlínhé amu asi. ⁴⁶ Ɔ́lebláa amú ɔ́b́éé, “Bɔ́wanlín tswi b́éé, Kristo, (ɔ́há ámúú Bulu ladá mu ofúli amu) amu obówun iwɔ́sin, wú. Bulu ɔ́b́kɔ́súa mu mú eke sáásí tsú afúlitɔ́. ⁴⁷ Mú ɔ́ma a, ahá b́éda Bulu asun wankláán ámu ɔ́kan mí ɔ́dátó há ɔ́má f́éé b́éé budámli kluntɔ́, f́éki Bulu obési amú lakpan ḱié amú. B́éfi mú asi tsú Yerusalem. ⁴⁸ Mlgyí mí adansifɔ́ há asón ánfí ní. ⁴⁹ Nɔ́pu Ɔ́ɔ́e Wankíhé amúú mí Sí ĺéhíe yáí há mli ámu sísí mli. Mú su mltsia wúlu anfitɔ́ alu yófon ekeá Ɔ́ɔ́e Wankíhé amu obótsu ɔ́sósú bá beha mli túmi.”

Yesu Ɔ́sósú Yɔ́

(Marko 16:19-20; Gyumagyihé 1:9-11)

⁵⁰ Bréá Yesu lébli asón ánfí tá á, ɔ́lekpa amú dáli, bɔ́yɔ́ Betania wúlutɔ́. Inu olotsu ɔ́b́i f́óá, yúlá amú.

⁵¹ Bréá ɔ́de amú yulá á, muva amónyɔ́ nsíné lówa ifó wa bi, Bulu lótsu mu ya ɔ́sósú. ⁵² Inu b́éda akpawunu súm mu, bɔ́pu ansigyí kpɔ́nkpɔ́nti yínkí yétsiá Yerusalem. ⁵³ Betsiá yó Bulu ɔ́swékpa mu brégyíbré, yékanfó Bulu.

Bulu ntam pɔpwɛ; Nkonya
New Testament in Nkonya (GH:nko:Nkonya)

copyright © 2010 Wycliffe Bible Translators, Inc.

Language: Nkonya

Translation by: Wycliffe Bible Translators, Inc.

Nkonya

nko

Ghana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nkonya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

01b09958-fa53-51d1-aae0-88c7e9302503